

Madiu

Buki ana alamani weaqina

Madiu wese ana wawa Libai. Tauna Diu 'olotona, ta ena fewa takesi 'ewa'ewa dadana me Diu 'idiega Loma gabemani weaqidi. Ba'e 'iuna 'inega me Diu Madiu ge ida 'awahaqiaqiea, ta Ieisu nuakolokoloyea 'inega gabei mai 'inaya ta 'abibodea.

Buki ba'e Ieisu Valena weaqina Madiu 'wayavia ena tomotauyavo me Diu weaqidi. 'Inega yani qabuna Ieisu ena vi'oi 'inega be tautauya ana laba ya'itoto 'evivi 'aligega weaqina 'wayavia 'idia. 'Inega ena ve'ita waiwaina be, ena viaqa 'ebenuavoqana be waiwaidi ta wese ena 'aliga 'etoluai 'inaya weaqina simana 'ifoqeyedi ena 'wayavi qabuna 'idiega.

Ibeliu bonadiega Yaubada Natuna igabea To'etoyavua (Mesaia) ta Guliki bonadiega ana alamani Keliso. Tauna Mesaia~nana me Diu iba'eba'eyea vonigo totutaya namai be na'etoyavuidi Loma gabemani edi luvine waiwaina 'inega. Me Diu edi tovanugwetayavo Ieisu ena mai 'iuna ivemwageyee, ta wese tomotau qabudi nuadi voqana. Ta Madiu nuanuana ena tomotauyavo nave'itedi Ieisu tauna vonahaqiaqi Keliso, me Diu edi Toluvine Qiduana, 'inega simana 'idia Ieisu ena 'evivi mai ana tuta 'inaya na'ifoqe kavona Kini 'idewani.

Ta wese vaina vona fofofola nugwenugweina 'inamedi Yaubada ena venua'ivina weaqina, ta vona diavona adi aqiaqi ve'ifoqeyea Ieisu 'inega.

Madiu vaina yani 'ena'ena'ina weaqidi 'wayavia 'idewani Ieisu ena ve'ita ve'aidega weaqina Yaubada ena yo'o gamonaya. Ta wese ena vona sesebai 'eala 'wai'waividi tomotau edi lugu mahala ena 'Ebeluvine gamonaya weaqina.

Buki gamona

- 1:1–2:23 Ieisu Keliso tubunavo ta wese ena vi'oi weaqina
 - 3:1–12 Ioni Togivebabitaiso ena viaqayavo
 - 3:13–4:11 Ieisu ena babitaiso ta wese ana sitonova
 - 4:12–18:35 Ieisu ena viaqayavo tomotau nuanidia di'we Galili 'inaya
 - 19:1–20:34 Ieisu Galili nokea ta tauya Ielusalema 'inaya
 - 21:1–27:66 Ieisu ena wiki 'ebelu'ovoa
 - 28:1–15 Ieisu ena ya'itoto 'evivi 'aligega ta wese ena 'ifoqe tomotau 'idia
 - 28:16–20 Ieisu ana tovetumaqanayavo adi veyoveyoea neidi
-

Ieisu 'aqegiginavo
(*Luke 3:23-28*)

- 1** ^{1 a} Ba'e Ieisu Keliso ena gadeyavo. Tauna Deibida ena gade 'inega, ta Deibida~nana tubuna Ebelamo. ² 'Inega ba'e 'edewani:
Ebelamo natuna Aisake,
ta Aisake natuna Iakobo,
ta Iakobo natuna Iuda ma tainavo ivi'oi.
- ^{3 b} 'Inega Iuda~nana natunavo Felesi ta Sela,
ta inadi Temali.
Felesi natuna Esiloni,
ta Esiloni natuna Lemi.
- ⁴ 'Inega Lemi natuna Aminadaba,
ta Aminadaba natuna Nasoni,
ta Nasoni natuna Salimoni.
- ^{5 c} 'Inega Salimoni moqanena Leabi ta natudi Boasa,
ta Boasa moqanena Ludi ta natudi Obedi,
ta Obedi natuna Iese,
- ^{6 d} ta Iese natuna Deibida, tauna toluvine qiduana.
Ta Deibida~nana Ulaia wada'ena Betisiba vaqidi, 'inega natudi ivenatunea Solomoni,
- ⁷ be Solomoni natuna Lioboama,
ta Lioboama natuna Abaya,
ta Abaya natuna Asa,
- ⁸ ta Asa natuna Iosefata,
ta Iosefata natuna Iolama,
ta Iolama natuna Usaia.
- ⁹ Ta Usaia natuna Iotama,
ta Iotama natuna Easa,
ta Easa natuna Esekaia,
- ¹⁰ ta Esekaia natuna Manasa,
ta Manasa natuna Emoni,
ta Emoni natuna Iosaia,
- ^{11 e} ta Iosaia natuna Iekonaia ma tainavo, taudi edi tutaya me Babiloni imai me Diu iluqoqonidi itauyedi Babiloni 'inaya.
- ^{12 f} Tuta~nana Babiloni 'inaya itoatoa,
'inega Iekonaia natuna Salatieli vi'oi,
ta Salatieli natuna Selubabela,
- ¹³ ta Selubabela natuna Ebiuda,
ta Ebiuda natuna Eliakimi,

^a 1:1 1Yani 17:11; Nug 22:18 ^b 1:3 Nug 38:29-30; Lud 4:18-22 ^c 1:5 Lud 4:13-17

^d 1:6 2Sam 12:24 ^e 1:11 2Kin 22:1-24:20; 2Yani 36:10; Iel 27:20 ^f 1:12 Esa 3:2

ta Eliakimi natuna Esoli,
 14 ta Esoli natuna Sadoka,
 ta Sadoka natuna Akimi,
 ta Akimi natuna Eliuda,
 15 ta Eliuda natuna Eliesa,
 ta Eliesa natuna Matani,
 ta Matani natuna Iakobo,
 16 ta Iakobo natuna Iosefa, tauna Meli moqanena, ta Meli natudi Ieisu,
 ta Ieisu tauna igabea To'etoyavua.
 17 Ta Ebelamo 'inega kana avodi namai Deibida 'inaya lagata 14 adi yau
 i'ifoqe, ta wese Deibida 'inega be tuta~nana me Babiloni me Diu iluqoqonidi
 itauyedi Babiloni 'inaya wese lagata adi yau 14 i'ifoqe, ta edi toa~nana
 Babiloni 'inaya be ana laba Ieisu ena tutaya wese lagata adi yau 14.

To'etoyavua Ieisu ena vi'oi

(Luke 2:1-7)

18 ^s Ieisu ena vi'oi ba'e 'idewani 'ifoqe: Ieisu inana Meli ta Iosefa maega
 igwaledi ta nawale 'wafina ge dagitonovi, ta Meli vebaea tawa valagata
 Niboana Gwalagwalana 'inega. 19 'Inega Iosefa nuana vita. Ta ena ilivu
 tunutunuqina, 'inega ge nuana Meli nagiveiniyauyauyei ta 'esi 'waivega
 nuanua vonigo Meli nanogea. 20 Nawale Iosefa nuana 'ivi'ivina noga
 weaqina, 'inega velovelovana 'inaya ve'wayoqega Yaubada ena tovale'ewa
 'ifoqe 'inaya vonaya, "Iosefa, o'a Deibida tubuna, ge una nuavita Meli ena
 valagata weaqina, mana bena'ena Niboana Gwalagwalana ena waiwaiega
 valagata, 'inega una 'ebe'ewea moqaneu. 21 ^h Nawale natuna me'olotona
 navi'oi ana wawa una gabea Ieisu, mana tauna ena tomotauyavo edi
 luveifana 'inega na'etoyavuidi."

22 Yani ba'e 'ifoqe be navevona aqiaqi, mana lova taha tovesimasimana
 Yaubada ena vona Buki Nugwenugweina gamonaya 'wayavia vonaya,

23 ⁱ "Iahaba matayauyona navalagata be natuna me'olotona
 navenatunea ina gabea ana wawa Imanueli."

Ta wawa~nana ana alamani "Yaubada ita'a maega". 24 'Inega Iosefa
 'enovila ta Yaubada ena tovale'ewa ena vona vetumaqanea, 'inega Meli
 maega ivaqi ta 'ebe'ewedi tauyedi ena vanuea. 25 ^j Ta Iosefa Meli 'wafidi
 ge dagitonovi ana laba iuweta, 'inega Iosefa gwama~nana gabea ana
 wawa Ieisu.

Toalamani qiduquiduadi Ieisu ivayausia

2 1 Ta Ieisu vi'oi 'abaga Bedeliema 'inaya di'we Iudia ena 'ebeluvine
 gamonaya, Elodi ena tuta vetoluvine 'inaya. 'Inega vaina toalamani

^s 1:18 Lk 1:27,35 ^h 1:21 Lk 1:31; 2:21 ⁱ 1:23 Ais 7:14 ^j 1:25 Lk 2:21

qiduqiduadi baba'au ena 'ebeyayaqega imai 'abaga qiduana Ielusalema 'inaya ivetala'aiea ivonaya, ^{2 k} “Ma'inaya me Diu edi Kini vauvauna toatoa? Ahalamanian tawa vi'oi mana ana 'wadima a'itea baba'au ena 'ebeyayaqega vanemai. 'Inega amai sabi iwa'odu 'inaya.”

³ Ta tuta~nana Elodi edi vona noqolia 'inega nuana vita, ta wese me Ielusalema qabudi giwalidi a'ala ba'e vona~nana weaqina. ⁴ 'Inega Elodi toveguba qiduqiduadi be luvine ana tove'itayavo gaba va'auqidi imai, 'inega vetala'aiedi vonaya, “Ma'inaya To'etoyavua~nana navi'oi?” ⁵ Ena vetala'ai ive'iea ivonaya, “Abaga Bedeliema di'we Iudia 'inaya. Lova tovesimasimana ena simana Buki Nugwenugweina gamonaya vonaya,

^{6 l} ‘Bedeliema 'abaga goyona gamonega nawale me Isileli edi Kini na'ifoqe, tauna egu tomotauyavo navanugweted. Ba'e weaqina Bedeliema 'abaga kaikaiwabuna ta qiduana Iudia 'abaganavo gamodiega.’ ”

⁷ Elodi edi vona noqolia 'inega toalamani diavona gabedi imai ta 'waivega vetala'ai aqiaqiedi totutaya 'wadima~nana 'ifoqe. ⁸ 'Inega Elodi ena vetala'ai 'wadima~nana weaqina ive'iea, e 'inega tauna luvinedi vonaya, “Ona tauya Bedeliema 'inaya nuanuagu gwama~nana ona sali aqiaqiei be ona lobe, e 'inega ona mai ona vonegu, 'inega ya'a wese ena tauya ena iwa'odu 'inaya.” ⁹ Elodi ena vona lu'ovoia 'inega i'ifoqe, ta lova 'wadima~nana i'itea wese vanugweted itauya, ta to'edia gwama~nana 'eno'eno debanaya lua'u. ¹⁰ Tuta~nana toalamani diavona 'wadima~nana i'itea iqaiawa gegoyo. ^{11 m} 'Inega ilugu vanuea ta gwama ma inana Meli i'itedi, 'inega 'amayabega isobadi ta ihiwa'odu 'inaya. Ta 'abiboda edi veyoluba kodeyega i'ewedi ia'uya gwama~nana 'iawanaya. Ta kulufa diavona dabo kaikaiwabuna ana wawa goul, ta wese mulo be inisenisi.

¹² 'Abiboda Yaubada ve'wayoqega vematamagilafuyedi be ge ida 'evivi Elodi 'inaya, ta 'esi mali 'edega i'evivi itauya edi 'abagaya.

Iosefa be gwama ma inana idena itauya di'we Itifita 'inaya

¹³ Ta edi tauya 'abibodanaya Yaubada ena tovale'ewa taha ve'wayoqega Iosefa 'inaya 'ifoqe 'inega voneaya, “Uya'itoto, be gwama ma inana una 'ebe'ewedi 'inega ona dena ona tauya di'we Itifita 'inaya. Be omo'idia ona toatoa ana laba ena vonemi, mana Elodi nawale bena'e gwamana nasalia be vonigo naluve'aligia.”

¹⁴ 'Inega velovelovana 'inaya Iosefa ya'itoto ta gwama~nana ma inana 'ebe'ewedi 'inega itauya Itifita 'inaya. ^{15 n} Ta Itifita 'inaya itoatoa ta iba'eba'e ana laba Elodi yawaina nagumwala, 'inega Yaubada ena vona ana aqiaqi 'ifoqe, mana lova tovesimasimana taha madusimanea vonaya,

^k 2:2 Naba 24:17 ^l 2:6 Mai 5:2; Ion 7:42 ^m 2:11 Same 72:10-15; Ais 60:6

ⁿ 2:15 Ose 11:1

“Itifita ’inega Natugu yagabei mai.”

¹⁶ Elodi toalamani diavona nawale ba’eba’eyedi, ta ge ida ’evivi mai ’inaya. ’Inega nuana ’eqa’uya ge wese ina mai be ina vonei gwama~nana weaqina. ’Inega diana vilei be ena luvine a’uya vonigo gogama me’ome’olotodi adi ya’wala magilafudi ta ’ayanaya ina luve’aligidi Bedeliema ’abaganavo ’idia, mana toalamaniavo edi simana ’inega ni’a alamania gwama~nana ena tuta vi’oi weaqina.

¹⁷ Ta Elodi ena luvine ba’e ’inega tovesimasimana Ielemaia ena vona adi aqiaqi ’ifoqe vonaya,

¹⁸ ° “Duvoyavoya kanoqonoqolia ’abaga Lama ’inega,
visiqa ta mataelu maega iduduvoyavoya,
Litieli^p me ena gadeavo idoudou natudiavo weaqidi,
’inega ge nuanuadi taha toga nuadi nagenoi
mana natudiavo ni’a i’aliga.”

Itifitayega i’evivi itauya Nasaleta

¹⁹ Elodi ni’a ’aliga, ta Iosefa ena susu maega nawale Itifita ’inaya itoatoa. ’Inega ’wayoqega Yaubada ena tovale’ewa taha ’ifoqe Iosefa ’inaya vonaya, ²⁰ “Uya’itoto, gwama ma inana una ’ebe’ewedi ta ona ’evivi Isileli bwa’obwa’onaya, mana gwama~nana ana avia ni’a ’aliga.”
²¹ ’Inega Iosefa ya’itoto ta gwama ma inana ’ebe’ewedi i’evivi Isileli ’inaya.

²² Tuta~nana i’evivi imaimai Iosefa vale noqolia Elodi natuna Akeleasi tamana luve’iea ta vetoluvine Iudia ’inaya. ’Inega Iosefa mwaniniva ge nuana ina tauya di’we~nana ’inaya. Ta ve’wayoqega Yaubada vonea ina tauya di’we Galili ’inaya. ²³ ° Tuata Nasaleta ’inaya ive’abaga. ’Inega tovesimasimanayavo edi simana adi aqiaqi ’ifoqe vonaya, “Tauna ina gabea Nasaleta ’olotona.”

Ioni Togivebabitaio ena lugaihi (Maki 1:1-8; Luke 3:1-18; Ioni 1:19-28)

3 ¹ Tuta~nana Iesu Nasaleta ’inaya toatoa, ’inega Ioni Togivebabitaio ’ifoqe di’we ’ava’avanaya Iudia gamonaya lugaihi vonaya, ² ° “Emi ilivu luveifana ’idiega ona nuagivila, mana mahala ena ’Ebeluvine tuta goyona na’ifoqe.”

³ ° Lova tovesimasimana Aisea ba’e Ioni~nana weaqina simana vonaya,
“Bona taha vevegabagaba di’we ’ava’avanega vonaya,
‘Kaiwabu ena ’eda ona da’ea ta ona givetunuqia.’ ”

° **2:18** Iel 31:15; Nug 35:19 ° **2:18** Litieli “Rachel”- taudi Iakobo moqanena taha, ta veyolubedi qiduana. Taudi Iosefa ta Beniamina inadi. ° **2:23** Ais 11:1; 53:2; Lk 2:39; Ion 1:45 ° **3:2** Md 4:17; Mk 1:15 ° **3:3** Ais 40:3

⁴ Ta Ioni ana kaleko yubai kameli vutuvutudi 'inega, ta ana gadi'wana yubai 'wafidi 'inega, be ana 'abwagayavo wakifou ta wese mu'awa.

⁵ 'Inega tomtau Ielusalemege, be di'we Iudia ena 'ebeluvineyega ta wese go'ila Iolidani di'wenega 'abagadiavo 'idiega imai Ioni 'inaya. ⁶ E edi ilivu luveifadi isimana 'ifoqeyedi ta 'inega Ioni givebabitaisodi go'ila Iolidani 'inaya.

⁷ Ta Falisi be Sadusi qabudi wese imai sabi babitaiso, e Ioni 'itedi 'inega vonedia, "Omi'a 'idewani mwata natudiavo! Ta onuaia vonigo nawale Yaubada ana diavilavila 'inega ami fata ona dena, waisa? ⁸ Ta nugweta emi nuagivila ona ve'ita 'ifoqeyedi emi veilivu aqiaqi 'idiega. ⁹ Ge taumiega ona nuavane ta ona vonaya, 'Ita'a Ebelamo tubunavo, 'inega Yaubada nanuakolokoloyeda.' Gebu'e otaqa! Yavona aqiaqiemi, Yaubada ana fata ba'e dabodiavo 'idiega Ebelamo tubunavo naviaqidi. ¹⁰ Ta 'eguma ge ona veilivu aqiaqi, 'inega tuta goyona 'inaya Yaubada naluvematasabumi. 'Idewani 'aiwe, 'eguma ge davuaqa aqiaqi 'inega tomtau ina talaqi ta ina gabu yavulea.

¹¹ "Ta 'eguma ona nuagivila 'inega ya'a go'ilega ena givebabitaisomi. Ta vonahaqiaqi, nawale taha 'oloto 'abibodaguyega maimai, tauna veago va'inegu, 'inega ge agu fata ana 'aqeyafayafa ena 'avaledi. Tauna Niboana Gwalagwalana 'inega be wese 'aiwe saesaelina 'inega nagivebabitaisomi. ¹² Ta 'oloto ba'e ena daimayega witi nagivutuqidi be vuaqina aqiaqidi navedododi sailakaya, ta witi qainina 'aiwe 'ala'alata vatayana 'inaya nagabu yavuledi."

Ioni Togivebabitaiso Ieisu givebabitaisoya

(Maki 1:9-11; Luke 3:21-22)

¹³ 'Inega Galilegia Ieisu mai Ioni 'inaya sabi babitaiso Iolidani 'inaya. ¹⁴ Ta Ioni nuanuana Ieisu nahawatayea 'inega vonaya, "Ma'oda 'inega umai 'iguya be ena givebabitaisou, ta 'esi luaqiaqiea 'eguma o'a uda givebabitaisogu?"

¹⁵ Ta Ieisu Ioni ena vona ve'evivia vonaya, "Ge 'idewani una nuanua 'aiqa ta 'esi una givebabitaisogu, mana ba'e 'inega Yaubada ena nuanua aqiaqi kana 'abibodea." E 'inega Ioni Ieisu givebabitaisoya.

¹⁶ Gumwala, 'inega Ieisu go'ilega fweula, ta tuta~nana fweula 'inega mahala 'elalamia, 'inega Yaubada Niboanina 'itea webuwebui mai 'inaya, ana 'ita 'idewani malasi. ¹⁷ 'Inega bona taha mahalega 'ifoqe vonaya, "Ba'e Natu Otaqigu. Tauna weaqina yaqaiawa qiduana."

^t 3:4 2Kin 1:8 ^u 3:7 Md 12:34; 23:33 ^v 3:9 Ion 8:33,39; Lom 4:12 ^w 3:10 Md 7:19; Lk 13:6-9 ^x 3:11 Ion 1:26-27,33; Via 1:5 ^y 3:16 Ion 1:32 ^z 3:17 Same 2:7; Ais 42:1; Md 12:18; 17:5; Lk 9:35

Ieisu sitonova lobeia Seitani 'inega

(Maki 1:12-13; Luke 4:1-13)

4 ^{1a} 'Inega Yaubada Niboanina Ieisu 'ebe'ewei tauyea di'we 'ava'avaya be yaqisa Seitani nasitonovia. ^{2b} Ta 'aubena be velovana 40 gamodia Ieisu vedede 'ai 'inega, ta botana qiduana lutionia.

³ 'Inega tositonova 'ifoqe ta voneaya, "Eguma o'a Yaubada Natuna ba'e dabo diavona una vonedi be ina ve'abwaga."

^{4c} 'Inega Ieisu vonaya, "Buki Nugwenugweina ena simana vonaya, 'Gebu 'abwaga namo 'inega tomotau iula ina lobei yawaidi weaqina, ta 'esi Yaubada ena vonayavo qabudi wese 'idiega.' "

⁵ 'Inega Seitani Ieisu 'ebe'ewei tauyea 'Abaga Gwalagwalana Ielusalema 'inaya, 'inega ivane Vanue Gwalagwalana 'ubutetenaya, ^{6d} 'inega Seitani vonaya, "Eguma o'a Yaubada Natuna ba'e 'inega una fifieu ta gebu una veilage. Mana Buki Nugwenugweina simana vonaya,

'Yaubada ena tovale'ewayavo naluvinedi ina 'itamakiu', be wese vonaya,

'Nimadiega ina 'alagamoiu 'inega ge 'aqeu navelubai daboya.' "

^{7e} Ta Ieisu Seitani ena vona ve'iea vonaya, "Vona taha wese Buki Nugwenugweina 'inaya 'eno'eno vonaya,

'Eu Kaiwabu Yaubada ge una sitonovi!' "

⁸ 'Inega Seitani wese Ieisu 'ebe'ewei tauyea taha bwanaga qiduana debanaya, ta omo'e 'inaya bwa'obwa'o ena di'we qabudi adi 'ita aqiaqi otaqidi ve'itea, ⁹ ta sitonovia 'inega voneaya, "Eguma 'iawaguya una sobadi ta una iwa'odu ba'e yani diavona ena neiu."

^{10f} 'Inega Ieisu voneaya, "Seitani, unogegu! Buki Nugwenugweina gamonaya luvine 'eno'eno vonaya,

'Eu Kaiwabu Yaubada ana 'aidega otaqa una iwa'odu 'inaya, ta wese una vetofewa 'inaya.' "

¹¹ 'Inega Seitani Ieisu nogei tauya, ta 'abibodanaya Yaubada ena tovale'ewayavo i'ifoqe ta Ieisu ihiulea.

Ieisu ena fewa ve'alea di'we Galili 'inaya

(Maki 1:14-15; Luke 4:14-15)

^{12g} Tuta~nana Ieisu Ioni valena noqolia ni'au ia'uluguyea vanue 'ebeyoqona 'inaya, 'inega 'evivi tauya di'we Galili 'inaya. ¹³ 'Inega Nasaleta nogei ta mai ve'abaga Kafaneumi 'inaya, lavu di'wenaya. 'Abaga~nana gade Sebuloni be wese gade Nafitalai edi bwa'obwa'o. ¹⁴ Ba'e 'inega tovesimasimana Aisea ena vona adi aqiaqi 'ifoqe, vonaya,

^a 4:1 Ibe 2:18; 4:15 ^b 4:2 'Ifo 34:28 ^c 4:4 Luve 8:3 ^d 4:6 Same 91:11-12

^e 4:7 Luve 6:16 ^f 4:10 Luve 6:13 ^g 4:12 Md 14:3; Mk 6:17; Lk 3:19-20

15 ^h “Sebuloni ena gade ta wese Nafitalai ena gade edi
bwa’obwa’oyega
lavu ana ’eda tauya go’ila Iolidani mali di’wea,
ta bwa’obwa’o~nana di’we Galili ena ’ebeluvine gamonaya, ta
omo’e ’inaya taudi ge me Diu wese itoatoa.

16 Ta tomotau~dina velovelovana ’inaya itoatoa
ba’e ’itagana simatala qiduana tawa i’itea.
Taudi ’aliga ena ’abaga luveifana ’inaya itoatoa,
ba’e ’itagana simatala ni’au yayaqa ’idia.”

17 ⁱ Tuta omo’e ’inega Ieisu ena lugaihi ve’alea vonaya, “Emi ilivu
luveifadi ’idiega ona nuagivila, mana mahala ena ’Ebeluvine ni’a
vadi’wemi!”

Ieisu tolu’iqana gabedi
(Maki 1:16-20; Luke 5:1-11)

18 Taha tuta ’inaya Ieisu lavu Galili balabalanega luluvivila, e
’inega tolu’iqana magilafudi ma taina ’itedi igomagomana, taha ana
wawa Saimoni tauna wese igabea Fita, ta wese taina ana wawa
Anidulu. 19 Inega gabedi vonaya, “Omai, ona ’abibodegu, be ena
ve’itemi ma’oda tomotau ona ’ona ’aiqedi.” 20 Inega lukwayavonega
edi gomana inogedi ta Ieisu i’abibodea. 21 Inega wese Ieisu vavanaqo
togomana toidi ’itedi wagaya edi gomana i’iva’ava’aidi adi wawa
Iemesa be Ioni ma tamadi Sebedi. ’Inega Ieisu Iemesa ma taina
gabedi, 22 inega lukwayavonega edi waga be wese tamadi inogedi, ta
Ieisu i’abibodea.

Ieisu tomotau qabudi iuledi
(Luke 6:17-19)

23 ^j Ieisu luvivila di’we Galili ’abaganavo ’idia, ta edi vanue
tafwalolo ’idia lugaihi Vale Aqiaqina Yaubada ena ’Ebeluvine
weaqina, ta wese tomotau qabudi adi vihiqayavo ’idiega
giveaqiaqiedi. 24 ^k Ta Ieisu Valena yawala di’we Silia ’abaganavo ’idia.
’Inega tovevihiqayavo adi vihiqa taha taha ediavo imimiedi Ieisu
’inaya. Vaina ’wafidi ’idia yuvaqa qiduana, ta vaina niboana luveifana
ni’a lugu ’idia, ta vaina itafetafefwai, ta wese vaina veilae be vihiqa
give’enovidi imiedi. Ta Ieisu tovevihiqa diavona qabudi giveaqiaqiedi.
25 ^l Ba’e ’iuna ’inega yo’o qiduadi Ieisu itala’obe dadanea Galili ’inega
be, Dikafoliega be, Ielusalemega be, Iudiayega ta wese Iolidani mali
di’wenega.

^h 4:15-16 Ais 9:1-2 ⁱ 4:17 Md 3:2; 10:7 ^j 4:23 Md 9:35; Mk 1:39; Via 10:38

^k 4:24 Mk 6:55 ^l 4:25 Mk 3:7-8

Ieisu ena ve'ita bwanagaya

(Madiu 5:1–7:29)

5 ¹ Ieisu qabu qiduadi 'itedi, 'inega 'watovu bwanagaya ta omo'e 'inaya toabui, ta ana to'abibodayavo wese i'watovu 'inaya. ² Inega Ieisu ve'ale ve'itedi vonaya,

Qaiawa vataya weaqina

(Luke 6:20-23)

- ^{3 m} “Aiqabu nuanuadi 'ena'ina Niboana Gwalagwalana naluveagatuna'idi ina qaiawa,
mana mahala ena 'Ebeluvine taudi weaqidi.
^{4 n} Aiqabu ba'itaga me edi dou nawale ina qaiawa,
mana Yaubada nalu'ai'aiedi.
^{5 o} Aiqabu edi ilivu nuvana ina qaiawa,
mana nawale Yaubada bwa'obwa'o qabuna naneidi.
^{6 p} Aiqabu nuanuadi ilivu aqiaqina be tunutunuqina nave'ena'i 'idia
ina qaiawa,
mana Yaubada ilivu~nana nagive'ifoqeyea 'idia.
⁷ Aiqabu tonuakolokolo ina qaiawa,
mana Yaubada wese nanuakolokoloyedi.
⁸ Aiqabu giwalidi vunavunaqidi ina qaiawa,
mana nawale Yaubada ina 'itea.
⁹ Aiqabu togivenuadaumwala ina qaiawa,
mana nawale Yaubada na'awanatunedi.
^{10 q} Aiqabu vita ilobelobea tomotau 'idiega edi fewa tunutunuqina
Yaubada weaqina e ina qaiawa,
mana nawale mahala ena 'Ebeluvine 'inaya ina lugu.
^{11 r} “Ta 'eguma tomotau ina vegilemi be vita taha taha ina give'ifoqeyea
'imia ta wese u'vega ina 'awaluveifemi mana omi'a agu to'abibodayavo,
e 'inega tua omi'a ona qaiawa. ^{12 s} Luaqiaqiemi be ona qaiawa qiduana,
mana ami ve'ia 'ena'ina mahalaya 'eno'enova. Mana ba'e ilivu diavona
tomotau lova wese iviaqia Yaubada ena tovesimasimanayavo 'idia.

Ve'ita mwade'wa be simatala weaqina

(Maki 9:50; Luke 14:34-35)

¹³ “Omi'a 'idewani mwade'wa totoa bwa'obwa'o weaqidi. Ta ona nuaia, 'eguma mwade'wa nu'wana nagumwala ge wese ana fata navedibidibi 'evivi, waisa? Inega nagibwa ta kana guiwaqa yavulea ta tomotau ina vavefwayefwayea.

^m 5:3 Ais 57:15 ⁿ 5:4 Ais 61:2-3; Ve 7:17 ^o 5:5 Same 37:11 ^p 5:6 Ais 55:1-2 ^q 5:10 1Fit 3:14
^r 5:11 1Fit 4:14 ^s 5:12 2Yani 36:16; Via 7:52

^{14 t} “Ta wese omi’a kavonaya simatala totoa bwa’obwa’o weaqidi. Vonahaqiaqi, omi’a kavona taha ’abaga simasimalatalina bwanaga debanaya, ta ’abaga~nana tomotau qabudi adi fata ina ’itea. ^{15 u} Ta ’eguma lamufa ni’a kagabuya ’inega gebu ’ulena gamonaya kana talakabubui, ta ’esi luaqiaqiea be ’ebea’u debanaya kana a’uya ta ’inega vanue gamona nasimalata aqiaqiea. ^{16 v} Ta omi’a wese ’idewanina luaqiaqiemi be emi ilivu simasimalalidi ona ve’itayedi tomotau ’idia, be yaqisa ina ’itedi ta Tamami mahalaya ina awatuboya.

Ve’ita luvine weaqina

^{17 w} “Ge ona vonaya be ya’a yamai Mosesena ena luvine ta wese tovesimasimana edi ve’ita sabi ’ewa yavulidi. Ta ’esi yamai sabi give’ifoqe aqiaqiedi. ^{18 x} Vonahaqiaqi, mahala be bwa’obwa’o ina awala, ta ge taha yani goyosikwa otaqina luvine gamonega nahawala ana laba Yaubada ena nuanua na’ifoqe luvine~nana ’inega. ^{19 y} Ta ’eguma togama luvine~dina ’idiega taha yani goyosikwana nanogea be tomotau wese ’idewani nave’itedi ina viaqia, ’inega tauna ana wawa navegoyo otaqa mahala ena ’Ebeluvine gamonaya. Ta ’esi ’eguma taha toga luvine~dina namatayaga aqiaqiedi ta nave’itayedi tomotau ’idia, e tauna ana wawa naveqidua mahala ena ’Ebeluvine gamonaya. ²⁰ Ta wese yavonemi, ’eguma omi’a emi ilivu ge naveaqiaqi va’ine taudi Falisiavo be luvine ana tove’itayavo edi ilivu ’idiega, e ’inega ge ami fata mahala ena ’Ebeluvine ’inaya ona lugu.

Ve’ita diavilavila ta luve’aliga weaqina

(Luke 12:57-59)

^{21 z} “Luvine ’itu’ituwaina tubudavo edi tutaya ni’a onoqolia vonaya, ‘Ge una luve’aliga. Ta ’eguma taha toga una luve’aligia nawale luvine una lobe.’

^{22 a} “Ta ya’a yavonemi ’eguma taha toga taina ’inaya nanualuveifa luvine nalobe. Ta wese ’eguma taha toga iana na’awaluveifea luvine nalobe kaniselayavo ’idiega. Ta wese ’eguma taha toga iana navona ve’alatea, e nawale nalugu ’aiwe ’ala’alata ’inaya. ^{23 b} ’Inega ’eguma eu nei kavovo umimiea ’ebeveguba Yaubada ’inaya sabi a’una, ta taiu ena luveifana ’iuya unuaia, ^{24 e} ’inega luaqiaqieu eu nei kavovo una a’uya ’ebeveguba di’wenaya ta una madutauya taiu ’inaya be maega ona veiana ’evivi. ’Inega ’abiboda una ’evivi mai be eu nei kavovo una a’uya ’ebeveguba~nana ’inaya.

²⁵ “Inega ’eguma voalau natauyeu toluvine matanaya kotu weaqina, ’inega nugweta lukwayavonega ona madugivetunuqia maega. Ta

^t 5:14 Ion 8:12; 9:5 ^u 5:15 Mk 4:21; Lk 8:16; 11:33 ^v 5:16 Efe 5:8-9; 1Fit 2:12

^w 5:17 Lom 3:31 ^x 5:18 Lk 16:17; 21:33 ^y 5:19 Iem 2:10 ^z 5:21 ’Ifo 20:13; Luve 5:17

^a 5:22 1Ion 3:15 ^b 5:23 Mk 11:25

'eguma gebu, nawale voalau natauyeu toluvine 'inaya be toluvine~nana nave'ineieu vanue 'ebeyoqona ana to'itamaki 'idia, ta ina fela luguyeu vanue~nana 'inaya. ²⁶ Ta ge wese ina awafeleu be una 'ifoqe ana laba au aga una vemaissa 'ovoia.

Ve'ita luabu weaqina

^{27c} “Luvine 'itu'ituwaina ni'a onoqolia vonaya, 'Ge ona luabu!’ ²⁸ Ta ya'a yavonemi 'eguma taha 'oloto vaqivaqina vavine na'itea ta nuanega nainabo 'waivea, e 'inega tauna giwalinega luabu ni'a viaqia. ^{29d} 'Inega 'eguma matau au 'ataqiega nagivebe'uyeu, 'inega una giou yavulea. Mana ge taha yani qiduana 'eguma 'wafiu du'una ta'a mona una 'ita'vea. Ta vonahaqiaqi, yani luveifa otaqina 'eguma mabubuyau ina felaweuiieu 'aiwe 'ala'alata 'inaya. ^{30e} Wese 'idewani 'eguma nima 'ataqiu nagivebe'uyeu, 'inega una da'a yavulea. Mana ge taha yani qiduana 'eguma 'wafiu du'una ta'a mona una 'ita'vea. Ta vonahaqiaqi, yani luveifa otaqina 'eguma mabubuyau ina fela webuiieu 'aiwe 'ala'alata 'inaya.

Ve'ita sa'ila weaqina

(Madiu 19:9; Maki 10:11-12; Luke 16:18)

^{31f} “Luvine 'itu'ituwaina wese vonaya,

“Eguma taha toga nuanuana moqanena nasa'iledi, 'inega sa'ila ana leta namadu'wayavia ta moqanena naneidi.’

^{32g} “Ta yavonemi, 'eguma taha 'oloto nuanuana moqanena nasa'iledi ta taudi ge luabu ida viaqi mali 'oloto maega, e 'inega 'oloto~nana ni'a luveifana viaqia 'eguma taudi ina vaqi ukamana 'oloto vauvauna 'inaya, e 'inega 'oloto vauvaunana wese luabu ilivuna viaviaqia.

Ve'ita vona fofofola weaqina

^{33h} “Wese ni'a onoqolia luvine 'itu'ituwaina vonaya,

“Eguma Yaubada 'inaya ovona fofofola, gebu emi vona diavona ona qeunidi ta 'esi ona 'itamakidi be ona viaqidi.’

³⁴ⁱ “Ta ya'a yavonemi, ge ona vona fofofola mahala 'inega, mana oa'ena Yaubada ena 'ebetoa. ^{35j} Ta wese gebu bwa'obwa'o 'inega ona vona fofofola, mana ba'ena Yaubada 'aqena ana 'ebea'u, be wese gebu Ielusalema 'inega, mana 'abaga omo'ena Kini qiduana ena 'abaga. ³⁶ Wese gebu 'unu'unumi 'inega ona vona fofofola, mana ge ami fata debami 'aidegana ona givilei be nalu'wadaeyei nage nalukwausi. ³⁷ Eguma taha yani ami fata ona viaqia 'inega ona vona “Ao’, ta 'eguma ge ami fata

^c 5:27 'Ifo 20:14; Luve 5:18 ^d 5:29 Md 18:9; Mk 9:47 ^e 5:30 Md 18:8; Mk 9:43

^f 5:31 Luve 24:1-4; Mk 10:4 ^g 5:32 1Kol 7:10-11 ^h 5:33 Luve 23:21; Luvi 19:12;

Naba 30:2 ⁱ 5:34 Ais 66:1; Iem 5:12; Md 23:22 ^j 5:35 Same 48:2; Ais 66:1

'inega ona vona 'Gebu'. Mana 'eguma emi vona nave'eala e vona~nana Seitani 'inega.

Ve'ita mebu weaqina

(Luke 6:29-30)

38^k “Ni'a onoqolia luvine 'itu'ituwaina vonaya,

“Eguma taha toga matau naluveifea 'inega wese matana una luveifea. Wese 'eguma taha toga alau na'aumwedia 'inega o'a alana una 'aumwedia.’

39 “Ta ya'a yavonevonemi, 'eguma taha toga ilivu luveifana 'iuya naviaqia ge nimana una ve'iei. Ta 'inega 'eguma togama 'ae'aeu navunuqia, 'inega una awafelei ta wese di'wenega navunuqia. 40 Ta wese 'eguma togama ena nuenuega na'ebe'eweu natauyeu vetala'ai 'inaya ta au kaleko na'ewea, e 'inega wese au kwakwalufai una awafelei na'ewea. 41 Wese 'eguma taha toga naluvineu ena kulufa una 'avala ona tauya taha 'abaga 'inaya, e 'inega wese una awafeleu be 'abaga vemagilafuna 'inaya maega ona tauya. 42 Ta wese 'eguma taha toga 'iuya navenoqi taha yani weaqina 'inega yani~nana una neia, ta gebu una vegagalei.

Ada aviayavo kana veyolubedi

(Luke 6:27-28,32-36)

43^l “Luvine 'itu'ituwaina ni'a onoqolia vonaya,

“Emiavo ona veyolubedi, ta ami aviayavo ona vevoalanedi.’

44^m “Ta ya'a yavonemi voalamiavo ona veyolubedi, ta wese taudi iveaviemi weaqidi ona venoqi. 45 Ba'e 'inega Tamami mahalaya na'awanatunemi, mana tauna veyoluba 'iuna be 'inega tauna ena baba'au nagiveyayaqia toaqiaqidi ta wese toluveifadi 'idia, ta wese 'wei awafelea taudi tunutunuqidi ta wese ge tunutunuqidi 'idia. 46 Ta 'eguma emiavo dimo ona veyolubedi ge ana fata ve'ia Yaubada 'inega ona 'ewei, mana takesi ana to'ewa wese ediavo iveyolubedi. 47 Ta wese 'eguma emiavo dimo ona veiaianedi, 'inega ge ami ve'ia ona 'ewei, mana vaina tomotau Yaubada ge ida vetumaqanea taudi wese ediavo iveiaianedi. 'Inega taudi be omi'a emi ilivu lelelea. 48ⁿ Ta omi'a luaqiaqiem be emi ilivu naveaqiaqi otaqa 'idewani Tamami mahalaya.”

Ve'ita nei kavovo weaqina

6 1^o Ta Ieisu wese vonaya, “Eu nei kavovo ge una a'uya tomotau matadia, mana 'eguma 'idewani una viaqa 'aiqa 'inega ge taha ve'ia Tamau mahalaya naneiu. 2 'Inega tuta~nana ona nei kavovo ge ona

^k 5:38 'Ifo 21:24; Luvi 24:20; Luve 19:21 ^l 5:43 Luvi 19:18 ^m 5:44 'Ifo 23:4-5; Lk 23:34; Via 7:60; Lom 12:14,20 ⁿ 5:48 Luvi 19:2; Luve 18:13 ^o 6:1 Md 23:5

vevonavonayei 'idewani togagasa, mana taudi vanue tafwalolo gamonaya nage 'abagaya ineinei kavovo, ta 'abiboda tomotau 'idia ivonavonayea, mana nuanuadi tomotau ina awatubodi. Vonahaqiaqi, tawa adi ve'ia i'ewa vatayea ba'idia. ³Ta 'inega omi'a 'waivega ona nei kavovo lukwalukwa 'idia. ⁴'Inega tomotau emi nei kavovo ge ina 'itei, ta Tamami ana 'aidega tauna 'ita kwaivemi ni'a alamania, 'inega 'abiboda ve'ia aqiaqina naneimi."

Ve'ita noqi weaqina

(Luke 11:2-4)

⁵^p Ta wese Iesu vonaya, "Tuta~nana ona noqi Yaubada 'inaya ge tou'ava ona vetutumedi, mana taudi nuanuadi vanue tafwalolo gamonaya wese 'abagaya tomotau matadia ina ya'itoto be ina noqi, 'inega tomotau ina awatubodi. Vonahaqiaqi, adi ve'ia ni'a i'ewa vatayea.

⁶"Ta 'esi o'a, tuta~nana una noqi nugweta una lugu eu vanue gamonaya ta 'awa una bagini, be 'inega 'waivega una venoqi Tamau 'inaya. 'Inega tauna 'waivega 'iteuya nawale ve'ia aqiaqina naneiu. ⁷^q Ta wese tuta~nana unoqinoqi ge eu vona una lu'evi'eviviei 'idewani taudi totoa velovelovana iavoavo kavokavovo. Taudi ivonaya be edi vona kuekuena 'inega ve'ia aqiaqina ina lobe. ⁸^r Gebu taudi 'aqedi ona talaqi, mana ami vitayavo Tamami madualamanidi ta 'abiboda weaqidi ononoqi.

⁹⁻¹³ ^s "'Inega ba'idewani ona noqi 'aiqa:

Tamama, utoatoa mahalaya.

Au wawa gwalagwalana ana 'amayabea.

Nuanuama una luvinema.

Nuanuama totoa bwa'obwa'o eu nuanua ana viaqidi,

'idewani totoa mahala eu nuanua iviaviaqidi.

Nuanuama ama 'abwaga tuta qabuna una neima.

Ta ema luveifana una nuataqodi,

'idewani ima'a tomotau iveilivu veifa 'imaya anuataqodi.

'Ebeu'ava 'inaya gebu una awafelema,

ta nuanuama toluveifana 'inega una vabodebodema.

¹⁴ ^t 'Eguma omi'a tomotau edi luveifana 'imia ona nuataqodi 'inega Tamami mahalaya wese emi luveifana nanuataqodi. ¹⁵Ta 'eguma tomotau edi luveifana 'imia ge ona nuataqodi 'inega wese Tamami emi luveifana gebu nanuataqodi.

^p 6:5 Md 23:5; Lk 18:10-14 ^q 6:7 1Kin 18:25-29 ^r 6:8 Md 6:32 ^s 6:9-13 Lk 22:42; Md 18:21-35; Lk 22:40; Iem 1:13; Ion 17:15; 2Te 3:3; 2Tim 4:18 ^t 6:14 Mk 11:25-26

Ve'ita vedede weaqina

^{16u} “Tuta~nana ona vedede 'ai 'inega be yaqisa Yaubada namai di'wemia, 'inega ge ami 'ita ona givedumedumei tou'ava 'idewani, mana taudi nuanuadi adi 'ita dawalilina 'inega tomotau ina alamania vonigo taudi ivevedede. Vonahaqiaqi, taudi adi ve'ia tawa i'ewea. ¹⁷Ta 'esi tuta~nana ona vedede 'inega 'iawami ta wese debami dede'wega ona 'abia, ¹⁸'inega tomotau emi vedede gebu ina alamania, ta 'esi Tamami ge ana 'itamo emi viaqa qabuna 'wai'waividi 'ite'itedi, e 'inega tauna nawale ve'ia aqiaqina naneimi.

Ve'ita mahala ana kaikaiwabu weaqidi

(Luke 12:33-36)

^{19v} “Emi kulufa kaikaiwabudi ge ona luveaqedi bwa'obwa'oya, mana kwamukwamu be ganagana ina luveifedi, ta wese tovanawala vanue ina baia ina lugu ta kulufa diavona ina vanawalidi. ^{20w} Ta 'esi emi kaikaiwabuyavo mahalaya ona luveaqedi, mana omo'e 'inaya kwamukwamu be ganagana ta wese tovanawala ge adi fata ina luveifedi. ²¹ Ta ona nuave'avinia ma'inaya emi kaikaiwabu 'eno'eno, e omo'e 'inaya emi nuanua wese natautauya.

'Wafi ana simatala

²² “Matami kavona lamufa 'wafimi weaqina. Ta 'eguma matami aqiaqidi, e 'inega wese 'wafimi qabuna nasimatala. ²³ Ta 'eguma matami naluveifa 'inega wese 'wafimi qabuna navelovanea. Ta 'eguma lamufa~nana na'weu 'inega nawale velovana qidua otaqina na'ifoqe.

Ge ona nuanua vaina yani weaqina

(Luke 16:13; 12:22-31)

²⁴ “Ge taha toga ana fata navetofewa kaiwabu magilafudi 'idia. 'Inega taha nanogei ta taha naveyolubea. Ta wese taha na'awahaqiaqiea ta taha na'awaluveifea. 'Inega ge taha toga ana fata navetofewa Yaubada ta wese bwa'obwa'o ana kaikaiwabu 'idia.

^{25x} “'Inega yavonemi, ge ona nuanua emi toa bwa'obwa'oya weaqina, 'idewani 'abwaga be go'ila ta wese 'wafimi ana kaleko weaqidi. Mana yawaimi yani 'ena'ina, ta kulufa diavona 'wafi weaqina ge yani 'ena'ina. ^{26y} Ona nuaidi manu, ge ida vaoqa, ta ge wese ida bolimana, ta wese ge edi sailakamo. Manuqa yani goyona, ta tuta qabuna Tamami mahalaya veve'ainidi. Ta omi'a yani 'ena'ina Yaubada 'inaya, 'inega wese ana fata nave'ainimi.

^u 6:16 Ais 58:5-9 ^v 6:19 Iem 5:1-3 ^w 6:20 Md 19:21; Lk 18:22 ^x 6:25 Fil 4:6; 1Tim 6:6-8; 1Fit 5:7 ^y 6:26 Md 10:29-31; Lk 12:6-7

27“Ge taha toga ana fata ena toa bwa’obwa’oya nagivekuei ena nuanuayavo ’idiega. 28’Inega tola’ai weaqina onuanua qiduana ami kaleko weaqidi? Taha wese ’ebe’ita libi idina edi tabo weaqina ona nua’ivinidi, mana gebu ida fewafewa ta wese gebu adi kaleko ida viaviaqidi. 29^z Ta yavona aqiaqiemi, toluvine qiduana kaikaiwabuna Solomononi ana kaleko ta wese ana ’ivala adi ’ita aqiaqina, ta libi idina adi ’ita aqiaqi otaqina. 30’Inega ona nuaia Yaubada ena ’itamaki weaqimi. ’Itaga Yaubada libi idina ve’ivalidi aqiaqina ka’itedi, ta ’ibe namwatuqu ’inega tomotau ina tuinidi. Ta omi’a libi oveaqiaqi va’inedi, ’inega vonahaqiaqi ami kaleko naneimi. ’Inega tola’ai weaqina emi vetumaqana Yaubada ’inaya goyona?

31“’Inega ge ona nuanua ta ona vonaya, ‘Tola’ai kana ’ai, be tola’ai kana numa ta wese tola’aiega kana vekaleko?’ 32^a Vona ba’ena ’idewani taudi velovelovanaya itoatoa edi vona. Ta ba’e yani diavona weaqidi ge onuanua, mana Tamami mahalaya ni’a alamani aqiaqiedi. 33^b ’Inega nugweta Yaubada ena ’Ebeluvine ona salia ta wese ena ilivu tunutunuqina ona ’abibodei ’inega yani diavona Yaubada naneimi.

34“’Inega ge ona nuanua ’ibe weaqina, mana ’ibe ’aubena~nana ana vita dumadumana, e ’inega ba’itagana ana vitayavo be ana nuanuayavo bena’e ta’iwa ami ’etofwafwa.

Ve’ita ’awaluveifa weaqina

(Luke 6:37-38,41-42)

7 1^c “Gebu tomotau ona ’awaluveifedi fole nawale Yaubada wese na’awaluveifemi, 2^d mana toyani weaqina tomotau ona ’awaluveifedi ’inega nawale Yaubada wese ’idewani na’awaluveifemi. Ta wese ma’oda ona veilivu ’aiqa tomotau ’idia nawale Yaubada wese ’idewana naveilivu ’aiqa ’imia. 3Ta tola’ai weaqina taiu matana ’inaya ’aiwe kismanina weaqina uvonavona ta o’a tau’u matauya kigabugabu ’eno’enova ta ge uda ’itea? 4’Inega ge daluaqiaqieu be taiu una vonei ’aiwe kismanina matanega una ’ewa yavulea, mana o’a matauya kigabugabu ’eno’enova. 5O’a taha tou’ava, nugweta matauyega kigabugabuna una ’ewa yavulei ta ’inega una ’ita aqiaqi, ta ’abiboda taiu matanega kismanana una ’ewei ta una felea. 6’Eguma taha yani aqiaqina kedewa kana neidi, nawale ina luveifea ta wese ina ’uteda. Ta wese ’idewani ami bagi gebu bawe ona neidi mana nawale ina vavefwayefwayea. Ta wese ’idewani Yaubada ena yani aqiaqina ge ona neidi tovegwavu’ai ’idia mana nawale ina veyani kavokavovoyedi.

^z 6:29 1Kin 10:4-7; 2Yani 9:3-6 ^a 6:32 Md 6:8 ^b 6:33 1Kin 3:11-14; Same 37:4,25; Lom 14:17 ^c 7:1 Lom 2:1; 1Kol 4:5; Iem 4:11-12 ^d 7:2 Mk 4:24

Una noqi 'inega Yaubada naneiu
(*Luke 11:9-13*)

^{7e} “Ona venoqi 'inega Yaubada naneimi, ta wese ona sali 'inega ona lobe, ta wese ona 'auveida'a 'inega 'awa na'ewa'ea weaqimi. ^{8f} Mana tomeqabu inoqinoqi Yaubada naneidi, ta tomeqabu isalisali nawale ina lobe, ta wese tomeqabu 'awaya i'au'auveida'a nawale na'ewa'ea weaqidi. ⁹ Ta ma'oda omi'a 'eguma natumiavo 'abwaga weaqina inoqinoqi 'imia nage dabo ona neidi? ¹⁰ Ta wese 'idewani 'eguma 'iqana weaqina inoqinoqi 'imia nage bunelala ona neidi? Gebu'e otaqa! ^{11s} Vonahaqiaqi, omi'a luveluveifami ta natumiavo 'idia ni'au oalamanania yani aqiaqi dimo ona neidi, 'inega ona alamani aqiaqiea tomeqabu inoqinoqi Tamami mahalaya ena 'iwavo aqiaqi otaqina naneidi. ^{12h} Ta tola'ai nuanuami tomotau ina viaqia 'imia, e wese omi'a 'idewana ona viaqa 'aiqa 'idia. Mana ba'e ilivu nana ana viaqa 'inega Mosese be tovesimasimanayavo edi luvineavo adi alamani oveve'itayea.

'Awa ta 'eda magilafudi weaqidi
(*Luke 13:24*)

¹³ “Awa sadana 'inega ona lugu ta gebu 'awa bababana 'inega. Ta 'awa bababana wese ana 'eda bababana, 'inega tomotau qabudi 'awanegana ilugulugu ta itautauya. Ta ba'e 'eda~nana 'ebeveilae ana 'eda. ¹⁴ Ta yawai aqiaqina ana 'awa goyona ta ana 'eda sadana, 'inega tomotau 'evisa dimo ba'e yawai~nana ilobelobe.

'Aiwe ta vuaqina
(*Luke 6:43-44*)

¹⁵ⁱ “Ona 'itamakimi tovesimasimana 'e'eu'au'avidu weaqidi, mana nawale ina mai 'imia kavona sifi gumegumeidi 'idewana, ta 'esi gamodia 'idewana yubai sasasadi. ^{16j} Ta edi fewayavo 'idiega nawale ona alamanidi, mana talitali gebu ana fata be vuaqina navenaqo'ai, ta wese 'ue 'idewana gebu ana fata be vuaqina nave'ala'ai. ¹⁷ Ta wese 'idewani 'aiwe aqiaqidi wese vuaqidi aqiaqidi, ta 'aiwe veifadi vuaqidi wese veifadi. ¹⁸ Vonahaqiaqi, 'aiwe aqiaqidi ge ana fata vuaqa veifadi ina vuaqayei, ta wese 'aiwe veifadi 'idewana ge ana fata vuaqidi aqiaqina ina vuaqayei. ^{19k} 'Inega 'eguma taha 'aiwe ge davuaqa aqiaqi kana talaqa yavulei be kana gabuya. ^{20l} 'Idewana wese tovesimasimana luveifadi vuaqidi 'idiega ana fata ona alamanidi.

^e 7:7 Mk 11:24; Ion 14:13; 15:7; 16:23-24 ^f 7:8 1Ion 3:22; 5:14-15 ^s 7:11 Iem 1:17

^h 7:12 Md 22:39-40; Lk 6:31; Lom 13:8-10 ⁱ 7:15 Md 24:24; Via 20:29; 2Fit 2:1

^j 7:16 Gal 5:19-22; Iem 3:12 ^k 7:19 Md 3:10; Lk 3:9; Ion 15:6 ^l 7:20 Md 12:33

To'abiboda ge aqiaqidi weaqidi

(Luke 13:25-27)

21^m “Tomotau 'eala i'awa'awa Kaiwabuyegu, ta 'idiega ge qabudi ina lugu mahala ena 'Ebeluvine 'inaya, ta 'esi aqabu Tamagu mahalaya ena nuanua imatamatayagea e taudina adi 'aidega ina lugu. 22 Vona Vetala'ai ana tuta 'inaya tomotau 'eala ina vonaya, 'Kaiwabu, afewa weaqiu ta au wawega asimana ta wese niboana luveifadi tomotau 'idiega a'wavi 'ifoqeyedi, ta wese fewa 'ebenuavoqana 'eala aviaqidi.’ 23ⁿ 'Inega ena vonedi, 'Omi'a toluveifami, otauya! Ya'a ge taha ana tufwa eda alamanimi!”

Ve'ita vanue ana to'eyoqona weaqidi

(Luke 6:47-49)

24 Ta wese Ieisu vonedi vonaya, “Vona diavona yaveveqaeeyedi 'eguma aqabu ina noqolidi ta ina viaqidi, e 'inega taudi 'idewana taha to'eyoqona ena vanue nayoqonia ena alamani aqiaqi 'inega. Nugweta ena avutugu aqiaqina navenua'ivinia ta wese ena 'oqola falafaladi 'idewana agumo naluda'edi. Ta 'inega bwa'obwa'o aqiaqinaya navetovolodi ta vanue~nana nayoqonia. 25 E 'inega 'eguma 'wei na'wei ta seuseu nainoqa ge nayagwei. Ta wese 'eguma yaqina natoa ge ana fata vanue~nana nabuini, mana bwa'obwa'o falafalana ta wese 'oqola aqiaqidi ta waiwai. 26 Ta 'eguma aqabu egu vona inoqonoqolidi ta ge ida viaqidi, e 'inega taudi 'idewani to'eyoqona veifa, mana to'eyoqona~nana ge ena avutugu davenua'ivina aqiaqiei ta wese ena 'oqolayavo gebu 'aiwe falafaladi. 27 Ta wese vanue~nana yoqonia gelasaya ta go'ila di'wenaya, 'inega tuta~nana 'wei 'ena'ina nawebui ta seuseu nainoqa be wese yaqina natoa, 'inega vanue~nana na'ava qeunia.”

28 Tuta~nana Ieisu ena ve'ita ba'e lu'ovoidi 'inega tomotau qabudi nuadi voqana qiduana, 29^o ta ivonaya, “Luvine ana tove'itayavo edi ve'ita dawalilina, ta 'esi ba'e 'oloto nana me ena luvine ta wese me ena waiwai veve'ita.”

Ieisu 'oloto 'wago'wagoina giveaqiaqiea

(Maki 1:40-45; Luke 5:12-16)

8 1 Tuta~nana Ieisu bwanagega webui mai 'inega qabu qiduadi i'abibodea. 2 'Inega taha 'oloto 'wago'wagoina mai Ieisu 'inaya tuqatuqanega sobadi 'iawanaya ta vonaya, “Kaiwabu, 'eguma eu nuanua 'inega una giveaqiaqiegu, mana o'a au fata.”

3 'Inega Ieisu nimana si'otoia ta 'oloto~nana 'wafina gitonovi ta vonaya, “Aqiaqina, eu nuanua ena viaqia, uvevunavunaqa ta uveaqiaqi!”

^m 7:21 Lk 6:46; Iem 1:25 ⁿ 7:23 Same 6:8; 2Tim 2:19 ^o 7:29 Mk 1:22; Lk 4:32

'Inega lukwayavonega veaqlaqi. ^{4p} 'Inega Ieisu vonea vonaya, "Una tauya, ta ge taha toga 'inaya una vesimasimanei tola'ai ni'a yaviaqa 'iuya, ta 'esi tunutunuqina una tauya toveguba 'idia una ve'itayeu ta ina 'awahaqlaqieu, 'inega eu nei kavovo Yaubada 'inaya una a'ui 'idewani Mosese ena luvine vonavona. 'Inega nei kavovo~nana nave'ebe'ita tomotau 'idia ta ina alamania vonigo ni'au uveaqlaqi."

Ieisu toluavia adi tovmatana ena tofewa giveaqlaqiea

(Luke 7:1-10)

⁵Ta Ieisu ni'a 'ifoqe 'abaga Kafaneumi 'inaya, 'inega taha toluavia me Loma adi tovmatana mai Ieisu 'inaya ta venoqlaea vonaya, ⁶"Kaiwabu, taha egu tofewa vihiqa qiduana 'ewea ta vanuea lulumutula. Ta 'wafinaya visiqa 'ena'ina, ta wese ge ana fata nawayaqa."

⁷'Inega Ieisu voneaya, "Aqlaqina, ena wai ta ena giveaqlaqiea."

⁸'Inega tovmatana~nana Ieisu ena vona ve'iea vonaya, "Kaiwabu, ge wese daluaqlaqiegu be una mai egu vanuea, ta 'esi una vonamo be 'inega egu tofewa naveaqlaqi 'evivi. ⁹Mana ya'a wese egu tovmatana qiduquduadi 'ayadia yatoatoa, ta edi vona ya'abi'abibodea, ta wese ya'a egu toluaviayavo 'ayaguya itoatoa ta yaluviluvinedi. 'Inega 'eguma togama 'inaya ena vonaya, 'Utauya!' e natauya. Ta wese 'eguma togama 'inaya ena vonaya, 'Umai!' e 'inega namai, ta wese 'eguma egu tofewa 'inaya ena vonaya, 'Ba'e uviaqi!' e 'inega naviaqla."

¹⁰Tovmatana~nana ena vona 'inega Ieisu nuana voqana aqlaqi, 'inega ana to'abibodayavo qabudi vonedi, vonaya, "Vonahaqlaqi, ge taha toga me Isileli 'imiega eda 'ita lobei ena vetumaqana ba'e 'idewani. ^{11q} Ta yavonemi nawale tomotau 'eala di'we qabudi 'idiega ina va'auta Ebelamo be Aisake ta wese Iakobo maega Yaubada ena 'Ebeluvine sagalina 'inaya. ^{12r} Ta aiquabu lova Yaubada venua'ivinidi ena 'Ebeluvine ana lugu weaqina nawale ge ina lobei, ta 'esi Yaubada ena tovale'ewayavo ina fela webuiedi 'abaga velovelovanina 'inaya. Omo'e 'inaya ina dou ta aladi navetalakikokiko."

¹³'Inega Ieisu tovmatana~nana voneaya, "U'evivi utauya eu vanuea, ta eu tofewa naveaqlaqi eu vetumaqana 'inega." Ta tuta~nana 'inaya tofewa~nana ni'a veaqlaqi 'evivi.

Ieisu tomotau qabudi giveaqlaqiedi

(Maki 1:29-34; Luke 4:38-41)

¹⁴'Inega Ieisu tauya Fita ena vanuea ta lugu, 'inega Fita lawana 'itedi 'wafidi lu'wea'weava ta 'ivia i'eno'eno. ¹⁵Ta Ieisu tovevihiqa~dina nimadi gitonovia, 'inega 'atuvulihidi. 'Inega iya'itoto ta 'abwaga i'iva'ava'aia Ieisu weaqina.

^p 8:4 Luvi 14:1-32; Md 9:30; Lk 17:14 ^q 8:11 Lk 13:29 ^r 8:12 Md 22:13; 25:30; Lk 13:28

¹⁶ Mata'au lavilavi 'inaya tomotau ediavo imiedi Ieisu 'inaya, taudi niboana luveifadi ni'a i'wahalidi. 'Inega Ieisu ena vonega 'wavi 'ifoqeyedi, ta wese tovevhiqa qabudi giveaqiaqiedi. ^{17s} Ieisu ena viaqa ba'e 'inega tovesimasimana Aisea ena vona ana aqiaqi 'ifoqe vonaya,
 "Tauna eda visiqa be wese ada vihiqayavo 'ewa yavuledi."

Tomotau nuanuadi Ieisu ina 'abibodea ta ge adi fata
(Luke 9:57-62)

¹⁸ Tuta~nana Ieisu tomotau qabudi 'itedi itoa vivilia 'inega ana to'abibodayavo vonedi ina luvivila lavu di'wenaya. ¹⁹ 'Inega taha luvine ana tove'ita mai Ieisu 'inaya ta voneaya, "Tove'ita, ma'inaya utautauya nuanuagu be ena 'abibodeu."

^{20 t} 'Inega Ieisu tomotau~nana ve'iea vonaya, "Bwadu'e ma adi vetoa ta wese manu ma adi nevuqa, ta ya'a Tomotau Natuna ge taha egu 'ebeveyawaimo."

^{21 u} Wese to'abiboda taha mai Ieisu 'inaya ta vonaya, "Kaiwabu, nuanuagu ena 'abibodeu ta nugweta una awafelegu be tamagu ena ba'eyei yawaina nagumwala ta ena tavunia, e 'inega ena 'abibodeu."

²² 'Inega Ieisu ve'iea vonaya, "Aqiaqina u'abibodegu, ta tomeqabu niboanidi 'ali'aligidi e taudiega edi to'aligayavo ina tavunidi."

Ieisu yaqina waiwaina givedaumwalia
(Maki 4:35-41; Luke 8:22-25)

²³ Ieisu ana to'abibodayavo maega igelu wagaya, ²⁴ ta tuta~nana ivavaukamana 'inega yaqina qiduana 'ifoqe ta wese nufula luveafedi tuta goyona ida damana. Ta Ieisu 'eno motaiva waga gamonaya. ²⁵ 'Inega to'abiboda~dina idivanoya ivoneaya, "Kaiwabu, una iuleda mana tuta goyona kana damana!"

^{26 v} Ta Ieisu ve'iedi vonaya, "Tola'ai weaqina omwanimwaniniva? Omi'a emi vetumaqana goyona." 'Inega Ieisu ya'itoto ta yaqina be wese nufula lugwaeyedi vonaya, "Olua'u!" Tuata yaqina be wese nufula 'avalagwaedi, 'inega lavu~nana lu'otea.

²⁷ 'Inega nuadi voqana ta ivonaya, "To'oloto ba'e, mana yani qabuna ivelumamatayagea, ta wese yaqina be nufula bonana ivematamatayagea?"

Ieisu niboana veifadi 'wavi 'ifoqeyedi
(Maki 5:1-20; Luke 8:26-39)

²⁸ Ieisu ma enavo ivaukamana lavu di'wenaya ta ilugu me Gelasine edi di'we 'inaya. 'Inega 'oloto magilafudi niboana luveifadi ni'a i'wahalidi

^s 8:17 Ais 53:4 ^t 8:20 2Kol 8:9 ^u 8:21 1Kin 19:20 ^v 8:26 Md 14:31; Same 89:9

deba'unuyega i'ifoqe. Ta edi ilivu veifana 'ebegaululu 'inega ge taha toga ana fata di'we omo'e 'inaya natauya. ^{29w} Magilafudina leisu i'itea 'inega ivegabegabea ivonaya, "Ei, o'a Yaubada Natuna, tola'ai una viaqi 'imaya? Luvematasabu ana 'aubena nawale, ta o'a nage ni'a umaimai sabi luvematasabuma?"

³⁰ Ta di'wenaya bawe 'eala iduaduala ta adi to'itamakiavo itoatoa. ³¹ 'Inega niboana luveifa~dina leisu ivenoqiea ivonaya, "Eguma una 'wavi 'ifoqeyema, e 'inega nuanuama una luvetunema ana tauya bawe 'idia ana lugu."

³² 'Inega leisu vonedia, "Otau!" Tuata 'oloto magilafudina 'idiega niboana luveifadi i'ifoqe 'inega itauya ilugu bawe 'idia. 'Inega bawe diavona ivihila iwebui dabega i'elube'u lavuya ta ifonu. ³³ 'Inega bawe adi to'itamakiavo idena itauya edi 'abagaya, ta yani diavona ni'a i'itedi ediavo 'idia iveqayedi. Ta wese ivelulu'uyayea ma'oda 'inega 'oloto magilafudina iveaqiaqi 'aiqa niboana luveifadi 'idiega. ³⁴ Ta totoa 'abaga qabudi itauya leisu 'inaya sabi 'itana, ta tuta~nana ilobea 'inega ivona waiwai 'inaya vonigo edi di'we nanogei ta natauya mali di'we 'inaya.

Isisu 'oloto belubeluna giveaqiaqiea

(Maki 2:1-12; Luke 5:17-26)

9 ^{1x} 'Inega leisu wagaya gelu vaukamana 'evivi ena 'abagaya. ² 'Inega taha 'oloto belubeluna vaina tomotau ma 'ivina i'avalei imiea leisu 'inaya. Ta leisu to'avala~dina edi vetumaqana 'itea 'inega tovevhiqa~nana vonea vonaya, "Natugu, ge una nuavita, mana eu luveifayavo ni'a yauataqodi."

³ Ta vaina luvine ana tove'itayavo leisu ena vona inoqolia, e taudiega ivetala'aiedi ivonaya, "Olo to ba'e ena vona 'inega taunega givaneyea kavona tauna Yaubada 'idewani."

^{4y} Edi nuanua leisu ni'au alamania ta vonedi vonaya, "Tola'ai weaqina giwalimiega nuanua veifadi weaqidi onuanua? ⁵ Ta isana ma'oda ena vona 'aiqa 'oloto ba'e 'inaya, nage ena vonaya, 'Eu ilivu luveifana ni'au yauataqodi', nage ena vonaya, 'Uya'itoto utauya!' ^{6z} Ta nuanuagu ona alamani aqiaqiea ya'a Tomotau Natuna me egu luvine waiwaina, ta luvine~nana ena vefewea bwa'obwa'oya, 'inega wese agu fata tomotau edi ilivu luveifana ena nuataqodi." 'Inega leisu belubelu~nana vonea vonaya, "Uya'itoto, eu 'ebana u'avalei ta utauya eu 'abagaya." ⁷ 'Inega 'oloto~nana ya'itoto ta tauya ena 'abagaya.

⁸ Tuta~nana qabu diavona ba'e viaqa~nana i'itea 'inega nuadi voqana 'ena'ina, mana ialamani aqiaqiea vonigo Yaubada ena waiwai ba'e 'oloto~nana neia ta vetunei mai tomotau 'idia. 'Inega Yaubada iawatuboya ba'e yani~nana weaqina.

^w 8:29 Mk 1:24; Lk 4:34 ^x 9:1 Md 4:13 ^y 9:4 Lk 9:47; Ion 2:25 ^z 9:6 Ion 17:2

Ieisu Madiu gabea
(Maki 2:13-17; Luke 5:27-32)

⁹Ieisu di'we ba'e nogea ta tautauya, 'inega takesi ana to'ewa 'itea ana wawa Madiu vanue 'ebefewa 'inaya toatoa. 'Inega Ieisu vonea vonaya, "Umai u'abibodegu!" 'Inega Madiu ya'itoto ta Ieisu 'abibodea.

¹⁰Ta tuta~nana Ieisu ma ana to'abibodayavo ilugu Madiu ena vanuea sabi 'ai, 'inega takesi ana to'ewayavo 'eala be wese toveilivu veifa imai, ta Ieisu ma ana to'abibodayavo maega i'ai. ¹¹^a Ta vaidi Falisi Ieisu i'itea, 'inega ana to'abibodayavo ivetala'aiedi ivonaya, "Tola'ai weaqina emi Tove'ita takesi ana to'ewayavo ta wese toluveifadi maega i'ai'ai?"

¹²Ta Ieisu edi vona ba'e noqolia 'inega vonedi vonaya, "Taudi aqiaqidi ge daluaqiaqiedi be ina tauya togiveaqiaqi 'idia, ta 'esi tovevihuqa nuanuadi togiveaqiaqi. ¹³^b Ta luaqiaqiemi be Yaubada ena vona Buki Nugwenugweina gamonaya ona 'itea 'inega ona alamania ta ona nuaia, vonaya,

'Yubai ovegubayedi 'iguya ge nuanuagu, ta 'esi nuanuagu tomotau ona nuakolokoloyedi.'

"Ya'a ge eda mai tunutunuqidi weaqidi, ta 'esi yamai toluveifadi sabi iuladi."

Vetala'ai vedede weaqina
(Maki 2:18-22; Luke 5:33-39)

¹⁴^c 'Inega Ioni Togivebabitaiso ana to'abibodayavo imai Ieisu 'inaya ivetala'aiea ivonaya, "Ima'a ta wese Falisiavo maega vaina tuta 'inaya avevedede, ta ma'oda 'inega au to'abibodayavo ge ida vedede?"

¹⁵'Inega Ieisu vona sesebaiega vonedi vonaya, "Tola'ai ana aqiaqi 'eguma vaqi ana toyo'oyavo ina nuavita tuta~nana tovaqi me'olotona maega itoatoa? Ge taha wese ana aqiaqi! Ta nawale tuta maimai 'inaya vaina tomotau tovaqi~nana ina kafia ina tauyea, 'inega enavo me edi nuavita ina vedede."

¹⁶Ta wese vona sesebaiega vonedi vonaya, "Ge ana fata be kaleko vauvauna matavusinega kaleko 'itu'ituwaina kana bwabwadei. Ge daluaqiaqiea mana nawale kana 'utuya 'inega bwabwada vauvauna nabwagogoma ta kaleko 'itu'ituwainana ena eabu nagive'ena'ia." ¹⁷Wese 'idewani 'oine warena yubai 'wafidiega weaqina Ieisu vonedi vonaya, "Eguma 'oine vauvauna wage 'itu'ituwaina 'inaya kana iwaqia 'inega nawale wage~nana nanabahabuya, ta 'oine~nana naguiwaqa ta wese wage~nana naluveifa. Ta 'esi luaqiaqiea be 'oine vauvauna kana iwaqia wage vauvauna gamonaya, 'inega magilafudi tuta kuena ina 'eno'eno."

^a 9:11 Lk 15:2 ^b 9:13 Md 12:7; Ose 6:6 ^c 9:14 Lk 18:12

Ieisu vivine magilafudi giveaiaqiedi

(Maki 5:21-43; Luke 8:40-56)

¹⁸Ieisu nawale vonavona 'idia, 'inega me Diu edi toluvine taha mai, ta Ieisu 'iawanaya tuqatuqanega sobadi ta voneaya, "Kaiwabu, natugu mevavinena yawaina ni'a gumwala, ta nuanuagu una mai be nimaueyega 'wafina una gitonovi 'inega nayawaha 'evivi." ¹⁹'Inega Ieisu ya'itoto ta toluvine~nana maega itutuvila itauya, ta wese ana to'abibodayavo 'idewani.

²⁰Nawale itautauya 'inega taha vavine gwavudiega mai ta Ieisu ana kwakwalufai noyana gitonovia. Vavine~nana vihiqa 'ena'ina 'ewea 'inega sulalina inoinoqa ya'wala tuwelo gamonaya, ²¹^d ta nuanega vonaya, "Eguma Ieisu ana kwakwalufai ena gitonoviamo e 'inega ena veaiaqai." ²²'Inega Ieisu givila ta vavine~nana 'itea vonaya, "Novugu, ge una nuanua ta 'esi una qaiawa, eu vetumaqana 'inega ni'a uveaiaqai." Ta omo'e tuta~nana 'inaya vavine~nana veaiaqai.

²³'Inega Ieisu 'ifoqe lugu toluvine~nana ena vanuea, 'inega todou ta wese to'ewabamu 'itedi ta bonadi veago va'ine. ²⁴'Inega Ieisu vonedi vonaya, "O'ifoqe! Gwama ba'e ge da'aliga ta 'esi 'eno motaiva 'eno'eno." 'Inega todou Ieisu idagiea. ²⁵'Inega qabu diavona i'ifoqe ta Ieisu lugu gwamana 'inaya ta nimanaya kafi, e 'inega gwama~nana ya'itoto. ²⁶Ta 'abiboda vale ba'e yawala di'we qabuna 'idia.

Ieisu matakwaya magilafudi giveaiaqiedi

²⁷^e Ieisu omo'e di'we~nana nogea ta tautauya, 'inega matakwaya magilafudi i'abi'abibodea ta igabagaba ivonaya, "Deibida tubuna ye, uda nuakolokoloyema!"

²⁸'Inega vanuea lugu ta magilafudina imai 'inaya ta Ieisu vonedi vonaya, "Ma'oda, nage ovetumaqanegu be agu fata matami ena giveaiaqiedi?"

Ta ive'iea ivonaya, "Ao Kaiwabu, au fata."

²⁹'Inega Ieisu matadi gitonovia ta vonedia, "Emi vetumaqana 'inega matami ina veaiaqai", ³⁰^f 'inega magilafudi matadi 'eaea ta Ieisu luvine waiwaina neidi vonaya, "Ge taha toga 'inaya ona vonayei ba'e weaqina!" ³¹Ta itutuvila itauya, 'inega Ieisu Valena iyawala dadanea di'we qabuna 'idia.

Ieisu nakunaku taha giveaiaqiea

³²'Oloto magilafudina ni'a itauya ta Ieisu ma ana to'abibodayavo nawale itoatoa, 'inega vaina tomotau taha 'oloto imiea Ieisu 'inaya. 'Oloto

^d 9:21 Md 14:36 ^e 9:27 Md 20:29-34 ^f 9:30 Md 8:4

ba'e ge ana fata naveqae mana niboana luveifana meana givilea. ^{33g} Ta tuta~nana Ieisu niboana luveifana 'wavi 'ifoqeyea 'inega 'oloto~nana veaiaqi ta veveqae. Ta tomatou qabudi nuadi voqana 'inega ivonaya, "Tuta lova 'inega be ana laba ba'itagana ge taha toga ena viaqa ba'e 'idewani kada 'itea Isileli gamonaya."

^{34h} Ta Falisi ivonaya, "Tauna niboana luveifadi 'wavi'wavi 'ifoqeyedi niboana luveifadi edi kaiwabu ena waiwaiga."

Ieisu tomatou nuakolokoloyedi

³⁵ⁱ 'Inega Ieisu 'abaga agoagodi be goyogoyodi 'idia luvivila ta edi vanue tafwalolo 'idia ve'ita ta lugaihi Yaubada ena 'Ebeluvine valena weaqina, ta wese vihiqa qabudi tomatou 'idiega giveaiaqiedi. ^{36j} Ta tuta~nana Ieisu qabu qiduana 'itedi 'inega 'ita nuaduyedi, mana me edi nuavita itoatoa ta wese ge adi toiulamo, 'inega qabu~dina kavona sifi luluve'waividi ge adi to'itamakimo. ^{37-38k} 'Inega ana to'abibodayavo vonedia, "Bolimana qiduana ana tuta ni'a 'ifoqe ta toala ge 'ealidi, 'inega bolimana ana Kaiwabu 'inaya ona venoqi be yaqisa tofewa 'eala navetunedi ena vaoqaya sabi ala."

Ieisu ena tovaletuyana adi wawayavo

(Maki 3:13-19; Luke 6:12-16)

10 ^{1l} Ieisu ana to'abibodayavo adi yau tuwelo gabedi ta ena luvine be wese ena waiwai neidi, 'inega adi fata niboana luveifadi tomatou 'idiega ina 'wavi 'ifoqeyedi, ta wese vihiqa qabudi tomatou 'idiega ina giveaiaqiedi. ² Tovaletuyana tuwelo~dina adi wawa ba'e: Nugweta Saimoni tauna igabea Fita, 'inega taina Anidulu be wese Iemesa ma taina Ioni, taudi tamadi Sebedi. ³ Ta wese Filifi be, Batolomio be Tomasi ta wese Madiu, tauna takesi ana to'ewa. Ta wese Iemesa tauna Alifio natuna be Tadiasi, ⁴ ta wese Saimoni tauna Seloti edi qabu 'idiega, be wese Iudasa Isakaliota, tauna Ieisu ana tosuluva.

Tovaletuyana edi fewa

(Maki 6:7-13; Luke 9:1-6)

⁵ Ieisu tuwelo~dina vebibinedi ta vetunedi vonaya, "Ge ona tauya taudi ge me Diu 'idia, ta wese gebu Samelia 'abaganavo 'idia ona lugu. ^{6m} Ta 'esi ona tauya me Isileli 'idia, mana vaina qabu 'idiega edi toa kavona sifi luluve'waividi. ⁷ⁿ 'Inega ona tauya ona lugaihi 'idia ona vonaya, 'Yaubada ena 'Ebeluvine tuta goyona na'ifoqe.' ⁸ Toveviahayavo ona giveaiaqiedi

^g 9:33 Mk 2:12 ^h 9:34 Md 12:24; Mk 3:22; Lk 11:15 ⁱ 9:35 Md 4:23; Mk 1:39

^j 9:36 Sek 10:2; Naba 27:17; 1Kin 22:17; Md 14:14; Mk 6:34 ^k 9:37 Lk 10:2

^l 10:1 Mk 6:7; Lk 9:1 ^m 10:6 Iel 50:6 ⁿ 10:7 Md 3:2; 4:17; Lk 10:9,11

be to'aliga ona giveya'itoto 'eviviedi be 'wago'wagoidi ona giveaiaqiedi ta ina vevunavunaqa, be wese niboana luveifadi tomotau 'idiega ona 'wavi 'ifoqeyedi. Yaubada ena veyoluba ni'au nei kavovomi 'inega wese luaiaqiemimi omi'a ona fewa kavovo tomotau 'idia, ta ge ve'ia weaqina ona nuanua.

^{9o} “Ta emi luvivila 'inaya gebu mane ona dodoi emi kodekodea 'abwaga weaqina, ^{10p} ta ge emi kode ona 'ewei, ta wese ge ami kaleko vemagilafuna. Ta wese 'aqeyafayafa be kewala ge ona 'ewedi, mana tofewa ba'e yani diavona adi fata ina lobedi tomotau 'idiega. ¹¹ Ta 'eguma 'abaga agona nage goyona 'inaya ona tauya nugweta ona sali togama ena ilivu aiaqina, 'inega maega ona toatoa ana laba 'abaga~nana ona nokea. ^{12q} Ta 'eguma taha vanue 'inaya ona lugu 'inega nugweta tonivanue ona lukaiwa 'idia, ¹³ ta 'eguma ena susuyavo edi ilivu aiaqina 'inega ona vona veyolubedi, ta 'eguma gebu 'inega ge taha tola'ai ona vonei 'idia. ^{14r} Ta 'eguma ge taha toga na'ebe'ewemi ena vanuea nage emi vona ge nanoqonoqoli, e 'inega 'abaga~nana ona nopei, ta 'aqemiega fwayafwaya ona vavutuvutuqia ta ona tauya.

^{15s} “Vonahaiaqi, nawale vetala'ai ana 'aubena 'inaya Yaubada me Sodoma be wese me Gomola naluvematasabudi, ta yavona aiaqiemimi tomeqabu ge ida 'ebe'ewemi edi vanuea nawale 'aubena~nana 'inaya luvematasabu ago va'inena ina lobeia Yaubada 'inega.

Ieisu ena tovaletuyanayavo nawale vita ina lobeia

(Maki 13:9-13; Luke 21:12-17)

^{16t} “Onoqolia! Omi'a yavevetunemi kavona sifi 'idewani yubai sasasadi nuanidia. 'Inega ona 'itamaki aiaqiemimi ta tuta qabuna ona veilivu aiaqi. ^{17u} Vonahaiaqi, ona 'itamakimi, mana nawale tomotau ina tauyemi kotu 'inaya be vanue tafwalolo 'inaya ina vunuqa dadanemi wayo metametanega. ¹⁸ Ta wese tomotau ina tauyemi toluvineavo be kiniavo 'iawadia ta ina ve'ewemi, mana omi'a agu to'abibodayavo. Ta omo'e tuta~nana 'inaya Valegu Aiaqina ona simanea 'idia, ta wese taudi ge me Diu 'idia. ¹⁹ Ta tuta~nana ina ve'ewemi toluvineavo 'iawadia ge ona nuanua ma'oda ona vona 'aiqa, mana nawale tuta~nana 'inaya Yaubada emi vona naneimi, ^{20v} ta omi'a ge ona vona, ta 'esi Yaubada Niboanina 'imia toatoa navonavona.

^{21w} “Inega 'oloto taina nasuluvei toluvineavo 'idia be ina luve'aligia, be wese tauna natuna nasuluvea be ina luve'aligia, ta wese gogama inadiavo be tamadiavo ina vevoalanedi 'inega ina awafeledi toluve'aliga 'idia. ²² Ta tomotau

° 10:9 Lk 10:4 p 10:10 Lk 10:7; 1Kol 9:14 q 10:12 Lk 10:5-6 r 10:14 Lk 10:10-12;
Via 13:51 s 10:15 Md 11:24; Iud 7 t 10:16 Lk 10:3; Lom 16:19 u 10:17-20 Mk 13:9-11;
Lk 12:11-12; 21:12-15 v 10:20 Ion 14:26 w 10:21 Mai 7:6; Md 10:35; Mk 13:12; Lk 21:16

qabudi ina vevoalanemi mana omi'a agu to'abibodayavo. Ta tomeqabu ina tovoloi'ita ana laba tuta ana 'ebelu'ovoa 'inaya, e taudi yawai vataya ina lobe. 23 Ta 'eguma taha 'abaga 'inaya ina veilivu veifa 'imia, 'inega ona dena mali 'abaga 'inaya. Yavona aqiaqiemi, emi fewa~nana ge ona lu'ovoi 'abaga qabudi Isileli gamonaya ana laba ya'a Tomotau Natuna ena 'evivi ena mai.

24^x "To'abiboda gebu ana fata ena tove'ita naveago va'inei, 'idewani wese tofewa gebu ana fata ena kaiwabu naluvinei. 25^y Tola'ai 'ifo'ifoqe ya'a emi Tove'ita 'iguya, e nawale wese 'idewani na'ifoqe 'aiqa omi'a to'abiboda 'imia. Ta tola'ai 'ifo'ifoqe kaiwabu taha 'inaya, e wese 'idewani na'ifoqe ena tofewa 'inaya. Ta ya'a emi Kaiwabu ni'a i'awaluveifegu ivonaya be vonigo ya'a niboana luveifadi edi kaiwabu Belisibubi, e 'inega nawale omi'a egu qabuyavo wese 'idewani ina 'awaluveifa aqiaqiemi.

Mwaniniva weaqina

(Luke 12:2-7)

26^z "Inega taudi togivegaululu gebu ona mwaninivedi, mana yani qabuna 'wai'waividi nawale Yaubada nave'ifoqeyedi, ta tola'ai edi nuanua 'inaya i'waivea wese nave'ifoqeyedi. 27 Inega tola'ai velovelovana 'inaya yasimanea 'imia, 'aubenaya ona simanayea tomotau qabudi 'idia, ta tola'ai yave'awahayayayea 'imia omi'a ona simana 'ifoqeyea.

28^a "Ta taudi nuanuadi 'wafimi ina luve'aligia gebu ona mwaninivedi, mana taudi 'wafi~mimo ana fata ina luve'aligia ta niboanimi gebu. Ta 'esi luaqiaqiemi be Yaubada ona mwaninivea, mana tauna ana fata 'aiwe 'ala'alata 'inaya 'wafimi ta wese niboanimi naluveawalidi. 29 Dagedage magilafudi kagimwanedi adi ve'ia siliba 'aigedanega ta tua Yaubada 'ita'itamakidi, ta 'eguma taha 'idiega na'aliga e Tamami ni'a alamania. 30 Ta wese Yaubada debami adi yau tawa alamanidi. 31^b Inega gebu giwalimi naha'ala tomotau weaqidi mana omi'a Yaubada ena yani qiduana, ta 'abiboda dagedage.

32 "Eguma tomeqabu ina 'awahaqiaqiegu tomotau matadia, nawale wese ya'a Tamagu mahalaya matanaya ena 'awahaqiaqiedi. 33^c Ta 'eguma tomeqabu ina vegeqegu tomotau matadia, nawale wese ya'a Tamagu mahalaya matanaya ena vegeqedi.

Vevoalana gade nuanidia

(Luke 12:51-53; 14:26-27)

34 "Ge ona vonaya be ya'a eda mai bwa'obwa'oya be todaumwala eda miei, ta 'esi egu mai 'inega vetoatoasi'i na'ifoqe tomotau nuanidia. 35^d Ta egu mai~nana 'inaya,

^x 10:24 Lk 6:40; Ion 13:16; 15:20 ^y 10:25 Md 9:34; 12:24; Mk 3:22; Lk 11:15

^z 10:26 Mk 4:22; Lk 8:17 ^a 10:28 Iem 4:12 ^b 10:31 Md 6:26 ^c 10:33 Mk 8:38; Lk 9:26; 2Tim 2:12 ^d 10:35-36 Mai 7:6

‘Gwama me’olotona tamana navevoalanea,
 ta wese gwama mevavinena inana navevoalanedi,
 ta vavine vaqivaqidi lawadi ina vevoalanedi,

³⁶ ta taha ‘oloto ena gade gamodiega ina vevoalanea.’

³⁷“Eguma taha toga veveyolubegu ta ena veyoluba tamana be inana ‘idia veqidua va’inegu ‘inega ge ana fata na’abibodegu. Ta wese ‘idewani ‘eguma taha toga veveyolubegu ta ena veyoluba natuna me’olotona nage mevavinena ‘idia veqidua va’inegu e ‘inega ge ana fata be na’abibodegu. ^{38e} Ta ‘eguma togama yawaina ge nahawafela aqiaqiei ‘iguya ta ge nuanuana yuvaqa be veilaqe nalobei ‘idewani ya’a nawale ena lobe a ‘etoluai ‘inaya, e tauna ge agu fata be ena ‘awanatunea. ³⁹‘Eguma taha toga taunega yawaina weaqina fewafewa nawale yawaina naluve’waivia, ta ‘esi ‘eguma taha toga yawaina naluve’waivia weafigu e nawale yawai aqiaqina nalobe a.

Ve’ia weaqina

(Maki 9:41)

^{40f} “Ta omi’a ‘eguma taha toga na’ebe’ewemi ‘inega tauna wese na’ebe’ewegu. Ta ‘eguma taha toga na’ebe’ewegu ‘inega wese agu Tovetune na’ebe’ewea. ⁴¹ Ta ‘eguma taha tomtau taha tovesimasimana na’ebe’ewea mana tauna Yaubada ena tovesimasimana, ‘inega tomtau~nana nawale ana ve’ia na’ewea ‘idewani tovesimasimana ana ve’ia. Ta wese ‘eguma taha tomtau taha ‘oloto tunutunuqina na’ebe’ewea mana tauna ‘oloto tunutunuqina, e ‘inega nawale tomtau~nana ana ve’ia nalobe a ‘idewani ‘oloto tunutunuqina ana ve’ia. ⁴² Ta ‘eguma taha tomtau agu to’abiboda vauvauna go’ila fayou’una navenumea mana tauna agu to’abiboda, ‘inega yavona aqiaqiemi tomtau~nana nawale ana ve’ia aqiaqina na’ewea.”

11 ¹ Ieisu ena lugaihi lu’ovoia ana to’abibodayavo tuwelo ‘idia, ‘inega di’we~nana nokea ta luvivila ‘abaga taha taha ‘idia, ta omo’e ‘inaya veve’ita ta wese lulugaihi.

Ioni Togivebabitaíso Ieisu Valena noqolia

(Luke 7:18-35)

² Ioni Togivebabitaíso ni’au ia’uya vanue ‘ebeyoqona ‘inaya, ta tuta~nana To’etoyavua ena fewa valena noqolia, ‘inega vaina ana to’abibodayavo vetunedi itauya Ieisu ‘inaya, ³ ta ivetala’aiea ivonaya, “Ima’a To’etoyavua Keliso aba’eba’eyea. Nage o’a tau’u To’etoyavuauna, nage mali ‘oloto weaqina ana ba’eba’e?”

⁴ ‘Inega edi vona Ieisu ve’evivia vonaya, “Ona ‘evivi Ioni ‘inaya ta yani diavona ni’au o’itedi ta onoqolidi ona veqaeyea ‘inaya, ‘idewani ^{5g} matadi kwayakwayana ni’au i’ita’ita aqiaqi ta wese ‘aqedi veifana ni’au

^e 10:38-39 Md 16:24-25; Mk 8:34-35; Lk 9:23-24; 17:33; Ion 12:25 ^f 10:40 Mk 9:37; Lk 10:16; Ion 13:20 ^g 11:5 Ais 35:5-6; 61:1

iveaiaqiaqi iyabayaba, wese 'wago'wagoidi 'wafidi veaiaqiaqi 'evivi, ta taniqadi kwavakwavana ni'au vona inoqonoqolia, ta to'aliga iyawaha 'evivi, ta wese lukwalukwadi vale aiaqiaqina ni'au inoqolia. ⁶ 'Inega ona tauya Ioni 'inaya ta ona vonea ge wese navenuana magilafu ya'a togama, mana 'eguma taha toga ena vetumaqana weaigigu gebu nadawalili 'inega tauna naqaiawa."

⁷ Tuta~nana Ioni ana to'abibodayavo i'evivi itautauya, 'inega leisu qabu diavona Ioni weaqina simana 'idia vonaya, "Lova qabumi di'we 'ava'avaya otauva Ioni sabi noqolina, ta tola'ai ovonaya be oda 'itei? Nage otauva taha 'oloto dawalilina kavona didiala yaqina dayueyuei sabi 'itana? Ana 'ita gebu. ⁸ Nage otauva taha 'oloto ana kaleko kaikaiwabuna sabi 'itana? Gebu, mana taudi adi kaleko kaikaiwabuna toluvine qiduquduadi edi vanuea itoatoa. ⁹ Ta tola'ai weaqina otauva di'we 'ava'avaya? Nage onuaia vonigo tovesimasimana taha oda 'itei? Vonahaiaqiaqi, 'oloto~nana ni'a o'itea tovesimasimanayavo qabudi veqidua va'inedi. ¹⁰ ^h Ioni~nana weaqina lova Yaubada ena vona Buki Nugwenugweina 'inaya ba'e 'idewani simanea vonaya,

'Ba'e egu tovaletuyana ena vetunea natauya ta eu 'eda naqadalia.' "

¹¹ 'Inega leisu wese vonaya, "Vonahaiaqiaqi, Ioni Togivebabitaio tauna totoa bwa'obwa'o qabudi veqidua va'inedi, ta taudi ge adi wawa 'ena'ina mahala ena 'Ebeluvine gamonaya Ioni iveqidua va'inea. ¹² ⁱ Ta Ioni Togivebabitaio ena tuta 'inega be ana laba ba'itagana tomtau nuanuadi edi waiwaiega mahala ena 'Ebeluvine ina 'ewea. ¹³ Lova tovesimasimanayavo qabudi edi vonayavo be Mosea ena luvineavo 'idiega ivetalasimasimanea 'Ebeluvine~nana weaqina ana laba Ioni mai. ¹⁴ ^j Ta 'eguma nuanuami be tovesimasimanayavo edi vona ona 'awahaiaqiaqia 'inega ona alamani aiaqiaqia Ioni tauna Ilaitia. Mana taudi tovesimasimana diavona ena mai weaqina lova isimanea. ¹⁵ 'Inega 'eguma ma teniqami vona ba'e ona noqolidi!

¹⁶ "Inega omi'a lagata ba'e ma'oda ena vetalatutula 'aiqa weaqimi? Nage ena vonaya vonigo omi'a 'idewana gogama 'ebevegimwane ana 'abaga gamonaya ilahalaha ta ediavo 'idia igabagaba ivonavonaya,

¹⁷ 'Emavo, ma'oda 'inega alavulavua ta ge oda ouou.

Ta wese a'ewa'ewabamu ta ge oda doudou.'

¹⁸ Vetalatutula ba'e ana alamani, Ioni mai ta ge da'ai ta wese ge danuma, ta 'inega omi'a ovonaya, 'Niboana veifana lugu Ioni 'inaya.' ¹⁹ ^k Ta ya'a Tomotau Natuna yamai be ya'ai'ai ta yanumanuma ta wese weaigigu olugwae ovonavonaya, "Oloto ba'ena to'ai ta tonuma va'ine, ta wese takesi ana to'ewayavo be wese luveluveifadi veiaianedi.' Nawale tomtau Yaubada ena alamani aiaqiaqi ina 'itea vuaqa aiaqiaqina 'inega."

^h 11:10 Mal 3:1; Lk 1:76 ⁱ 11:12-13 Lk 16:16 ^j 11:14 Mal 4:5; Md 17:10-13; Mk 9:11-13

^k 11:19 Md 9:10

Vaina 'abaga luveifadi adi luvematasabu
(*Luke 10:13-15*)

²⁰Ieisu 'abaga taha taha 'idia viaqa waiwaidi viaqidi, ta 'abaga diavona adi totoayavo ge ida nuagivila edi luveifayavo 'idiega, 'inega lugwaeyedi vonaya, ²¹^l “Omi'a me Kolesini be wese me Bedesaida nuakolokolomi, mana 'ebenuavoqana diavona ni'au yaviaqidi 'imia ta ge oda nuagivila. Ta 'eguma me Taia be wese me Saidoni ba'e viaqa diavona lova eda viaqidi matadia e 'inega ida nuagivila ta edi vaiqavu 'inega taudiega ida ve'itayedi tawa edi ilivu luveifana 'idiega ni'a inuagivila. ²²Ta yavona aqiaqiemi, vetala'ai ana 'aubena 'inaya nawale me Taia be wese me Saidoni Yaubada naluvematasabudi, ta omi'a luvematasabu qidua va'inena ona lobe. ²³^m Ta me Kafaneumi omi'a ma'oda? Vonigo taumiega ogivaneyemi mahalaya, wa? Ta ge ami fata! Ta 'esi nawale to'aliga edi 'abagaya ina a'uwebuiemi, mana 'ebenuavoqana~dina ni'au yaviaqidi 'imia ge oda nuagivila 'idiega. Ta 'eguma lova me Sodoma 'idia ba'e viaqa diavona eda viaqidi ida nuagivila, 'inega Yaubada ge daluveawalidi ta ba'itagana edi 'abaga nawale kada 'itea da'eno'eno. ²⁴ⁿ 'Inega vetala'ai ana 'aubena 'inaya Yaubada nawale me Sodoma naluvematasabudi, ta omi'a luvematasabu qidua va'inena ona lobe.”

Toa aqiaqina Ieisu 'inega
(*Luke 10:21-22*)

²⁵^o Ba'e vona diavona 'abibodanaya Ieisu venoqi vonaya, “Kaiwa Tamagu, o'a mahala ta bwa'obwa'o adi Toluvine, alamani ba'e ua'ukwaivea toalamaniavo ta tonua'eqa'u 'idia, ta 'esi tomotau kavokavovo alamani~nana ni'a ugive'ifoqeyea 'idia. ²⁶Tamagu, vonahaqiaqi ba'e eu nuanua aqiaqina.” ²⁷^p Ta wese vonaya, “Yani qabuna Tamagu ni'a a'uuya nimaguya. Ge taha toga dahalamanigu ta Tamagu ana 'aidegamo. Ta wese ge taha toga Tamagu dahalamaniga, ta ya'a agu 'aidega. Ta wese 'eguma tomeqabu Tamagu nuanuadi ina alamania 'inega ya'a alamani~nana ena give'ifoqeyea 'idia.

²⁸^q “Ta omi'a emi 'onena vitana ona mai 'iguya be veyawai ena neimi. ²⁹Egu 'ebe'avala bai'wana ona 'ewei ona 'avalayea, ta ona vetutumegu mana ya'a tonuawebui ta egu ilivu nuvana, 'inega veyawai 'iguyega ona lobe yawaimi weaqina. ³⁰^r Mana egu bai'wana ge vitana, ta wese egu 'onena meaqana.”

^l 11:21-22 Ais 23:1-18; Isi 26:1-28:26; Ioe 3:4-8; Emo 1:9-10; Sek 9:2-4

^m 11:23 Ais 14:13-15; Nug 19:24-28 ⁿ 11:24 Md 10:15; Lk 10:12 ^o 11:25 1Kol 1:26-29

^p 11:27 Md 28:18; Ion 1:18; 3:35; 10:15; 17:2 ^q 11:28 Iel 31:25 ^r 11:30 1Ion 5:3

Ieisu Sabate ana Kaiwabu
(*Maki 2:23-28; Luke 6:1-5*)

12 ^{1s} Ge tuta kuena 'abibodanaya taha Sabate 'inaya Ieisu ana to'abibodayavo maega vaoqa gamonega itautauya, ta to'abiboda~dina ma botanidi 'inega witi vuaqina ma walona i'egigoluya ta i'ai'ai. ^{2t} Ta tuta~nana Falisiavo i'itedi 'inega Ieisu ivoneaya, "Kaiwabu u'itei, au to'abibodayavo Sabate ana luvine ibaia ba'e viaqa~nana 'inega, waisa?"

^{3u} Ta Ieisu edi vona ve'evivia vonaya, "Nage ge oda avoi Buki Nugwenugweina 'inaya i'wayavia, Deibida ma enavo taudi wese 'edewani ibotana? ^{4v} 'Inega Yaubada ena vanuea lugu ta beledi gwalagwalana 'ewe 'inega i'ainia, ta beledi~nana ma ana luvine vonigo toveguba dimo adi luaqiaqi be ina 'ainia. 'Inega ge ana fata Deibida ma enavo beledi~nana ina 'ai, ta ibotana 'inega tua i'ainia. ^{5w} Nage wese ge oda avoi Mosese ena luvine gamonaya vonigo Vanue Gwalagwalana ana tovegubayavo Sabate 'aidega 'aidega Sabate ana luvine iqueuneia edi veyoveyoa 'inega, ta ge taha adi ve'ewamo? ^{6x} Ta yavona aqiaqiemi, Vanue Gwalagwalana yani qiduana, ta taha tomotau ni'a mai toatoa, ta tauna vanue~nana veqidua va'inea. ^{7y} Buki Nugwenugweina ena vona vonaya,

'Nuakolokolo nuanuagu ta ge guba yubai 'idiega.'

"Eguma vona ba'e ana alamani oda alamania 'inega gebu agu to'abibodayavo oda ve'ewedi, mana ge taha luveifana ida viaqi. ⁸ Mana ya'a Tomotau Natuna Sabate ana Kaiwabu."

Ieisu 'oloto nimana belubeluna giveaqiaqiea
(*Maki 3:1-6; Luke 6:6-11*)

⁹ 'Inega Ieisu 'abaga~nana nogea ta tauya edi vanue tafwalolo 'inaya lugu. ^{10z} E omo'e 'inaya taha 'oloto 'itea nimana belubeluna toatoa. Ta Falisiavo nuanuadi taha luveifana ina lobeia Ieisu 'inaya, be yaqisa adi fata ina ve'ewea 'inega ivetala'aiea ivonaya, "Kaiwabu, nage ana fata Sabate 'inaya tovevhiqa kana giveaqiaqiedi?" Ta ivonaya be Ieisu ena vona 'evivi 'inega ina tauyea toluvine 'idia ta ina vekotuya.

^{11a} 'Inega Ieisu vona 'eviviedi vonaya, "Omi'a 'eguma taha toga 'imiega ena sifi 'aidegana Sabatea nabe'u vetoaya 'inega nuanuana nalihi vaneyea, waisa? ¹² Vonahaqiaqi, sifi yani goyona, ta tomotau yani qiduana 'inega ana fata Sabatea iula aqiaqina kana neidi kana viaqi."

^s 12:1 Luve 23:25 ^t 12:2 'Ifo 20:10 ^u 12:3-4 1Sam 21:1-6 ^v 12:4 Luvi 24:5-9

^w 12:5 Naba 28:9-10 ^x 12:6 Md 12:41-42 ^y 12:7 Ose 6:6; Md 9:13 ^z 12:10 Lk 14:3

^a 12:11-12 Lk 14:5

¹³ 'Inega Ieisu 'oloto~nana vonea vonaya, "Nimau usi'otoi!" Tuata 'oloto~nana nimana si'otoia 'inega veaiaqi 'evivi 'edewani nimana di'wena. ^{14 b} 'Inega Falisiavo vanuega i'ifoqe ta adi 'aidega idima govaqa ma'oda Ieisu ina luve'aliga 'aiqi.

Yaubada ena tofewa vevenua'ivinina

¹⁵ Ta edi dima Ieisu ni'au alamania 'inega 'abaga omo'e nogea tauya mali di'we 'inaya. Ta tomotau 'eala i'abibodea, ta omo'e 'inaya tovevhiqa qabudi giveaiaqiedi, ^{16 c} ta wese luvinedi ge ina vevonavonaye tomotau 'idia. ¹⁷ Ba'e 'inega tovesimasimana Aisea Yaubada ena vona ana aiaqi ve'ifoqeyea Ieisu weaqina, mana lova vonaya,

^{18 d e} "Ba'e egu Tofewa yavenua'ivinea

ta me egu qaiawa giwaliguyega yaveveyolubea.

Niboanigu ena a'uya 'inaya, be luvine tunutunuqina 'iguyega nasimanea taudi ge me Diu 'idia.

¹⁹ Tauna nawale ge nave'ae'aetoga ta wese ge navekolukolua, be wese 'abaga gamonaya ge bonana qiduanega navonavona.

²⁰ Ta tomeqabu dawalilidi 'idewani didiala baibaina gebu nanogedi, ta wese taudi edi vetumaqana dawalilina kavona odamu niginigina

ge nanogedi ina 'weu, ta 'esi naiuledi,

ana laba tauna luvine tunutunuqina nave'ifoqeyea ena waiwai 'inega.

²¹ Ta wese tauna ana wawa 'inega di'we taha taha ana totoayavo ina lu'ita vane 'etoyavua weaqina."

Ieisu ta Belisibubi

(Maki 3:20-30; Luke 11:14-23)

²² 'Inega taha 'oloto lova niboana luveifadi edi fewega matana ikwayea ta wese meana igivilea 'inega ge ana fata naveqae imiea Ieisu 'inaya ta giveaiaqiea. 'Inega 'abiboda 'oloto~nana ana fata naveqae ta wese na'ita. ²³ 'Inega tomotau qabudi nuadi voqana Ieisu ena viaqa weaqina ivonaya, "Nage ba'e 'oloto~nana Deibida tubuna?"

^{24 f} Ta Falisiavo Ieisu ena viaqa ba'e valena inoqolia ivonaya, "Ba'e yani~nana ana fata, mana niboana luveifadi edi kaiwabu ana wawa Belisibubi ena waiwaiega niboana luveifadi 'wavi'wavi 'ifoqeyedi."

²⁵ Ta Ieisu edi nuanua ni'au alamania 'inega vonedi vonaya, "Belisibubi tauna enavo ge nuanuana na'wavi 'ifoqeyedi." Ta wese vonaya, "Eguma

^b 12:14 Ion 5:16 ^c 12:16 Md 8:4; Mk 3:12 ^d 12:18-21 Ais 42:1-4 ^e 12:18 Md 3:17

^f 12:24 Md 9:34; 10:25

taha 'ebeluvine 'inaya tomotau nuanidia ve'eto'eto'idi 'ifoqe ta taudiega ivevedavi, 'inega nawale 'ebeluvine~nana nadawalili ta naluveifa. Wese 'eguma 'abaga nage gade 'idewana nuanidia 'eto'idi na'ifoqe nawale ina toasi'i be edi toa naluveifa. ²⁶ Seitani wese 'idewana 'eguma ma enavo taudiega ina vedavi 'inega edi toa naluveifa ta wese ena 'ebeluvine naqeunia. ²⁷ Ni'a ovonaya vonigo ya'a Belisibubi ena waiwaiega niboana luveifadi ya'wavi 'ifoqeyedi, ta ami to'abibodayavo togama isana ena waiwaiega i'wavi'wavi 'ifoqeyedi? Belisibubi 'inega nage Yaubada 'inega? Ba'e weaqina ona nuanua, 'inega wese nuami na'eqa'uya vonigo emi ve'ewa 'iguya ge taha ana vonahaqiaqi! ^{28 s} Ta ya'a Yaubada Niboanina ena waiwaiega niboana luveifadi ya'wavi'wavi 'ifoqeyedi, 'inega ona alamania vonigo Yaubada ena 'Ebeluvine ni'au 'ifoqe mai 'imia.

²⁹ "Ebevetalatutula ba'e ona noqolia: 'Oloto waiwaina ena vanuea ge taha toga ana fata nalugu be ena kulufa na'ewedi. Ta 'esi 'eguma tovanawala nugweta wayoyega tovewaiwai~nana nimana be wese 'aqena nayoqonia, e 'inega 'abiboda ana fata vanuea nalugu be ena kulufa na'ekilidi. ^{30 h} 'Eguma taha toga gebu agu toiula 'inega tauna agu avia. Ta wese 'eguma taha toga ge naiulegu ta tomotau ge nava'auqidi namiedi 'iguya, e tauna egu fewa ana togiveluveifa.

^{31 i} "Inega ba'e yavona aqiaqiemi, tomotau edi luveifana ta wese edi vona veifa qabuna Yaubada nanuataqodi. Ta 'eguma taha toga Niboana Gwalagwalana na'awaluveifea 'inega Yaubada ge ana fata tomotau~nana nanuataqoi. ³² 'Eguma taha toga ya'a Tomotau Natuna na'awaluveifegu 'inega Yaubada nawale tomotau~nana nanuataqoya. Ta 'eguma taha toga Niboana Gwalagwalana na'awaluveifea 'inega Yaubada ge ana fata nanuataqoi tuta ba'e 'inaya ta wese tuta maimai 'inaya."

'Aiwe vuaqidi

(Luke 6:43-45)

^{33 j} Ta Ieisu wese vonedi, "Eguma 'aiwe aqiaqina 'inega wese vuaqina aqiaqina, ta 'eguma 'aiwe luveifana wese vuaqina luveifana. 'Inega 'aiwe taha taha kana alamanidi vuaqidi 'idiega. ^{34 k} Omi'a mwata natunavo, 'inega gebu ami fata vona aqiaqidi ona vonayedi mana omi'a luveluveifami. Ta tola'ai luveifana giwalimia 'eno'eno'ova tuta qabuna 'awamiega i'ifo'ifoqe. ³⁵ Taha 'oloto aqiaqina giwalinega nuanua aqiaqidi i'ifo'ifoqe, ta wese 'idewani 'oloto luveifana giwalinega yani veifadi i'ifo'ifoqe. ³⁶ 'Inega yavonemi vetala'ai ana 'aubena 'inaya omi'a emi vona kavokavovo weaqina Yaubada navetala'aiemi 'inega ona vona 'ifoqeyedi. ³⁷ Emi vonayavo 'idiega Yaubada na'awahaqiaqiemi nage na'awaluveifemi."

^s 12:28 Via 10:38; 1Ion 3:8 ^h 12:30 Mk 9:40; Lk 9:50 ⁱ 12:31 Ibe 6:4-6

^j 12:33 Md 7:16-20 ^k 12:34 Md 3:7; 15:18; Lk 3:7; 6:45

Tomotau nuanuadi 'ebe'ita
(Maki 8:11-12; Luke 11:29-32)

^{38 l} 'Inega vaina Falisi ta wese luvine ana tove'itayavo Ieisu ivonea ivonaya, "Tove'ita, nuanuama 'ebe'ita taha una viaqi ana 'itea."

^{39 m} Ta Ieisu vonedi, "Omi'a ba'e lagata luveifami, ta ge nuanuami Yaubada ena nuanua ona 'abibodei. 'Inega ni'a ovonegu be 'ebe'ita taha ena viaqia, ta ge nuagu! Ta yavonemi tovesimasimana Iona ona nuave'avinia tauna 'ebe'ita ana 'aidegamo 'imia. ^{40 n} Mana Iona~nana 'aubena toi be wese velovelovana toi 'idia 'iqana qiduana gamonaya toatoa, ta ya'a Tomotau Natuna wese 'idewani 'aubena toi be velovelovana toi 'idia bwa'obwa'o gamo otaqinaya ena toatoa. ^{41 o} Nawale vetala'ai ana 'aubena 'inaya me Ninibe ina tovolu be lagatamina ba'e ina ve'ewemi, mana Iona 'idia lugaihi ta edi ilivu luveifanega inuagivila, ta taha 'oloto omi'a nuanimia toatoa ena lugaihi aqiaqi otaqina ta 'abiboda Iona, ta gebu oda nuagivila.

^{42 p} "Wese 'idewani taha vavine kaikaiwabudi bolimana ana 'awayaqiega imai Solomoni ena alamani sabi noqolina, ta vetala'ai ana 'aubena 'inaya ina tovolu ta omi'a lagatamina ina ve'ewemi, mana taudi luluvai otaqega imai Solomoni ena alamani sabi vineneqina. Ta ba'e 'itagana taha tomotau nuanimia toatoa ena alamani qidua va'inena, ta 'abiboda Solomoni. Ta omi'a ge nuami tomotau~nana ena vona ona noqoli.

Niboana luveifana 'evivi mai taha 'oloto 'inaya
(Luke 11:24-26)

^{43 q} "Eguma niboana veifana 'oloto taha 'inega na'ifoqe, 'inega 'oloto~nana naveaqiaqi ta niboana veifana~nana nayabayaba kavokavovo go'ila geqanaya, ta ena 'ebeveyawai salisalia, ta ge ana fata nalobei. ⁴⁴ 'Inega niboana~nana taunega 'inaya vonaya, 'Ana 'ita ena 'evivi egu 'ebetoa nugwenugweina 'inaya. 'Inega 'evivi ta 'ebetoa~nana lobeia kawakawana ta vunavunaqina ta wese 'i'iva'ava'aina.

^{45 q} "Inega 'ifoqe tauya ta enavo niboana adi yau seveni luveifa otaqidi wese 'ebe'ewedi miedi, 'inega qabudi ilugu 'ebetoa~nana 'inaya itoatoa. 'Inega 'oloto~nana ena toa igiveluveifa otaqia, lova ge 'idewani. Omi'a lagata ba'ena wese 'idewani luveifami, ta tuta 'ebeluvova 'inaya emi toa naluveifa otaqa."

Ieisu inana ta wese tainavo
(Maki 3:31-35; Luke 8:19-21)

⁴⁶ Ieisu nawale yo'o 'idia vonavona ta inana be tainavo maega imai. 'Inega 'atamanaya itovotovololu ta nuanuadi Ieisu maega ina veqae.

^l 12:38 Md 16:1; Lk 11:16; Ion 6:30 ^m 12:39 Md 16:4; Mk 8:12 ⁿ 12:40 Ioa 1:17
^o 12:41 Ioa 3:5 ^p 12:42 1Kin 10:1-10 ^q 12:45 2Fit 2:20

47^rInega 'oloto taha valedi miea Ieisu 'inaya vonaya, "Inau taimwavo maega itovotovolo 'abagaya nuanuadi ina voneu."

48^rTa Ieisu 'oloto~nana ena vona ve'evivia vonaya, "Togama inagu ta tomeqabu taigwavo?" 49^rInega Ieisu nimana si'otoi yo'o~dina 'idia ta 'oloto~nana voneaya, "Ba'e tomotau diavona inagu be taigwavo. 50^r Mana tomeqabu Tamagu mahalaya ena nuanua i'abi'abibodea e taudi taigwavo be novgwavo ta wese inagwavo."

Vona sesebai witi vewanina weaqina

(Maki 4:1-9; Luke 8:4-8)

13 1^rAubena~nana 'inaya Ieisu vanuega 'ifoqe ta iqa balabalaya toabui. 2^s Ta qabu qiduadi iva'auta 'inaya tuata wagaya gelu toabui ta qabu~dina balabalaya itovotovolo. 3^rInega vona sesebaiega yani 'eala ve'itedi, ta wese vonedi vonaya, "Oloto taha tauya vaoqaya witi vewanidi sabi veyavulina. 4^rE 'inega ve'ale veyavuledi, ta vaina vewana 'edabalaya iavuta 'inega manuqa i'tedi iwebui i'ainidi. 5^rTa vaina vewana iavuta bwa'o dabodabonaya, ta 'abiboda itabo kwayavona, mana bwa'obwa'o yalayalana. 6^rTa tuta~nana baba'au vanemai 'inega guve'aligidi, mana kwalamidi ge dawebui bwa'obwa'o gamo otaqinaya. 7^rE vaina vewana talitali gamonaya iavuta ta maega itabo vefofo, 'inega talitali~nana vewaiwai ta witi ge ana fata navuaqa. 8^rTa wese vaina vewana bwa'obwa'o aqiaqina 'inaya iavuta itabo ta ivuaqa, 'inega vewana diavona 'idiega vaina ivuaqa 100 'idewani, ta vaina 60 ta wese vaina 30. 9^rTa 'eguma ma taniqami ba'e vona~nana ona noqolidi."

Vona sesebai ena 'ifoqe 'iuna

(Maki 4:10-12; Luke 8:9-10)

10^rInega Ieisu ana to'abibodayavo imai 'inaya ta ivoneaya, "Tola'ai weaqina tomotau vona sesebaiega uveve'itedi?"

11^rInega Ieisu vonaya, "Omi'a Yaubada awafelemi be vaina yani 'wai'waividi ena 'Ebeluvine weaqina ni'a oalahalamaniana, ta ba'e qabu diavona gebu. 12^t Aiqabu vaina yani 'idia nawale givetomana ago va'inena ina lobe, ta aiqabu ge yani agona 'idia, e nawale Yaubada wese na'ewa yavulea 'idiega. 13^rBa'e 'iuna 'inega vona sesebaiega yaveve'ita 'idia, mana matadiega i'ita'ita ta ge ida 'ita aqiaqiea. Ta wese ivivineneqa ta ge ida noqoli be ge ida alamaniana.

14^u "Tovesimasimana Aisea ena vona ana aqiaqi ni'a 'ifoqe, mana lova tauna ba'e tomotau diavona weaqidi madusimanea vonaya,
 'Nawale ivivineneqa ta nuadi ge da'eqa'ui,
 wese i'ita'ita ta ge ida 'itei.

15^r Mana ba'e tomotau diavona edi nuanuayavo 'eluatufa,

^r 12:50 Lom 8:29 ^s 13:2 Lk 5:1-3 ^t 13:12 Md 25:29; Mk 4:25; Lk 8:18; 19:26

^u 13:14-15 Ais 6:9-10; Ion 12:40; Via 28:26-27

ta teniqadi 'elukwawa ta wese matadi 'elukwaya.

Ta 'eguma matadiega ida 'ita'ita ta teniqadiega ida noqonoqolia
'inega ida nuagivila 'iguya be eda giveaqiaqiedi.'

¹⁶ Ta omi'a me emi qaiawa, mana matamiega o'ita'ita ta wese teniqamiega
onoqonoqolia. ¹⁷ Vonahaqiaqi, ba'e yani diavona ni'a o'itedi be onoqolidi lova
tovesimasimanayavo ta wese tomeqabu edi ilivu tunutunuqina nuanuadi
qiduana ida 'itei ta wese ida noqolia, ta ge adi fata ida lobei.

Iesu ena vona sesebai givesimalalia

(Maki 4:13-20; Luke 8:11-15)

¹⁸ "Inega vona sesebai vewana ana veyavula weaqina ana alamani ona
noqolia. ¹⁹ Eguma taha toga Yaubada ena 'Ebeluvine valena nanoqolia ta
nuana ge da'eqa'ui, e tauna 'idewani vewana~dina iavuta 'edabalaya, 'inega
toluveifana maimai ta vona diavona 'oloto~nana giwalinaya 'eno'eno 'ewa'ewa
yavuledi. ²⁰⁻²¹ Ta vaidi tomotau Valena Aqiaqina inoqolia ta lukwayavonega
me edi qaiawa iawafeledi Yaubada 'inaya. Ta 'abiboda tuta nana vita nage
vevoalana ilobea Vale~nana weaqina wese lukwayavonega edi vetumaqana
ina nogea, mana taudi kavona vewana~dina dabodabo 'inaya i'eluavuta ta
kwalamidi ge davave'abi bwa'obwa'oya. ²² Vaidi tomotau Valena Aqiaqina
inoqolia ta i'ewa aqiaqiea, ta 'abiboda bwa'obwa'o ana kaikaiwabuyavo be
wese edi toa bwa'obwa'oya weaqina nuadi 'ewea, 'inega taudi edi vetumaqana
inuafania ta ge adi fata be ina vuaqa, mana ba'e tomotau diavona kavona
vewana~dina i'eluavuta talitali gamonaya. ²³ Ta 'esi vaidi tomotau Valena
Aqiaqina inoqolia ta nuadi 'eqa'uya 'inega ivuaqa aqiaqi, ta vuaqidi vaina
100 ta vaina 60 ta wese vaina 30, mana omo'e tomotau diavona kavona
vewana~dina bwa'obwa'o aqiaqina 'inaya i'eluavuta."

Vona sesebai witi be libi weaqina

²⁴ Inega taha wese vona sesebai Iesu tomotau vonedi vonaya, "Mahala ena
'Ebeluvine kavona taha 'oloto witi vewanina aqiaqina veyavulea ena vaoqa 'inaya.
²⁵ Ta velovelovana 'inaya ena tofewayavo maega i'eno motaiva ta ana avia taha
mai vaoqaya ta libi vewanidi veyavuledi witi otaqa gamonaya, 'abo tauya. ²⁶ Yani
qabuna 'elutabo ta wese ivuaqa, 'inega tofewa diavona libi~nana i'ita 'inanea.

²⁷ "Inega tonivaoqa ena tofewayavo imai ta ivoneaya, 'Kaiwabu,
vewana aqiaqina eu vaoqaya lova uveyavuledi, ta ma'oda 'inega libi
maega itabo vinivinioya?' ²⁸ Ta tonivaoqa vonaya, 'Ba'e taha voalagu
ena viaqa.' 'Inega ena tofewayavo ivetela'aiea ivonaya, 'Ma'oda, nage
libi~dina ana luabu yavuledi?' ²⁹ Ta tonivaoqa vonaya, "Etobala, mana
'eguma libi diavona ona luabuya 'inega wese vaina witi maega ona abu
yavuledi. ³⁰ Ta 'esi bolimana ana tutaya egu toda'ayavo ena vonedi libi

° 13:16-17 Lk 10:23-24 ° 13:22 Lk 12:16-21; 1Tim 6:9-10,17

diavona ina vavutuqidi witi 'idiega, 'inega libi diavona ina gabu yavuledi, ta 'esi witi daisina ina va'auqidi ta egu sailakaya ina vedododi.' ”

Vewana goyona ana giveago vona sesebaina

(Maki 4:30; Luke 13:18-19)

³¹ Wese Iesu taha vona sesebaiega tomotau vonedi vonaya, “Mahala ena 'Ebeluvine kavona taha 'oloto te'wa vewanina na'ewei ta ena talaqa 'inaya na'wadia. ³² Vonahaqiaqi, te'wa vewanina yani goyona, ta 'eguma kana 'wadia 'inega ena tabo 'inaya yani qabuna vaoqaya naveqidua va'inedi kavona 'aiwe be 'inega manuqa ina mai ta laqanaya ina nevuqa.”

Falawa ana 'ebegiveago isiti vona sesebaina

(Luke 13:20-21)

³³ 'Inega Iesu wese vona sesebaiega vonedi vonaya, “Mahala ena 'Ebeluvine kavona taha vavine falawa ana 'ebegiveago ana wawa isiti goyona na'ewei ta falawa qidwana maega nawayavilea, 'inega falawa~nana nadidina.”

Iesu ena vona sesebai 'iuna

(Maki 4:33-34)

³⁴ Iesu tuta qabuna vona sesebaiega tomotau veve'itedi. Tauna ge taha yani davonedi mali vona 'inega, ta 'esi tuta qabuna vona sesebaiega veve'itedi. ³⁵ x Ba'e 'inega tovesimasimana taha ena vona ana aqiaqi 'ifoqe, mana lova madusimanea vonaya,

“Vona sesebaiega tomotau ena vonedi, be tola'ai yanidiavo Yaubada a'ugovaqedi bwa'obwa'o ana 'iva'ava'ata 'unuyega ena vona 'ifoqeyea 'idia.”

Iesu libi vona sesebaina givesimatalia

³⁶ 'Inega Iesu qabu diavona nogedi ta lugu vanuea, ta ana to'abibodayavo imai 'inaya ta ivonaya, “Vona sesebai libi vaoqaya ana alamani una givesimatalia 'imaya.”

³⁷ 'Inega Iesu vonedi vonaya, “Witi vewanina aqiaqina ana toveyavula, tauna ya'a Tomotau Natuna. ³⁸ Ta vaoqa~nana kavona bwa'obwa'o qabuna, ta vewana aqiaqina taudi Yaubada ena 'Ebeluvine ana tomotauyavo, ta libi taudi toluveifana ena tomotauyavo. ³⁹ Ta libi ana toveyavula bena'e Seitani. Ta bolimana ana tuta bena'e tuta ana 'ebeluvoo, ta tobolimana taudi Yaubada ena tovale'ewayavo. ⁴⁰ y Be tuta ana 'ebeluvoo 'inaya toluveifadi taudi 'idewani libi Yaubada ena tovale'ewayavo ina va'auqidi be ina gabu yavuledi.

⁴¹ z “Ta ya'a Tomotau Natuna egu tovale'ewayavo ena vetunedi be toluveifana ena tove'itayavo be ena tofewayavo ina va'auqidi ta ina

x 13:35 Same 78:2 y 13:40 Ion 15:6 z 13:41 Md 24:31; 25:31; Mk 13:27

'wavinidi Yaubada ena 'Ebeluvine 'inega. ^{42 a} Ta ina felawebuiedi 'aiwe 'ala'alaina gamonaya, ta 'inaya visiqa ina lutonovi be ina dou ta wese aladi navetalakikokiko. ^{43 b} Ta 'abiboda taudi tunutunuqidi Tamadi ena 'Ebeluvine gamonaya ina simatala baba'au 'idewana. 'Eguma ma taniqami ba'e vona~nana ona noqolia.

Yani toi vona sesebaidi

⁴⁴ "Mahala ena 'Ebeluvine ba'e 'idewani. Taha 'oloto yani kaikaiwabu otaqina lobe a bwa'obwa'o gamonaya, ta wese a'ukwaiva 'eviviea. 'Inega me ena qaiawa tauya ta ena kulufayavo qabuna vegimwaneyedi ta adi ve'ia 'ewea, 'inega bwa'obwa'o~nana gimwaneana.

⁴⁵ "Ta wese mahala ena 'Ebeluvine kavona taha tomtau nuanuana taha mwali aqiaqina nagimwaneana. ⁴⁶ Ta tuta~nana taha mwali aqiaqi otaqina lobe, e 'inega ena kulufa qabuna vegimwaneyedi be yaqisa mwali~nana ana fata nagimwaneana.

⁴⁷ "Ta wese mahala ena 'Ebeluvine 'idewani togomana edi gomana ibwa'uya lavuya, ta 'iqana taha taha i'oned. ⁴⁸ Ta tuta~nana 'iqana gomana iluveagatuna'ia 'inega ilihi vaneyea balabalaya, ta 'inega itoabui ta 'iqana qabudi ivavutuqidi. 'Inega 'iqana aqiaqidi kwalisi 'inaya ivedododi ta 'iqana veiveifadi iveyavuledi. ⁴⁹ Ta wese 'idewani tuta ana 'ebeluvina 'inaya Yaubada ena tovale'ewayavo ina mai ta tomtau luveifadi ina vavutuqidi tomtau aqiaqidi 'idiega. ^{50 c} Ta tomtau luveifadi ina felawebuiedi 'aiwe 'ala'alaina gamonaya, ta 'inaya visiqa ina lutonovi be ina dou ta aladi navetalakikokiko."

Kulufa kaikaiwabu vauvaudi ta 'itu'ituwaidi

⁵¹ 'Inega Ieisu vetala'aiedi vonaya, "Ma'oda, nage vona sesebai qabuna ba'e ni'a oalamanidi?",

ta ivonaya, "Ao, 'edewana."

⁵² Ta wese vonedia, "Inega ona alamani aqiaqiea 'eguma luvine ana tove'ita taha ni'a veto'abiboda mahala ena 'Ebeluvine weaqina, e 'inega taunana kavona taha tonivanue lugu vanue gamonaya ta ena kulufa vauvauna ta wese 'itu'ituwaina 'ewa 'ifoqeyedi."

Tomtau Ieisu inogea (Maki 6:1-6; Luke 4:16-30)

⁵³ Tuta~nana Ieisu ena vona sesebai lu'ovoidi 'inega omo'e di'we~nana nogea. ^{54 d} 'Inega 'evivi ena 'abagaya ta vanue tafwalolo 'inaya lugu ta ve'itedi. Ta tomtau qabudi nuadi voqana 'inega ivonaya, "Oloto ba'e ma'inega ena alamani 'ewei, ta wese ma'inega waiwai 'ewea 'inega

^a 13:42 Md 8:12 ^b 13:43 Dan 12:3 ^c 13:50 Md 13:42; Lk 13:28 ^d 13:54 Ion 7:15

ana fata yani 'ebenuavoqana viaviaqidi?" ^{55e} Ta wese ivonaya, "Bena'e 'oloto~nana tauna to'eyoqona natuna, waisa? Ta inana Meli ta tainavo Iemesa be Iosefa be Saimoni ta wese Iudasa, wa? ⁵⁶ Ta wese novunavo maega katoatoa. Ta ma'inega ena alamani be ena waiwai 'ewei?"

^{57f} 'Inega inogea, ta Ieisu vonedi vonaya, "Tovesimasimana adi 'amayaba ilobelobea mali 'abaga 'idia, ta edi 'abagaya ta wese edi gadeavo 'idiega ge taha 'amayaba ida lobei." ⁵⁸ 'Inega Ieisu 'abaga~nana 'inaya ge viaqa waiwaidi 'eala daviaqidi, mana ge ida vetumaqanea.

Ioni Togivebabitaiso ena 'aliga

(Maki 6:14-29; Luke 9:7-9)

14 ¹ Lova Elodi Ioni kafia ta vanue 'ebeyoqona 'inaya a'uya. Ta Ioni ana kafi 'iuna taha vavine adi wawa Elodiasa, taudi Elodi tuana Filifi moqanena. ² Ta Elodi luabuyedi 'inega vaqidi ta Ioni Elodi voneaya, "Ba'e ge ilivu aqiaqina mana tuau moqanena uvaqidi, 'inega o'a luvine ubwegea!" ^{3g} Omo'e 'iuna 'inega Elodi nuanuana vonigo Ioni naluve'aligia, ta tomotau qabudi Ioni i'awatovesimasimanea 'inega Elodi gaululu tomotau weaqidi 'inega Ioni ge daluve'aligi ta 'esi a'uluguyea vanue 'ebeyoqonaya.

⁴ 'Abiboda Elodi ena vi'oi ana 'aubena ana 'ebenuave'avina sagalina 'inaya tomotau ni'a iva'auta, ta Elodiasa natudi mevavinena qabu matadia ouou, ta ena ou weaqina Elodi qaiqaiawa. ^{5h} 'Inega Elodi iahaba~nana 'inaya vona fofofola vonaya, "Tola'ai eu nuanua e ana fata ena neiu", ta wese 'awatamatamana ba'e vona~nana weaqina.

⁶ 'Inega Elodiasa natudi 'inaya ive'awahayahaya edi nuanua weaqina, ta 'inega iahabana Elodi voneaya, "Nuanuagu Ioni Togivebabitaiso 'unu'ununa ma gaebana una neigu." ⁷ 'Inega Elodi nuana vita qiduana, ta ni'a tamada 'inanea ta wese tolusagali ena vona fofofola ni'a inoqolia 'inega iahaba~nana ena vona awafelea. ⁸ Ta ena tofewayavo luvetunedi itauya vanue 'ebeyoqona 'inaya, ta Ioni magana ida'ea. ⁹ Ta 'unu'ununa gaebaya ia'uya 'inega iahabana 'inaya imiea 'ewea, ta 'inega inana neidi. ¹⁰ Ta Ioni ana to'abibodayavo imai 'inega Ioni 'wafina i'ewei itavunia. Ta 'abiboda itauya Ieisu 'inaya, 'inega yani qabuna ivonayea Ioni weaqina.

¹¹ Ta tuta~nana toluvine Elodi Ieisu Valena noqolia, ¹² 'inega ena tofewayavo vonedia, "Omo'e 'oloto~nana ana 'ita tauna Ioni Togivebabitaiso ta 'aligega ni'a ya'itoto 'evivi, mana me ena waiwai yani 'ebenuavoqana viaviaqidi."

Qabu qiduadi Ieisu ve'ainidi

(Maki 6:45-52; Ioni 6:15-21)

¹³ Ieisu Ioni Togivebabitaiso ena 'aliga valena noqolia, 'inega 'abaga nogea ta wagaya gelu tauya di'we tomotau geqana 'inaya. Ta tomotau

^e 13:55 Ion 6:42 ^f 13:57 Ion 4:44 ^g 14:3-4 Luvi 18:16; 20:21; Lk 3:19-20

^h 14:5 Md 21:26

Ieisu ena tauya valena inoqolia, 'inega 'abaga taha taha 'idiega 'aqediega itauya 'inaya. ¹⁴Ta tuta~nana Ieisu wagega vawebui balabalaya 'inega qabu qidua va'inedi 'itedi ta nuakolokoloyedi. 'Inega tovevihiqa qabudi giveaiaqiedi.

¹⁵Ni'a velavilaviea 'inega ana to'abibodayavo imai Ieisu 'inaya ivonea ivonaya, "Kaiwabu, di'we ba'ena tomotau gegana, tuta goyona naboinia 'inega qabu ba'e una vetunedi ina tauya, ta adi 'abwaga ina gimwane omo'e 'abaganavo di'wedega."

¹⁶Ta Ieisu vonedia, "Ge ina tauya, ta 'esi omi'a 'abwaga ona neidi ina 'ai."

¹⁷'Inega ivona 'eviviea ivonaya, "Gebu, mana ima'a ama 'abwaga ge 'eala, u'itei beledi nima 'aidegana ta wese 'iqana magilafudimo."

¹⁸Ta 'inega Ieisu vonaya, "Beledi ta wese 'iqana oneigu!" ¹⁹ⁱ'Inega tomotau qabudi vonedi libia ina toabui ta beledi nima 'aidegana ta 'iqana magilafudi 'ewedi ta 'ita vane mahalaya, 'inega 'abwaga~dina weaqidi lukaiwa. Ta 'abiboda beledi gitomwedi ta ana to'abibodayavo neidi, 'inega beledi~nana tomotau 'idia ivewila'ayea. ²⁰'Inega qabudi i'ai ta gamodi 'elukoko. 'Ai gumwala, 'inega to'abiboda diavona 'awagigi iva'auqidi, ta kwalisi tuwelo iluveagatuna'idi. ²¹To'ai diavona gamodiega 'oloto dimo iavodi adi yau 5,000 'idewani, ta vivine be wese gogama qabudi ge adi avomo.

Ieisu mwade'wa debanega tauya

(Maki 6:45-52; Ioni 6:15-21)

²²'Inega ana to'abibodayavo luvetunedi wagaya ina igelu ina nugweta ta ina vaukamana mali di'wea. Ta tauna nawale tomotau qabudi vevematamagilafuyedi ina 'evivi edi 'abagaya. ^{23j}'Inega to'abiboda~dina wagaya igelu ta Ieisu qabu~dina vetunedi itauya. 'Abibodanaya tauna ana 'aidega bwanagaya 'watovu sabi venoqi Yaubada 'inaya. 'Inega ni'a velovelovanea ta Ieisu ana 'aidega toatoa. ²⁴Ta to'abiboda~dina edi waga ni'a ineyayi itete malavetaya, 'inega nufula qiduana ilobea. 'Inega edi waga 'ubuibuinia ta wese yaqina 'au'ia'iawedi.

²⁵Ta manu bodobodoya Ieisu mwade'wa debanega mai ana to'abibodayavo di'wedea 'ifoqe. ^{26k}Omo'e 'inaya Ieisu ana to'abibodayavo i'itea mwade'wa debanega maimai 'inega imwaniniva qiduana idiula ta ivonaya, "Ieii, o'itei otala omo'e maimai!"

²⁷Ta Ieisu vonedia, "Ge ona mwaniniva, ya'a ba'e taugu emi Kaiwabu."

²⁸'Inega Fita vonaya, "Kaiwabu, 'eguma vonahaqiaqi o'a tau'una e 'inega una gabegu ta mwade'wa debanega ena wai 'iuya."

²⁹Ta Ieisu voneaya, "Umai!" 'inega Fita wagega vawebui ta mwade'wa debanega ve'ale natauya Ieisu 'inaya.

ⁱ 14:19 Md 15:35-39; Mk 8:6-10 ^j 14:23 Lk 6:12; 9:28 ^k 14:26 Lk 24:37

³⁰Tuta~nana tautauya ta nufula qiduana 'itea 'inega mwaniniva ta mwade'waya ve'ale damana 'inega gaba vonaya, "Kaiwabu, uiulegu!"

³¹^l 'Inega Ieisu lukwayavonega nimana si'otoia Fita kafia ta voneaya, "Eu vetumaqana goyona, tola'ai weaqina uvenuana magilafu?" ³²'Inega magilafudi wagaya igelu ta yaqina 'avalaulihia.

³³Ta to'abiboda~dina wagaya itoatoa ihiwa'odu Ieisu 'inaya ta ivonaya, "Vonahaqiaqi, o'a Yaubada Natu Otaqina."

Ieisu tovevhiqa qabudi giveaiaqiedi Genasaleta 'inaya
(Maki 6:53-56)

³⁴'Inega ivaukamana i'ifoqe 'abaga Genasaleta 'inaya ta wagega iwawebui bwa'obwa'oya. ³⁵Ta 'abaga~nana ana totoayavo Ieisu 'ita 'inanea, 'inega valena iyawala dadanea 'abaga qabudi 'idia, ta totoa 'abaga edi tovevhiqayavo qabudi imiedi 'inaya. ³⁶^m Ta Ieisu inoqiea ivonaya, "Kaiwabu, nage ana fata tovevhiqa ba'e au kaleko matavusina ina gitonovia?" Tuata Ieisu awafeledi, 'inega aiqabu ana kaleko igitonovia e iveaiaqi.

Me Diu tubudiavo edi ilivu weaqina
(Maki 7:1-13)

15 ¹'Abibodanaya Falisi ta wese luvine ana tove'itayavo 'abaga Ielusalema 'inega imai Ieisu 'inaya ta ivoneaya, ²"Tola'ai weaqina au to'abibodayavo 'ai ana tuta 'inaya nimadi ge ida 'utu'utudi ta 'abwaga i'ai'ai, bena'ena viaqa~nana 'inega tubudavo edi ilivu iqueueunia?"

³Ta Ieisu vonedia, "Omi'a Yaubada ena luvine oqueueunia, mana tubumiavo edi ilivu o'abi'abibodea. ⁴ⁿ Yaubada ena luvine magilafuna ba'e vonaya,

'Inau ta tamau una 'amayabedi',
ta wese vonaya,

'Eguma togama tamana nage inana navona ve'alatedi
luaiaqiea be ona luve'aligia'.

⁵"Ta omi'a ovonaya 'eguma taha toga tamana ta wese inana navonedi navonaya, 'Ya'a egu kulufayavo ni'au yahawafeledi Yaubada 'inaya, 'inega gebu agu fata ena iulemi'. Ta ba'e vona~nana 'inega ovonaya be ina be tama adi 'itamaki gebu yani qiduana 'iuya. ⁶Ba'e 'idewanina tubumiavo edi luvine o'abibodea, ta Yaubada ena luvine obwegebwegea. ⁷Vonahaqiaqi, omi'a to'eu'au'ava! Lova tovesimasimana Aisea weaqimi simanayea, vonaya,

⁸^o 'Tomotau ba'e 'awadiega i'amayabegu

^l 14:31 Md 8:26; Mk 4:39 ^m 14:36 Md 9:20-21 ⁿ 15:4 'Ifo 20:12; 21:17; Luve 5:16
^o 15:8-9 Ais 29:13

ta giwalidiega itoa luluwai 'iguyega.

⁹ Ta wese 'iguya itafwalolo kavovo,
mana edi ve'ita luvine weaqina ge ya'a 'iguyega
ta 'esi tomotau edi nuenuega 'ifoqe.' ”

Ieisu ena ve'ita toyani tomotau nagivebwavudi
(Maki 7:14-23)

¹⁰ Inega Ieisu qabu qiduana gabedi imai vonedi vonaya, “Vona ba'e ona noqolia 'inega nuami na'eqa'uya! ¹¹^p 'Abwaga 'awadega ka'ai'ainidi gebu ana fata nagivebwavuda, ta 'esi eda vonayavo 'awadega i'ifoqe mai ana fata ina givebwavuda.”

¹² Inega Ieisu ana to'abibodayavo imai 'inaya ta ivoneaya, “Kaiwabu, nage Falisiavo u'itedi eu vona ba'e weaqina diadi vilea?”

¹³ Ta Ieisu vonaya, “Tamagu mahalaya toatoa 'aiwe diavona ge da'wadidi nawale ena tovale'ewayavo ina abu yavuledi. ¹⁴^q Ta Falisiavo ona nogedi, mana taudi tovanugweta matadi kwayakwayana. Ta 'eguma matakwaya taha iana wese matana kwayakwayana navanugwetea e 'inega nawale magilafudina gulia ina be'u.”

¹⁵ Inega Fita vetala'aiea vonaya, “Vona sesebai ba'e ana alamani una givesimalalia 'imaya.”

¹⁶ Ta Ieisu vonaya, “Nage omi'a wese nawale nuami ge dasimalata?
¹⁷ Mana tola'ai 'awadega ka'ai'aini ta lugulugu gamodaya e yani~nana 'abiboda tautauya avuqainaya. ¹⁸ Ta vonahaqiaqi, tola'ai tomotau giwalidiega 'ifo'ifoqe ta 'awadiega ivonavonayea, e ba'e vona diavona 'idiega ana fata taudiega ina givebwavudi. ¹⁹ Mana giwalidiega nuanua luveifadi 'ifo'ifoqe 'idewana luve'aliga be, luabu be, velamo'eno kavokavovo be, vanawala be, 'eu'au'ava ta wese awagila.
²⁰ Ba'e yani diavona tomotau gigivebwavudi, ta 'eguma nimada ge kana 'utudi 'ai ana tuta 'inaya ge ana fata nagivebwavuda.”

Kenani vavinedi edi vetumaqana
(Maki 7:24-30)

²¹ Ieisu ena viaqayavo 'abibodanaya di'we~nana nokea ta tauya di'we Taia ta Saidoni 'idia. ²² Ta di'we~nana 'inega Kenani vavinedi taha i'ifoqe imai Ieisu 'inaya ta igaba ivonaya, “Kaiwabu, o'a kini Deibida tubuna uda nuakolokoloyegu, mana niboana luveifana natugu mevavinena 'wahalia ta gigiveluveifa aqiaqiea.”

²³ Ta Ieisu vavine~dina edi gaba ge taha vona 'inega dave'evivia. 'Inega ana to'abibodayavo imai ta Ieisu ivoneaya, “Vavine~dina una vonedi ina tauya, mana edi vegabagaba 'inega igivesiniqaiqaiema.”

^p 15:11 Md 12:34 ^q 15:14 Lk 6:39; Lom 2:19

24^r Ta Ieisu vonaya, “Yaubada vetunegu yamai sifi luluve’waividi Isileli ena ’ebeluvine gamonaya adi ’aidega weaqidi.”

25^r Inega vavine~dina imai Ieisu matanaya tuqatuqadiega isobadi ta ivonaya, “Kaiwabu uda iulegu!”

26^r Ta Ieisu vonaya, “Ge daluaqiaqiei be gogama adi ’abwaga kana ’ewe’idi’ega ta kana felei kedewa ’idia.”

27^r Ta vavine~dina ivonaya, “Kaiwabu, eu vona ba’e vonahaqiaqi, ta ’abwaga salimuguna avuavuta kaiwabu ena ’ebe’aiega ’inega ena kedewayavo i’ai’ainia?”

28^r Inega Ieisu vavine~dina edi vona ve’evivia vonaya, “Vavine, emi vetumaqana waiwaina, ’inega emi venoqi ana ve’ia na’ifoqe.” Ta tuta ba’e ’inaya vavine~dina natudi veaqiaqi ’evivi.

Tovevihuqa qabudi Ieisu giveaqiaqiedi

29^r Inega Ieisu di’we~nana nogei ta lavu Galili balabalanega luvivila ta ’watovu bwanagaya ta oade toabui. 30^r Ta qabu qiduadi wese i’watovu ta edi tovevihuqayavo imiedi taudi ’aqedi luveifana be, matadi kwayakwayana be, tovenakunaku ta wese tovevihuqa ’eala Ieisu matanaya ia’udi. Ta qabudi giveaqiaqiedi. 31^s Inega qabu diavona nuadi voqana qiduana, mana tovenakunaku ivonavona be, ’aqedi luveifana itautauya ta matadi kwayakwayana wese i’ita ’evivi. Inega qabu diavona me Isileli edi Yaubada iawatuboya.

Ieisu qabu qiduadi ve’ainidi

(Maki 8:1-10)

32^t Inega Ieisu ana to’abibodayavo gabedi imai ta vonedia, “Qabu ba’ena yanuakolokoloyedi mana ni’a ’aubena toi ba’idia maega atoatoa ta ge adi ’abwagamo. Inega ge nuanuagu ma botanidi ena vetunedi ina ’evivi fole nawale ’edaya ’ai weaqina ina ’elutava.”

33^r Ta ana to’abibodayavo ivoneaya, “Di’we ba’ena tomotau gegana, ta ma’oda qabu qiduadi ba’e adi ’abwaga kana loba ’aiqei, be tola’aiega kana ve’ainidi?”

34^r Inega Ieisu vetala’aiedi vonaya, “Evisa beledi ’imia ’eno’eno?” Inega ivoneaya, “Beledi seveni ta wese vaina ’iqana goyogoyodi maega.”

35^r Inega Ieisu qabu diavona vonedi bwa’obwa’oya ina toabui. 36^r Ta beledi seveni~dina be wese ’iqana~dina ’ewedi ta vona lukaiwa Yaubada ’inaya weaqidi. Inega gitomwedi ta neidi ana

^r 15:24 Md 10:6 ^s 15:31 Mk 7:37 ^t 15:32 Md 14:14

to'abibodayavo 'idia, 'inega ivewila'ayea qabu diavona 'idia, ³⁷ta i'ai ana laba gamodi 'elukoko. 'Abibodanaya Ieisu ana to'abibodayavo 'abwaga 'awagigidi iva'auqidi, ta kwalisi seveni iluveagatuna'idi. ³⁸To'ai diavona 'oloto dimo adi yau 4,000, ta vivine be gogama ge adi avomo. ³⁹Ieisu qabu~dina vetunedi itauya, 'inega wagaya gelu ta tauya di'we Magadana 'inaya.

Tomotau nuanuadi 'ebe'ita waiwaina ina 'itea

(Maki 8:1-13; Luke 12:54-56)

16 ^{1u} Taha 'aubena 'inaya Falisiavo ta wese Sadusiavo imai Ieisu 'inaya sabi sitonovina, 'inega ivetala'aiea ivonaya, "Nage au fata 'ebe'ita taha mahalega una viaqi ana 'itea, be 'inega ana 'awahaqiaqieu vonigo eu waiwai Yaubada 'inega mai."

²'Inega Ieisu vonaya, "Omi'a 'eguma lavilavi 'inaya baba'au ona 'itea nalia'unuva ta mahala nalubwealia, 'inega ni'au oalamanian 'ibe mahala ive. ³Ta 'eguma 'awa'awai 'inaya waumana kwaukwausina mahala naumabodea ona 'itea, e 'inega ni'au oalamanian nawale 'wei na'wei. Vonahaqiaqi, mahala ana 'ita 'inega ni'a oalamanian tola'ai na'ifoqe, ta tola'ai ba'itagana matamia 'ifo'ifoqe adi alamani weaqina nuami nawale ge da'eqa'ui. ^{4v} Lagata ba'e omi'a luveifami ta wese Yaubada ge nuanuami ona alamanian. Omi'a ovetala'aiegu 'ebe'ita taha weaqina. Ta ge taha wese 'ebe'ita ena neimi, ta 'esi lona tauna ta'iwa emi 'ebe'ita." 'Inega Ieisu nogedi ta tauya.

Ieisu ena vona sesebai Falisi be Sadusi weaqidi

(Maki 8:14-21)

⁵'Inega lavu di'wenaya italaukamana ta Ieisu ana to'abibodayavo adi beledi ivenuafania ge ida 'ewei. ^{6w} 'Inega Ieisu vonedia, "Falisiavo be Sadusiavo edi isiti 'inega ona 'itamakimi."

⁷'Inega to'abiboda~dina taudiega iveqae ivonaya, "Ana 'ita Ieisu ba'e 'idewani vonavona 'aiqa, mana ada beledi ge kada 'ewei."

⁸Ta Ieisu edi nuanua ni'a alamanian 'inega vonedi, "Omi'a emi vetumaqana goyona. Tola'ai weaqina taumiega oveveqae vonigo ge ami beledimo? Ya'a ge eda vonavona beledi weaqina. ^{9x} Nage nawale nuami ge da'eqa'uya? Nage ni'a ovenuafania tuta~nana beledi faibi 'inega tomotau 5,000 yave'ainidi? Ta wese 'abwaga 'awagigidi ova'auqidi, e 'inega kwalisi 'eala oluveagatuna'idi. ^{10y} Ta wese beledi seveni 'inega tomotau adi yau 4,000 yave'ainidi, ta 'awagigidi ova'auqidi ta kwalisi 'eala oluveagatuna'idi, waisa? ¹¹'Inega tola'ai weaqina ge oda alamanian ya'a ge beledi weaqina eda vonavona? Ta 'esi

^u 16:1 Md 12:38; Lk 11:16 ^v 16:4 Md 12:39; Lk 11:29 ^w 16:6 Lk 12:1

^x 16:9 Md 14:17-21 ^y 16:10 Md 15:34-38

Falisiavo be Sadusiavo edi isiti 'inega ona 'itamakimi.” ¹² E omo'e 'inega nuadi 'eqa'uya ta ialamania Iesu ge davonedi be ina 'itamakidi beledi ana isiti weaqina, ta 'esi Falisiavo be Sadusiavo edi ve'itayavo 'idiega ina 'itamakidi.

Fita ena alamani Iesu weaqina simana 'ifoqeyea

(Maki 8:27-31; Luke 9:18-21)

¹³ Tuta~nana Iesu mai taha di'we 'abaga Sisalia Filifai di'wenaya, 'inega ana to'abibodayavo vetala'aiedi vonaya, “Ma'oda tomotau ivonavona 'aiqa ya'a Tomotau Natuna weaqigu?”

¹⁴ ^z 'Inega ive'lea ivonaya, “Vaina tomotau ivonaya be o'a Ioni Togivebabitaiso, ta vaina ivonaya be o'a Ilaitia, ta vaina ivonaya be o'a Ielemaia, ta wese vaina ivonaya nage o'a taha tovesimasimana nugwenugweina.”

¹⁵ 'Inega Iesu vetalamatanedi vonaya, “Ta omi'a, ma'oda emi nuanua vonigo ya'a togama?”

¹⁶ ^a 'Inega Saimoni Fita vona 'eviviea vonaya, “O'a To'etoyavua, Yaubada mayawaina Natuna!”

¹⁷ ^b Ta Iesu Fita vonea vonaya, “Saimoni o'a Ioni natuna, vonahaqiaqi una qaiawa, mana ba'e eu alamani ge tomotau 'idiega da'ifoqe ta 'esi Tamagu mahalaya neiu. ¹⁸ ^c Ta wese yavoneu, o'a au wawa Fita ta ana givila dabo, 'inega dabo~nana debanaya egu 'ekalesia ena yoqonia, 'inega 'aliga ena waiwai gebu ana fata egu 'ekalesia naqeuni. ¹⁹ ^d Wese mahala ena 'Ebeluvine ana 'ebesiwa'a ena neiu, 'inega tola'ai bwa'obwa'oya una yoqonia wese mahalaya Yaubada nayoqonia. Ta wese tola'ai bwa'obwa'oya una yavua wese mahalaya Yaubada nayavua.” ²⁰ Omo'e 'inaya Iesu ana to'abibodayavo vona waiwaina neidi vonedia, “Ge taha toga 'inaya ona simanegu vonigo ya'a To'etoyavua.”

Iesu ena 'aliga weaqina simana 'ifoqeyea

(Maki 8:31-9:1; Luke 9:22-27)

²¹ Tuta omo'e 'inega Iesu ana to'abibodayavo ve'ale ve'itedi vonaya, “Ya'a luaqiaqiegu be ena tauya Ielusalema 'inaya, ta visiq qiduana ena lobe'a 'abaga ana tovanugwetayavo be toveguba qiduiduadi ta wese luvine ana tove'itayavo 'idiega. Omo'e 'inaya ina luve'aligigu ta 'aubena vetoina 'inaya Yaubada nagiveyawaha 'eviviegu.”

²² 'Inega Fita Iesu 'ebe'ewei vanaqoyea ta lugwaeyea vonaya, “Kaiwabu, ba'e yani diavona gebu na'ifoqe 'iuya!”

²³ 'Inega Iesu tunugivila Fita 'inaya ta voneaya, “O'a 'idewani Seitani, 'inega unogegu! Ge una awatayegu, mana eu nuanua tomotau edi nuanua 'idewani, ta gebu Yaubada 'inega.”

^z 16:14 Md 14:1-2; Mk 6:14-15; Lk 9:7-8 ^a 16:16 Ion 6:69 ^b 16:17 Gal 1:15-16

^c 16:18 Ion 1:42; Efe 2:20 ^d 16:19 Md 18:18; Ion 20:23

^{24 e} 'Abiboda Ieisu ana to'abibodayavo vonedi vonaya, "Eguma taha toga nuanuana na'abibodegu luaqiaqiea be tauna ena nuanua nanogea 'inega taunega ana 'etoluai na'avalea ta na'abibodegu. ^{25 f} 'Inega togama yawaina navedagalea nawale yawaina naluve'waivia, ta togama yawaina weaigigu nahawafelea nawale yawai aqiaqina nalobea. ^{26 s} 'Eguma taha toga bwa'obwa'o ana kulufayavo qabudi na'ewedi ta 'abiboda na'aliga, tola'ai ana aqiaqina? Mana ge ana fata yawaina na'ewa 'eviviei ena kaikaiwabu 'idiega.

^{27 h} "Nawale ya'a Tomotau Natuna egu tovale'ewayavo maega ana 'evivi ana mai Tamagu ena simatala kaikaiwabuna 'inega, ta tomotau edi viaqayavo ana ve'ia ena neidi. ²⁸ Yavona aqiaqi 'imia, nawale tomotau vaina 'imiega gebu ona 'aliga ana laba ya'a Tomotau Natuna kavona Kini ena 'evivi ena mai me egu luvine."

Ieisu ana 'ita vedumaduma

(Maki 9:2-3; Luke 9:28-36)

17 ¹ Aubena sikisi gumwala Fita ta wese Iemesa ma taina Ioni, Ieisu 'ebe'ewedi maega i'watovu bwanaga taha kuena debanaya. ^{2 i} Itoatoa 'inega matadia Ieisu ana 'ita vedumaduma ta 'iawana simatala baba'au 'idewana, ta wese ana kaleko luwadaeyea ana 'ita namanamala otaqina. ³ Ta ba'e tuta~nana 'inaya Mosese be Ilaitia i'ifoqe imai ta Ieisu maega iveveqae. ⁴ 'Inega Fita Ieisu 'inaya vonaya, "Kaiwabu, ba'idia ana toa aqiaqi otaqina, 'inega 'eguma nuanuau didi toi ena yoqonidi taha o'a weaqui, taha Mosese weaqina ta wese taha Ilaitia weaqina."

^{5 j} Fita nawale vonavona, 'inega gawata wadawadaea otaqina umedi 'inega taha bona gawatega 'ifoqe vonaya, "Ba'e Natu otaqigu, tauna weaqina yaqaiawa qiduana. 'Inega tauna ena vona ona noqolia."

⁶ Ta to'abiboda~dina vona~nana inoqolia 'inega imwaniniva ge goyo ta igivelukabwebwe bwa'obwa'oya. ⁷ 'Inega Ieisu mai gitonovidi vonedi vonaya, "Ge ona mwaniniva, oya'itoto!" ⁸ Ta tuta~nana itunuvane Ieisu ana 'aigeda tovtovolo i'itea.

⁹ Tuta~nana bwanagega iwebui mai 'inega Ieisu luvine waiwaina neidi vonedi vonaya, "Yani diavona ni'a o'itedi ge taha toga 'inaya ona vonavonayei ana laba ya'a Tomotau Natuna 'aligega ena ya'itoto 'evivi."

^e 16:24 Md 10:38; Lk 14:27 ^f 16:25 Md 10:39; Lk 17:33; Ion 12:25 ^s 16:26 Md 4:8-9

^h 16:27 Md 25:31; Same 62:12; Vos 24:12; Lom 2:6; Ve 22:12 ⁱ 17:2 2Fit 1:16-18

^j 17:5 Same 2:7; Ais 42:1; Md 3:17; Mk 1:11; Lk 3:22; Luve 18:15

10 ^k Ta Iesu ana to'abibodayavo ivetala'aiea ivonaya, "Tola'ai weaqina luvine ana tove'itayavo ivonavona Ilaitia nanugweta namai ta 'abiboda To'etoyavua namai?"

11 'Inega Iesu vonaya, "Vonahaqiaqi, Ilaitia nugweta namai, 'inega yani qabudi nagivetunuqidi, 12 ^l ta yavona aqiaqiemi Ilaitia~nana ni'a mai ta tomotau ge ida 'inanea, ta 'esi iveyani kavokavovoyea edi nuenuega, nawale wese ya'a Tomotau Natuna 'idewani ina veilivu 'aiqegu." 13 ^m 'Inega to'abiboda~dina inuaia Iesu Ioni Togivebabitaiso weaqina vonavona 'idia.

Taha gwama niboana luveifana 'wahalia Iesu giveaqiaqiea
(Maki 9:14-29; Luke 9:37-43a)

14 'Inega Iesu ana to'abibodayavo maega imai qabu 'idia, ta taha 'oloto mai ta tuqatuqanega sobadi Iesu 'iawanaya, 15 ta vonea vonaya, "Kaiwabu, natugu me'olotona una nuakolokoloyea, mana lugelabo 'ewea 'abo tuta qabuna vevekaoya ta tafetafefwai. Ta wese 'wafina visivisiqa qiduana, 'inega vaina tuta be'ube'u 'aiwe 'ala'alaina 'inaya ta wese go'ilaya. 16 'Inega au to'abibodayavo 'idia yamiea ta ge adi fata ida giveaqiaqiei."

17 Ta Iesu vonedi, "Omi'a ma'oda? Debami 'i'wanina! Nage ge oda vetumaqanegu, waisa? Ta emi deba 'i'wana 'inega 'wafigu siniqaiqi. Omiei gwamana eda 'itei!"

18 'Inega Iesu niboana luveifana luvetunei 'ifoqe gwama~nana 'inega, ta tuta ba'e 'inega veaqiaqi 'evivi.

19 ⁿ 'Abiboda Iesu ana to'abibodayavo adi 'aidega imai 'inaya ivetala'aiea ivonaya, "Kaiwabu, tola'ai weaqina ima'a ge ama fata niboana luveifana ada 'wavi 'ifoqeyei?"

20 ^o Ta Iesu vonaya, "Omi'a emi vetumaqana dawalilina, 'inega ge ami fata. Ta yavona aqiaqiemi, 'eguma emi vetumaqana kavona te'wa vewanina ana fata 'idewana, e 'inega meaqana 'imia be bwanaga omo'e 'inaya ona vonaya, 'Ba'inega utoaiqo oi'idia! ta namatayagemi. 'Inega ami fata yani qabuna ona viaqia. 21 Ta yavona aqiaqiemi, noqi ta wese vedede 'inega ami fata ba'e niboana diavona ona 'wavi 'ifoqeyedi. Ta ge taha wese yani 'inega."

Iesu ena vona vemagilafuna ena 'aliga weaqina
(Maki 9:30-32; Luke 9:43b-45)

22-23 ^p Tuta~nana Iesu ana to'abibodayavo maega di'we Galili 'inaya itoa va'auta, 'inega vonedi vonaya, "Ya'a Tomotau Natuna nawale agu

^k 17:10 Mal 4:5 ^l 17:12 Md 11:14 ^m 17:13 Lk 1:17 ⁿ 17:19 Md 10:1 ^o 17:20 Md 21:21; Mk 11:23; Lk 17:6; 1Kol 13:2 ^p 17:22-23 Md 16:21

tosuluva nave'ineiegu tomotau 'idia be ina luve'aligigu, ta 'aubena vetoina 'inaya Yaubada mayawaigu nagiveya'itoto 'eviviegu." 'Inega Ieisu ana to'abibodayavo nuadi vita qiduana ba'e vonana weaqina.

Vanue Gwalagwalana ana takesi weaqina

²⁴ Tuta~nana Ieisu ma ana to'abibodayavo imai 'abaga Kafaneumi 'inaya, 'inega Vanue Gwalagwalana ana takesi ana to'ewa imai Fita 'inaya ivetala'aiea ivonaya, "Ma'oda, nage eu tove'ita taketakesi, nage gebu?"

²⁵ Ta Fita vonaya, "E, tauna ena takesi a'ua'uya."

'Inega lugu vanuea ta Ieisu iana Fita vetala'aiea vonaya, "Saimoni, ma'oda unuanua 'aiqa bwa'obwa'o ana toluvineavo weaqidi? Aiqabu 'idiega takesi i'ewe'ewei, taudi edi tomotau 'idiega, nage mali tomotau 'idiega?"

²⁶ 'Inega Fita vonaya, "Mali tomotau 'idiega."

'Inega Ieisu wese vona 'evivi vonaya, "Vonahaqiaqi, ta ba'e ilivu~nana 'inega edi tomotauyavo edi toa igigivemeaqania. ²⁷ Ta takesi ana to'ewayavo adi lutonova ge kana giveluveifei. 'Inega bani una 'ewei ta una tauya lavuya ta 'iqani~nana umadu'onea e 'awana una gila'ei, 'inega mane una lobe a ta una 'ewei. 'Inega una tauya takesi ana to'ewa 'idia ta mane~nana una neidi ita'a weaqida."

Togama ana wawa 'ena'ina mahala ena 'Ebeluvine gamonaya?

(Maki 9:33-37; Luke 9:46-48)

18 ¹ 'Aubena omo'e 'inaya Ieisu ana to'abibodayavo imai ta ivetala'aiea ivonaya, "Kaiwabu, togama ana wawa 'ena'ina mahala ena 'Ebeluvine gamonaya?"

² 'Inega Ieisu taha gwama gabei mai ta nuanidia vetovoloi, ³⁻⁴ s vonedia, "Yavona aqiaqiemi, omi'a 'eguma ona nuawebui gwama ba'ena 'idewani, 'inega omi'a ami wawa nave'ena'i mahala ena 'Ebeluvine gamonaya. Ta 'eguma ge ona nuawebui gogama goyogoyodi 'idewani, e nawale ge wese ona lugu 'Ebeluvine~nana 'inaya. ⁵ ^t 'Inega 'eguma togama taha gwama kavona ba'e gwama~nana na'ebe'ewea ya'a agu wawega, e tauna ya'a wese 'ebe'ewegu.

Siteonova luveifana ana viaqa weaqina

(Maki 9:42-48; Luke 17:1-2)

⁶ "Ta 'eguma taha tomotau ba'e gwama nana 'idewani nagivebe'uyea be ena vetumaqana 'iguya nanogea, e 'inega tomotau~nana luaqiaqiea be dabo agona 'ebefiaqa maganaya ina yoqoni, ta ma dabona ina

^q 17:24 'Ifo 30:13; 38:26 ^r 18:1 Lk 22:24 ^s 18:3-4 Md 19:14; Mk 10:15; Lk 18:17

^t 18:5 Md 10:40; Lk 10:16; Ion 13:20

felawebuiea malavetaya nadamana nawebui. ⁷Omi'a totoa bwa'obwa'o nuakolokolomi, mana 'ebebe'u 'eala 'eno'enova. Vonahaqiaqi, sitonova tuta qabuna 'ifo'ifoqe, ta 'eguma taha 'oloto enavo sitonovega nagivebe'udi e nawale 'oloto~nana veilage qiduana nalobea.

⁸u "Ta 'eguma nimau nage 'aqeu ina givebe'uyeu 'inega una da'a yavuledi. Mana ge taha ana luveifana 'eguma nimau nage 'aqeu da'ada'adi ta yawai vataya una lobea, ta 'esi ge taha au luaqiaqi 'eguma ma bubuyau ina felawebuieu 'aiwe 'ala'alata vatayana 'inaya. ⁹Matau wese 'idewani 'eguma nagivebe'uyeu una bwaqi yavulea. Luaqiaqieu 'eguma matau 'aidegana ta yawai vataya una lobea, ta ge daluaqiaqieu 'eguma matau magilafudi ta ina felawebuieu 'aiwe 'ala'alata vatayana 'inaya.

¹⁰v "Gogama ba'e 'idewanina gebu taha 'idiega ona dikinekini. Yavona aqiaqi 'imia, gogama qabudi edi tovale'ewayavo tuta qabuna mahalaya Tamagu 'iawanaya itoatoa ta i'ite'itea.

Vona sesebai sifi luluve'waivina weaqina

(Luke 15:3-7)

¹¹w "[Ta ya'a Tomotau Natuna yamai luluve'waividi sabi 'etoyavuidi.] ¹²Ta ona nuaia 'eguma taha 'oloto ena sifiavo adi yau 100 ta 'aigedana 'idiega naluve'waiva, 'inega ma'oda naviaqa 'aiqa? Yavona aqiaqiemi, nawale 99~dina bwanaga veanaya navalovedi ina toatoa ta natauya luluve'waivi~nana sabi salina. ¹³Ta yavona aqiaqiemi, tuta~nana naloba 'eviviea 'inega naqaiawa qiduana, ta 'abiboda 99~dina, mana taudi aqiaqidi itoatoa. ¹⁴'Inega ona alamani aqiaqiea, Tamami mahalaya ge nuanuana gogama ba'e 'idiega taha naluve'waiva tomotau edi sitonova 'inega.

Luveifana ana givetunuqa weaqina

¹⁵x "Eguma iau luveifana naviaqia 'iuya, 'inega una tauya 'inaya ta magilafumi ami 'aidega ena luveifana ona givetunuqa. Ta 'eguma eu vona nanoqolia 'inega ni'a maega oveiana 'evivi. ¹⁶y Ta 'eguma ge nuana be eu vona nanoqoli 'inega tomotau 'aidegina nage magilafudi una 'ebe'ewedi ta maega ona tauya iau 'inaya. 'Inega o'a eu ve'ewa iau 'inaya una simana 'ifoqeyea togivetunuqa magilafudina matadia, 'inega taudi adi fata ve'ewa~nana ina alamani aqiaqiei be ina 'awahaqiaqieu. ¹⁷Ta 'eguma ge nuanuana emi vona nanoqoli 'inega iau~nana ona tauyea 'ekalesia 'idia ta vita~nana weaqina ona vematamagilafuyedi. Ta 'eguma ge nuanuana edi vona nanoqoli 'inega ona nogea natoa 'ifoqe 'idewani takesi ana to'ewayavo, nage aiqabu ge Yaubada ida vetumaqanea.

u 18:8 Md 5:29-30 v 18:10 Ibe 1:14 w 18:11 Lk 19:10 x 18:15 Lk 17:3; Gal 6:1

y 18:16 Luve 19:15; Ion 8:17

^{18 z} “Yavona aqiaqi 'imia, 'eguma tola'ai bwa'obwa'oya oyoqoyoqonidi 'inega yani diavona nawale wese mahalaya Yaubada nayoqonidi. Ta wese 'eguma tola'ai bwa'obwa'oya oyavuyavuidi nawale yani diavona wese mahalaya Yaubada nayavuidi.

^{19 a} “Ta wese yavonemi, 'eguma bwa'obwa'oya tomotau magilafumi taha yani weaqina nuanua 'aideganega ona venoqi Yaubada 'inaya, e 'inega Tamagu mahalaya emi nuanua nave'iea. ²⁰ Mana 'eguma tomotau magilafudi nage toidi agu wawega ina toava'auta, 'inega ya'a wese nuanidia yatoatoa.”

Nuataqo weaqina

²¹ 'Inega Fita mai ta leisu vonea vonaya, “Kaiwabu, 'eguma iagu tuta qabuna 'iguya luveifana viaviaqia 'inega 'evisa tuta ena nuataqoi, nage tuta seveni ana yau?”

^{22 b} Ta leisu vonaya, “Ge seveni ana yau, ta 'esi tuta qabuna una nuanuataqoya, ²³ mana nuataqo ilivu~nana ba'e 'idewani mahala ena 'Ebeluvine 'inaya, ovivineneqa! Toluvine qiduana taha nuanuana ena tofewayavo adi aga ana buki na'itea 'inega nahalamani aqiaqiea 'evisa mane lova i'ewei 'inega.

²⁴ “Ta buki~nana 'ite'itei, 'inega ena tofewa taha imiea 'inaya, ta tofewa~nana ana aga 'evisa milioni 'idewani. ²⁵ Ta ge ana fata nave'iei, 'inega ena kaiwabu luvinea vonaya, 'O'a eu susuyavo maega emi kulufa qabuna ona vegimwaneyedi be mane~nana una neigu au aga weaqina!’ ²⁶ Ta tofewa~nana me ena nuavita tuqatuqanega sobadi venoqi 'inaya vonaya, 'Kaiwabu, tua uda nuakolokoloyegu ta nawale aga~nana ena vemaia 'eviviea 'iuya.’ ²⁷ 'Inega kaiwabu~nana nuakolokoloyea ta ana aga qabuna nuataqoya, ta 'inega awafelea webui tauya.

²⁸ “Tofewa~nana ni'a webui, 'inega iana taha 'ita lobeia, ta tauna ana aga goyona kavona 'aubena 'aidegana ana ve'ia lova 'inega 'ewea. 'Inega maganaya kafi givegaululuya ta voneaya, 'O'a au aga ba'itagana una ve'iea 'iguya!’ ²⁹ 'Inega iana tuqatuqanega sobadi ta venoqiea vonaya, 'Tua uda nuakolokoloyegu ta nawale aga~nana ena vemaia 'eviviea 'iuya.’ ³⁰ Ta ena venoqi ge danoqolia ta 'esi vanue 'ebeyoqona 'inaya a'uluguyea be omo'e 'inaya natoa ana laba ana aga qabuna nalu'ovoa.

³¹ “Ta wese vaidi tofewa ba'e ilivuna i'itea 'inega nuadi vita qiduana. 'Inega itauya edi kaiwabuna 'inaya ta yani qabuna ni'a i'itea isimana 'ifoqeyea. ³² 'Inega kaiwabu~nana ena tofewa gabei mai ta voneaya, 'O'a tofewa veifa otaqiu, mana uvenoqiegu vonigo au aga qabuna ena nuataqodi, ta eu nuanua ni'a yaviaqia. ³³ 'Inega o'a wese luaqiaqieu 'eguma iau~nana uda nuakolokoloyea be ana aga 'iuya uda nuataqoi

^z 18:18 Md 16:19; Ion 20:23 ^a 18:19 Mk 11:24; Ion 15:7 ^b 18:22 Nug 4:24; Lk 17:4

'idewani ya'a ni'a yaviaqia 'iuya, waisa?' ^{34c} 'Inega kaiwabu~nana diana vilei ta vanue 'ebeyoqona ana to'itamakiavo luvinedi ba'e tofewa~nana vanue~nana 'inaya wese ina a'uluguyea, ta ina luvematasabuya ana laba ana aga~nana qabuna navemaisa 'ovoia." ^{35d} 'Inega Ieisu ena vona lu'ovoia vonaya, "Tamagu mahalaya wese ba'e 'idewani naviaqa 'aiqa 'imia 'eguma emiavo ge ona nuakolokoloyedi be edi luveifayavo ona nuataqodi."

Ieisu ena ve'ita sa'ila weaqina
(Maki 10:1-12)

19 ¹Tuta~nana Ieisu ba'e ve'ita diavona lu'ovoia, 'inega di'we Galili nogei ta lugu di'we Iudia gamonaya, ta taha di'we 'inaya toatoa go'ila Iolidani di'wenaya. ²'Inega qabu qiduadi Ieisu i'abibodea, ta omo'e 'inaya tovevhiqa qabudi giveaqiaqiedi.

³Ta Falisiavo imai Ieisu 'inaya sabi sitonovina, 'inega ivetala'aiea ivonaya, "Nage ana fata taha 'oloto taunega ena 'iu kavokavovo 'inega moqanena navesa'ilidi?"

^{4e} Ta Ieisu edi vona ve'evivia vonaya, "Ni'a oalamanian Buki Nugwenugweina 'inaya i'wayavia tuta 'ebeve'ale 'unu 'inaya To'iva'ava'ata tomotau magilafudi viaqidi me'olotona ta wese mevavinena", ^{5f} ta vonaya, "Ba'e 'iuna 'inega 'oloto tamana wese inana nanogedi ta moqanena maega ina luvetuba, 'inega magilafudi 'wafidi nave'aidega. ⁶Lova edi toa kavona magilafudi 'idewani, ta 'esi ba'itagana 'wafidi ni'a ve'aidega, 'inega tola'ai Yaubada ni'a luvetubea ge taha toga navetoasi'iei."

^{7g} 'Inega Falisi ivonaya, "Tola'ai weaqina Mosese ena luvine a'uya vonigo 'oloto taha ana fata leta 'inaya ena noga na'wayavia ta moqanena naneidi 'inega nasa'ilidi?"

⁸Ta Ieisu vonedi, "Emi vedeba 'i'wana weaqina Mosese awafelemi be moqanemiavo ona vesa'ilidi. Ta lova tuta ana 'ebeve'ale 'inaya gebu wese taha awafela da'eno'eno sa'ila weaqina. ^{9h} Ta yavonemi, 'eguma taha 'oloto moqanena ge taha luveifana ida viaqi ta tua moqanena navesa'ilidi ta navaqi ukamana mali vavine 'inaya, e 'inega 'oloto~nana luabu ilivuna ni'a viaqia."

¹⁰'Inega Ieisu ana to'abibodayavo ivoneaya, "Eguma vaqi ana luvine ba'e 'idewani 'inega luaqiaqiea be ge taha toga navaqi."

¹¹Ta Ieisu vonedi, "Ve'ita ba'e gebu tomotau qabudi adi fata be ina 'awahaqiaqiedi, ta 'esi tomeqabu Yaubada alamani ni'a neidi ba'e yani diavona weaqina, e taudi adi fata ve'ita~nana ina 'awahaqiaqiedi.

^c 18:34 Md 5:25-26 ^d 18:35 Md 6:15; Mk 11:25; Efe 4:32; Kol 3:13 ^e 19:4 Nug 1:27; 5:2
^f 19:5 Nug 2:24; Efe 5:31 ^g 19:7 Luve 24:1-4; Md 5:31 ^h 19:9 Md 5:32; 1Kol 7:10-11

¹² Tomotau vaina ge ida vaqi edi 'iu taha taha 'idiega. Nage taha 'oloto tubu veiveifana 'inega ge ana fata navaqi, ta wese taha 'oloto ge ana fata navaqi mana vaina tomotau yani ni'a iviaqia 'wafina 'inaya. Ta wese taha 'oloto taunega vaqi nogea, mana nuanuana Yaubada weaqina navetofewa. 'Inega 'eguma taha toga ba'e vona~nana na'awahaqiaqiedi e 'inega ona awafelea be na'awahaqiaqiedi."

Ieisu gogama vona veyolubedi

(Maki 10:13-16; Luke 18:15-17)

¹³ 'Inega tomotau gogama imiedi Ieisu 'inaya nuanuadi nagitonovidi be weaqidi nanoqi Yaubada 'inaya. Ta ana to'abibodayavo tomotau diavona gogama imiedia iawatayedi. ¹⁴ Ta Ieisu vonedi vonaya, "Gogama ona awafeledi be ina mai 'iguya, ta ge ona 'etobodedi, mana gogama ba'e 'edewanina mahala ena 'Ebeluvine taudi weaqidi." ¹⁵ 'Inega Ieisu gogama diavona gitonovidi ta vona veyolubedi, 'inega 'abaga~nana nogei ta tauya.

Taha 'oloto kaikaiwabuna weaqina

(Maki 10:17-31; Luke 18:18-30)

¹⁶ 'Abiboda 'oloto taha mai Ieisu 'inaya ta vonaya, "Tove'ita, tola'ai aqiaqina ena viaqi be 'inega yawai vataya ena 'ewei?"

¹⁷ Ta Ieisu vonaya, "Tola'ai weaqina uvevetala'aiegu ilivu aqiaqina ana viaqa weaqina? Mana Yaubada ana 'aidega aqiaqi otaqina toatoa, ta 'eguma nuanuau yawai vataya una lobe a 'inega tauna ena luvineavo una 'abibodedi."

¹⁸ ^k 'Inega 'oloto~nana vetala'aiea vonaya, "Isana 'ai luvine?"

'Inega Ieisu vonea, "Ge una luve'aliga, ge una luabu, ge una vanawala, ta wese kotu ana tuta 'inaya iau ge u'avega una ve'ewa kavovoi. ¹⁹ ^l Ta tamau be inau una 'amayabedi, be wese emwavo una veyolubedi 'idewani tau'u uveveyolubeu."

²⁰ 'Inega 'oloto~nana vonaya, "Luvine ba'e qabudi ni'a ya'abiboda aqiaqiedi, ta tola'ai wese ena viaqi?"

²¹ 'Inega Ieisu voneaya, "Eguma nuanuau eu ilivu navetunutunuqa aqiaqi 'inega una 'evivi eu 'abagaya be eu kulufa qabudi una vegimwaneyedi. Ta mane~nana una 'ewei una vewila'ayea lukwalukwa 'idia, ta 'inega una mai una 'abibodegu, be 'inega kaikaiwabu mahalaya una lobe a."

²² 'Oloto~nana Ieisu ena vona ba'e noqolia 'inega me ena nuavita 'evivi tauya, mana ena kulufayavo vegagaledi.

²³ 'Inega Ieisu ana to'abibodayavo vonedi, "Yavona aqiaqiemi, taudi tovekaikaiwabu edi lugu Yaubada ena 'Ebeluvine 'inaya vitana. ²⁴ Ta wese

ⁱ 19:14 Md 18:2-3 ^j 19:17 Luvi 18:5; Lk 10:28 ^k 19:18 'Ifo 20:13-16; Luve 5:17-20

^l 19:19 'Ifo 20:12; Luvi 19:18

yavonemi yubai kameli ena lugu saima vetoana 'inega vitana, ta taudi tovekaikaiwabu edi lugu Yaubada ena 'Ebeluvine 'inaya vita otaqina."

²⁵ Iesu ana to'abibodayavo ena vona ba'e inoqolia 'inega nuadi voqana qiduana ta ivonaya, "Eguma vonahaqiaqi ba'e 'idewanina, 'inega togama ana fata 'etoyavua nalobei?"

²⁶ Ta Iesu 'itedi ta vonaya, "Yani ba'e tomotau ge adi fata, ta Yaubada 'inaya yani qabuna ana fata!"

²⁷ Inega Fita vonaya, "Kaiwabu, ta ima'a ma'oda, mana ema kulufayavo qabudi ni'au anogedi ta a'abi'abibodeu?"

²⁸ Ta Iesu vonedia, "Vonahaqiaqi, nawale bwa'obwa'o ana givevauvau 'inaya ya'a Tomotau Natuna agu galiva kaikaiwabuna 'inaya ena toabui. Ta omi'a agu to'abibodayavo ami galiva tuwelo 'idia wese ona toabui, be me Isileli edi gade tuwelo ona luvinedi.

²⁹ "Eguma tomeqabu omi'a emi vanueavo nage taimiavo nage novumiavo nage tamamiavo be inamiavo nage natumiavo nage ami talaqayavo onogedi ya'a weaqigu, 'inega ba'e yani diavona ni'a onogedia nawale ona loba 'eviviedi ma ana luvetomana, ta wese yawaimi vataya maega. ³⁰ Ta tomeqabu ba'itaga inugwenugweta nawale 'eala 'idiega ina 'abiboda, ta taudi ba'itaga i'abi'abiboda nawale ina nugweta.

Vaoqa ana tofewa adi ve'ia weaqina

20 ¹ "Mahala ena 'Ebeluvine ba'e 'edewana: Taha 'oloto 'awa'awai otaqaya ya'itoto tauya 'abaga 'ebetoava'auta 'inaya ta vaina tomotau gaba va'auqidi imai ta vetala'aiedi sabi fewa ena vaoqa 'inaya. ² Inega iveqae adi ve'ia weaqina, ta tonivaoqa awafela adi ve'ia 'aubena 'aidegana weaqina nawale naneidi. 'Inega vetuned i tauya ena vaoqaya sabi fewa.

³ "Inega baba'au tawa vanemai, 'inega tonivaoqa~nana 'evivi tauya 'abaga 'ebetoava'auta 'inaya, 'inega vaina tomotau 'itedi itoatoa kavokavovo, ⁴ inega gabedi vonaya, 'Omi'a wese kana tauya egu vaoqaya ona fewa ta ami ve'ia aqiaqina 'iba'igo ena neimi.' 'Inega maega itauya vaoqaya. ⁵ Ta baba'auya ta wese 'idewani baba'au yewavilea 'inaya 'evivi tauya 'ebetoava'auta~nana 'inaya, ta wese vaina tomotau lobedi 'inega 'ebe'ewedi tauyedi vaoqaya sabi fewa. ⁶ Inega wese lavilavi lu'evivi tauya ta vaina tomotau wese lobedi vetala'aiedi vonaya, 'Tola'ai weaqina 'aubena qabuna ba'idia otoatoa kavokavovo?"

⁷ "Ta 'inega ivoneaya, 'Ima'a ge taha toga dagabema fewa weaqina.'

"Inega tonivaoqa vonaya, 'Omai, omi'a wese egu vaoqaya ona fewa.'

⁸ "Tuta~nana ni'a velovanea 'inega tonivaoqa ena tofewa adi to'itamaki vonea vonaya, 'Tofewa qabudi una gabedi ina mai adi ve'ia

^m 19:26 Iob 42:2 ⁿ 19:28 Md 25:31; Lk 22:30; Ve 3:21 ^o 19:30 Md 20:16; Lk 13:30

^p 20:8 Luvi 19:13; Luce 24:15

una neidi. Ta taudi i'abiboda imaia 'idiega una ve'ale una maduneidi, 'inega natauya ana laba una lu'ovoa tonugweta 'idia.'

9^a“Tomeqabu lavilavi 'inaya imai ive'ale ifewa adi ve'ia 'aubena 'aigedana weaqina i'ewea. 10^aInega tofewa nugwenugweidi 'awa'awai 'inaya ive'ale ifewa ivonaya be adi ve'ia ma ana givetomana ina 'ewei, ge taudi imai 'abibodadia adi ve'ia 'idewani. Ta gebu, mana taudi wese ve'ia 'aubena 'aidegana weaqina i'ewea. 11^aInega adi ve'ia i'ewea i'itea ta weaqina ge ida qaiawa, 'inega tonivaoqa 'inaya ilugwae ivonaya, 12^aTomotau vauvaudi imai ifewa tuta kusakusana, ta ima'a 'aubena kuena wese baba'au valema ta afewa, 'inega ama ve'ia agona ada 'ewea. Ta ma'oda 'inega ama ve'ia lelelea alobei?”

13^a“Inega tonivaoqa tofewa taha voneaya, 'agu, ge taha luveifana eda viaqi 'imia, mana egu awafela ami ve'ia 'aubena 'aidegana weaqina tawadega yavonemi ta o'awahaqiaqiea, waisa? 14^aInega au ve'ia ba'e una 'ewea una tauya. Ya'a egu luvine ba'e 'idewani, tomeqabu imai lavilavi adi ve'ia yaneidi o'a wese au ve'ia 'idewana. 15^aVonahaqiaqi, ya'a luaqiaqiegu be egu 'ebeluvine 'inaya agu 'aidega yaluluvine, waisa? Ta omi'a egu veyoluba tomotau 'idia weaqina ge ona nualuveifa.’ ”

16^a Ta Ieisu ena vona lu'ovoa vonaya, “Inega aiqabu i'abi'abiboda nawale ina nugweta, ta aiqabu inugwenugweta nawale ina 'abiboda.”

Ieisu ena vona vetoina ena 'aliga weaqina

(Maki 10:32-34; Luke 18:31-34)

17^aTuta~nana Ieisu Ielusalema weaqina nawale 'wato'watovu 'inega ana to'abibodayavo tuwelo vanaqoyedi 'eda nanavinaya ta vematamagilafuyedi, 18^a vonaya, “Katautauya oade Ielusalema 'inaya ta ya'a Tomotau Natuna ina ve'ineiegu toveguba qiduquadi be luvine ana tove'itayavo 'idia. Ta taudi ina luvine egu 'aliga weaqina. 19^aInega 'abiboda ina ve'ineiegu taudi ge me Diu 'idia, ta ina givenu'wegu be wayoyega ina vunuqa dadanegu, 'inega 'etoluai 'inaya ina tutuve'ewegu. Ta 'aubena vetoina 'inaya Yaubada 'aligega nagiveya'itoto 'eviviegu.”

Ieisu ena ve'ita vetofewa weaqina

(Maki 10:35-45)

20^aInega Sebedi moqanena ma natudiavo imai Ieisu 'inaya ta tuqatuqadiega isobadi nuanuadi Ieisu ina venoqiea taha yani weaqina. 21^a 'Inega Ieisu vonaya, “Tola'ai nuanuami?”

'Inega vavine~dina ivonaya, “Egu nuanua be natugwavo una awafeledi eu 'Ebeluvine gamonaya di'weuya ina toabui taha au 'ataqia ta taha au kelia.”

^a 20:16 Md 19:30; Mk 10:31 ^r 20:18 Md 16:21; 17:22-23 ^s 20:21 Md 19:28; Lk 22:30

22 ^t 'Inega Ieisu natudiavo vonedia, "Omi'a emi noqi ba'e ana alamani aqiaqi ge oda 'ewei, mana nawale visiqa vedina 'inega ena numa. Nage omi'a wese ami fata vedi~nana 'inega ona numa?"

Ta ivonaya, "Ama fata."

23 'Inega Ieisu vonaya, "Vonahaqiaqi, vedi~nana 'inega ena numa omi'a wese 'inega ona numa. Ta ge agu fata tomotau ena venua'ivinidi aqabu nawale egu 'Ebeluvine 'inaya agu 'ataqiega wese agu keliega ina toabui. Ta 'esi Tamagu ana 'aigeda 'ebetoa diavona ni'a 'iva'ava'aidi tomotau weaqidi."

24 'Inega to'abiboda ediavo adi yau teni, Iemesa ma taina Ioni edi noqi inoqolia 'inega diadi vilea. 25 ^u 'Inega Ieisu gaba va'auqidi vonedi vonaya, "Omi'a ni'a oalamanian bwa'obwa'oya toluvine qiduquduadi edi tomotauyavo tuta qabuna iluviluvinedi ta luvine falafalana ineineidi. 26 ^v Egwavo, omi'a ge wese 'idewana ona veilivu 'aiqa. Ta 'esi 'eguma taha toga 'imiega nuanuau una vetoluvine, 'inega emwavo weaqidi una vetofewa.

27 "Ta wese 'eguma togama 'imiega nuanuau una vetovanugweta 'inega luaqiaqieu emwavo weaqidi una vetofewa. 28 ^w Wese 'idewana ya'a Tomotau Natuna ge eda mai bwa'obwa'oya be vonigo tomotau weaqigu ina vetofewa, ta 'esi yamai sabi vetofewa tomotau weaqidi, ta wese ni'a yahawafelegu be ena 'aliga tomotau qabumi ami 'etoyavua weaqina."

Matakwaya magilafudi Ieisu giveaqiaqiedi

(Maki 10:46-52; Luke 18:35-43)

29 'Inega Ieisu ma ana to'abibodayavo Ieliko inogea ta qabu qiduadi Ieisu i'abi'abibodea. 30 Ta 'oloto magilafudi matadi kwayakwayana 'eda nanavinaya itoabui itoatoa, ta Ieisu maimai valena inoqonoqolia 'inega igabea ivonaya, "Deibida tubuna ye, uda nuakolokoloyema!"

31 'Inega qabu diavona edi gaba~nana inoqolia ta ilugwaeyedi ivonaya, "Omi'a olua'u, ge ona gaba."

Ta magilafudina igaba bonadi qiduanega ivonaya, "Kaiwabu, o'a Deibida natuna ye uda nuakolokoloyema!"

32 'Inega Ieisu veutovolo ta gabedi imai vonedia, "Tola'ai nuanuami ena viaqi weaqimi?"

33 Ta ivonaya, "Kaiwabu, nuanuama matama una giveaqiaqiedi be yaqisa ama fata ana 'ita!"

34 'Inega Ieisu nuakolokoloyedi 'abo matadi gitonovia 'inega matadi lukwayavonega 'eaea ta i'ita aqiaqi, 'inega Ieisu i'abibodea.

^t 20:22 Md 26:39; Ion 18:11 ^u 20:25 Lk 22:25-26 ^v 20:26 Md 23:11; Mk 9:35

^w 20:28 Lk 22:27; Fil 2:7

Ieisu ena lugu Ielusalema 'inaya
(*Maki 11:1-11; Luke 19:28-40; Ioni 12:12-19*)

21 ¹Tuta~nana Ieisu ma ana to'abibodayavo itautauya Ielusalema weaqina, 'inega i'ifoqe 'abaga Bedifegi bwanaga Olibe 'inaya. 'Abaga~nana ge luluvai Ielusalemayega, 'inega Ieisu ana to'abibodayavo magilafudi vetunedi ina nugweta, ²ta vebibinedi vonaya, "Abaga 'iawadaya ona tauya, ta tuta~nana ona 'ifoqe yubai doniki ma natuna ona 'itedi 'aiwe 'inaya yoqoyoqonidi itovotovololo, ta magilafudi ona li'emidi ona miedi 'iguya. ³Ta 'eguma togama navetala'aiemi tola'ai weaqina doniki o'ewe'ewedi, 'inega ona vonaya, 'Ema Kaiwabu ena nuanua 'idewani', 'inega tovetala'ai~nana nahawafeledi 'imia."

⁴Ba'e yani~nana 'ifoqe be 'inega tola'ai lova tovesimasimana isimanea ana aqiaqina na'ifoqe, e ba'e 'idewani ivonaya,

⁵ x "Saioni tomotaudi ona vonedi ona vonaya,
'O'itea, emi Kini maimai 'imia.

Tauna tonuawebui doniki natudi gwavunaya gelu.

Ta doniki~nana me'olotona ta kekeyavauna 'inaya.' "

⁶Ieisu ana to'abibodayavo ena vona 'abibodea tuata itauya. ⁷Inega doniki~nana ma natuna ilobedi 'abo imiedi, ta adi kalekoyega doniki gwavudi ita'uli, 'abo Ieisu gelu.

⁸Ta qabu diavona wese adi kaleko 'edaya ita'ulidi ta vaina magimagi 'waedi ida'edi ta 'eda~nana ita'ulia. ⁹ y Ieisu qabu nuanidia maega itautauya, ta qabu diavona koluega iawahawatuboya ivonaya,

"Osana! Kaiwa qiduana o'a Deibida tubuna 'iuya!

Yaubada, nuanuama tauna maimai Kaiwabu ana wawega una vona veyolubea.

Yaubada Toatoa Vane Otaqiu ahawahawatubou!"

¹⁰Tuta~nana Ieisu lugu Ielusalema tomotau qabudi divelegudi ta givenuavoqanidi ivonaya, "Isana omo'ena togama?"

¹¹Ta qabu~dina Ieisu maega itautauya tonuavoqana~dina edi vona ive'evivia ivonaya, "Ba'e tauna tovesimasimana ana wawa Ieisu, tauna Nasaleta 'olotona di'we Galili 'inega mai."

Ieisu lugu Vanue Gwalagwalana 'inaya
(*Maki 11:15-19; Luke 19:45-48; Ioni 2:13-22*)

¹²'Inega Ieisu lugu Vanue Gwalagwalana 'inaya, ta togimwaneavo ta wese tovegimwaneavo qabudi 'wavinidi. Ta mane ana tosenisiavo edi 'ebea'u ta wese bunebune adi tovegimwaneavo edi 'ebetoa 'e'ubuinidi, ¹³ z

x 21:5 Sek 9:9 y 21:9 Same 118:25-26; 148:1 z 21:13 Ais 56:7; Iel 7:11

ta vonedi vonaya, “Buki Nugwenugweina gamonaya Yaubada ena vona i'wayavia vonaya,

‘Egu vanue ina gabea vanue ‘ebevenoqi’, ta omi’a ogivilea vonigo tovanawala adi watu’ubu ‘idewani.”

¹⁴ Iesu nawale toatoa Vanue Gwalagwalana ‘inaya, ‘inega matadi kwayakwayana ta wese ‘aqedi veifana imai Iesu ‘inaya ‘abo qabudi giveaiaqiedi.

¹⁵ Ta toveguba qiduquduadi ta wese luvine ana tove’itayavo Iesu ena viaqa aqiaqina ta waiwaina i’itedi, ta wese gogama bonadi inoqolia Vanue Gwalagwalana gamonaya ivevekolukolua, ivonavonaya, “Deibida tubuna kana awatuboya!”

¹⁶ ^a ‘Inega toveguba~dina Iesu ivetala’aiea ivonaya, “Nage gogama ba’e edi vona unoqolia?”

‘Inega Iesu vona ‘eviviedi vonaya, “Ao, ni’au yanoqolia, ta nage Buki Nugwenugweina gamonaya ge oda avoya vonaya,

‘Gogama agoagodi ta wese sususudi ni’a uve’itedi ma’oda ‘inega ‘awadiega ina awatubo aqiaqieu.’ ”

¹⁷ ‘Inega Iesu tomotau nogedi Ielusalema ‘inaya, ta ‘ifoqe tauya Bedani ‘inaya, ta omo’e ‘inaya ‘enova.

Iesu ‘ala’ai vona ve’alatea

(Maki 11:12-14, 20-24)

¹⁸ Ta mahala ahalia Iesu ya’itoto ‘evivi tautauya Ielusalema weaqina, ta ‘edaya botana lutanovia. ¹⁹ Nawale tautauya, ‘inega taha ‘ala’ai ‘itea ‘eda nanavinaya ‘abo vanaqo ‘itea vuaqa gegana, ta ‘esi ‘waenamo. ‘Inega Iesu ‘aiwe~nana vona ve’alatei vonaya, “Nawale ge wese una vuaqa ‘evivi!” Ta ‘inega ‘aiwe~nana mwatuqu kwayavona.

²⁰ Ta tuta~nana Iesu ana to’abibodayavo ba’e viaqa~nana i’itea ‘inega nuadi voqana ta ivoneaya, “Ma’oda ‘inega ‘aiwe~nana mwatuqu kwayavona?”

²¹ ^b Ta Iesu vonedi, “Yavona aqiaqiemi, ‘eguma me emi vetumaqana ta ge ona venuana magilafu, ‘inega tola’ai ni’a yaviaqia ba’e ‘aiwe~nana ‘inaya, omi’a wese ami fata ‘idewanina ona viaqia. Ta wese ‘eguma bwanaqia ba’e ‘inaya ona vonaya, ‘Utovalo utoaiqo mwade’waya!’ e ‘inega ‘idewani naviaqia. ²² ^c ‘Eguma me emi vetumaqana ona noqi Yaubada ‘inaya vaina yani weaqina, e ‘inega yani diavona ona lobe.”

Iesu ivetala’aiea ena luvine ‘iuna weaqina

(Maki 11:27-33; Luke 20:1-8)

²³ ‘Inega Iesu Vanue Gwalagwalana ‘inaya ‘evivi lugu ta veve’ita. ‘Inega toveguba qiduquduadi wese ‘abaga ana tovanugwetayavo imai ‘abo Iesu ivetala’aiea ivonaya, “Uvonema togama ena luvineyega ba’e ‘idewana ufewafewa ‘aiqa? Ta wese togama ena waiwaiega yani ba’e uviaviaqidi?”

^a 21:16 Same 8:2 ^b 21:21 Md 17:20; Lk 17:6; 1Kol 13:2 ^c 21:22 Md 7:7-11; 18:19

²⁴ Ta Ieisu vonedi vonaya, “Nugweta taha yani ena vetala'aiemi, ta 'eguma egu vona ona ve'ia aqiaqiea e 'inega ya'a wese ena vonemi egu luvine weaqina. ²⁵ Egu vetala'ai ba'e, “Togama ena luvineyega Ioni tomotau givebabitaaisodi, Yaubada 'inega nage tomotau 'idiega?” ”

'Inega taudi adi 'aidega iveqae ivonaya, “Ma'oda ena vona kana ve'evivi 'aiqei? Mana 'eguma kana vonaya 'Yaubada 'inega', e nawale navona 'evivieda navonaya, “Inega tola'ai weaqina Ioni ge oda vetumaqanei?” ^{26 d} Ta wese 'eguma kana vona, “Tomotau 'inega', e nawale qabu ina nualuveifa 'idaya mana qabudi Ioni i'awatovesimasimanea.”

²⁷ Inega Ieisu ena vetala'ai ive'evivia ivonaya, “Ge ada alamania.”

'Inega Ieisu wese vonedi vonaya, “Inega ya'a wese ge ena vonemi togama ena luvineyega ba'e 'idewani yaviaviaqa 'aiqa.”

Vona sesebai 'oloto natunavo magilafudi weaqidi

²⁸ Inega Ieisu wese vonedi, “Ba'e egu vona ona nuaia. Taha 'oloto natunavo me'olotodi magilafudi itoatoa. 'Inega tamadi natuna 'unutauna vonea vonaya, 'Natugu, 'itaga una tauya vaoqaya una fewa',

²⁹ “ta 'unutau~nana tamana ena vona ve'evivia vonaya, 'Iko'i', ta 'abiboda nuana givila 'abo tauya ve'ale fewa.

³⁰ “Oloto~nana natuna tugamwanina wese 'idewanina vonea vonaya, 'Natugu, 'itaga una tauya talaqaya una fewa',

“abo natuna vonaya, 'E aqiaqina 'idewani, nawale ena tauya', ta ge datauya.

³¹ “Inega magilafudi 'idiega togama tamadi ena vona 'abibodei?”

Ta tovegubayavo wese 'abaga ana to'itamakiavo ivonaya, “Unutauna”.

'Inega Ieisu vonedi vonaya, “Vonahaqiaqi, toluveifadi taudi takesi ana to'ewayavo be wese tokodada nawale ina madulugu Yaubada ena 'Ebeluvine 'inaya, ta omi'a 'abiboda. ^{32 e} Mana lova Ioni 'eda tunutunuqina ve'itemi ta ge oda vetumaqanea, ta 'esi takesi ana to'ewayavo be wese tokodada ivetumaqanea. Matamiega wese o'itedi inuagivila, ta omi'a ge oda nuagivila ta nawale ge oda vetumaqanea, waisa?”

Vona sesebai vaoqa ana to'itamaki weaqidi

(Maki 12:1-12; Luke 20:9-19)

^{33 f} Ta Ieisu wese vonedi vonaya, “Taha vona sesebai wese ona noqolia tonivaoqa taha weaqina. Tonivaoqa~nana 'oine ana loi 'wadia ena vaoqa gamonaya, ta 'ali vivilia ta wese 'oine ana 'ebememe viaqia. 'Inega gweda vaoqa gamonaya yoqonia ta tomotau 'ewedi be vaoqa ina 'itamakia, ta tauna tauya mali di'we 'inaya. ³⁴ Ta bolimana ana tuta 'inaya ena tofewayavo vaina vetunedi ena vaoqaya 'oine vaoqina sabi 'ewadi ena to'itamakiavo 'idiega.

^d 21:26 Md 14:5 ^e 21:32 Lk 3:12; 7:29-30 ^f 21:33 Ais 5:1-2

35 “E tuta~nana itauya vaoqaya ’inega to’itamakiavo tofewa~dina ikafidi, ta taha ivunuqia ta vemagilafuna iluve’aligia ta vetoina iludaboya. 36 ’Abiboda tonivaoqa~nana wese ena tofewayavo tufwana qabudi vetunedi, ta to’itamaki diavona wese ’idewana iveilivu ’aiqedi. 37 Ta tuta vetoina ’inaya tonivaoqa~nana natuna me’olotona vetunea ’idia ta taunega vonaya, ‘Ba’e natu otaqigu, ’inega ina ’amayabea.’

38 ^g “Ta tuta~nana natuna ’ifoqe i’itea ’inega to’itamaki diavona ma ediavo iveveqae ivonaya, ‘Emavo, ’oloto omo’e maimai tauna kaiwabu~nana natu otaqina, ’inega kana luve’aligia be yaqisa ita’a taudega ba’e vaoqa~nana kana luvinea.’ 39 ^h ’Inega ikafia vaoqega ifelawebuiea ’ali gwavunaya ta iluve’aligia.

40 “’Inega ona nuaia tuta~nana tonivaoqa na’evivi namai tola’ai naviaqi ena to’itamakiavo ’idia?”

41 ’Inega leisu ena vetala’ai ive’evivia ivonaya, “Tauna toluve’aliga diavona nawale naluve’aligidi be ena vaoqa nahawafelei to’itamaki aqiaqidi ’idia, ’inega bolimana ana tuta ’oine vuaqina tonivaoqa~nana ina neia.”

42 ⁱ ’Inega leisu wese vona sesebaiega vonedi vonaya, “Nage Buki Nugwenugweina ena simana ’inega onuave’avinia vonaya,

‘Lova ’oqola~nana to’eyoqona inogea,
ta ba’itagana ’oqola qabudi luviluvinedi.

Ba’e eda Kaiwabu ena viaqa,
ta viaqa~nana ana ’ita aqiaqi otaqina ’idaya.’

43 “Yavona aqiaqiemi, Yaubada ’imiega ena ’Ebeluvine na’ewa yavulea ta mali qabu naneidi, be taudi ’idiega vuaqa aqiaqina na’ifoqe. 44 ’Eguma taha toga ’oqola~nana ’inaya nalutuhuyei ta nabe’u nawale luluna nabaidi, ta wese ’eguma ’oqola~nana nabuinia taha toga debanaya nawale namemea.”

45 Iesu ena vona sesebai ba’e toveguba qiduquduadi ta wese Falisiavo inoqolidi ta ialamania vonigo taudi weaqidi vonavona. 46 ’Inega ’eda isalia nuanuadi leisu ina kafia, ta imwaniniva qabu weaqidi, mana leisu i’awato vesimasimanea.

Vona sesebai vaqi ’abwagana weaqina

(Luke 14:15-24)

22 ¹ Taha wese vona sesebai leisu neidi vonaya, ² “Mahala ana ’Ebeluvine ’idewani taha kaiwabu ’abwaga ’iva’ava’aia natuna me’olotona ena vaqi weaqina. ³ ’Inega ena tofewayavo luvetunedi itauya tomeqabu taudi lova vematamagilafu ni’a i’ewea ’abwagana weaqina sabi ’ebe’ewadi, ta inoga.

⁴ “’Inega wese ena tofewayavo vaina luvetunedi itauya taudi lova wese vematamagilafu i’ewea ’idia. ’Inega i’aionidi ivonaya, ‘Kaiwabu

^g 21:38 Md 27:1 ^h 21:39 Ibe 13:12 ⁱ 21:42 Same 118:22-23; Lom 9:33; 1Fit 2:6-8

ena 'abwaga tawa 'iva'ava'aia, 'inega ena bulumakau qiduana be vaina kekeyauvaudi maega ni'au luguhudi lubudedi. Ta yani qabuna ni'au 'elumeo, 'inega ona mai kana tauya 'ai~nana weaqina.' ⁵ Ta inoga ge ida mai, ta 'esi itutuvila itauya edi nuanua sabi viaqidi. 'Inega taha 'oloto tauya ena vaoqaya, ta wese taha 'oloto tauya ena sitoa 'inaya.

^{6j} "Ta kaiwabu~nana wese vaina ena tofewayavo luvetunedi tomotau sabi 'aionidi, ta taudi wese inoga ta itovolo tofewa diavona iveilivu veifedi ta iluve'aligidi. ⁷ 'Inega kaiwabu~nana diana vilea ta ena toluviayavo luvetunedi itauya toluve'aliga diavona ifofolidi ta edi 'abaga ituini 'alaia.

⁸ "Abiboda kaiwabu~nana ena tofewayavo 'idia vonaya, 'Vaqi 'abwagana tawa 'i'iva'ava'aina, ta taudi lova yavematamagilafuyedi edi ilivu veifana 'inega ge adi fata ina mai. ⁹ 'Inega 'eda magalua 'inaya ona tauya ta tomeqabu ona lobedi ona 'ebe'ewedi ona miedi vaqi 'abwagana ina vayavulei ina 'ainia.' ¹⁰ 'Inega i'ifoqe 'edaya 'abo tomotau qabudi igaba va'au'auqidi vaina luveifadi ta vaina aqiaqidi imai 'abo vaqi ana vanue iluveagatuna'ia.

¹¹ "Tuta~nana kaiwabu mai 'abwaga ana to'ai sabi 'itadi 'inega 'oloto taha 'ita lobege ge ana kaleko aqiaqidi ta 'esi bwavubwavudi. ¹² 'Inega vetala'aiea vonaya, 'Iagu, ma'oda 'inega ulugu mai 'aiqa, mana ba'e kaleko diavona ge daluaqiaqiei vaqi 'abwagana weaqina, waisa?' Ta 'oloto~nana gebu ana fata vetala'ai ba'e nave'evivia.

^{13k} "Inega kaiwabu ena tofewayavo vonedia, "Oloto omo'e ona kafia ta nimana be wese 'aqena ona yoqonidi ta ona inoqi na'ifoqe velovelovanaya, omo'e 'inaya tomotau qabudi idoudou ta aladi kikokiko be wese visiqa vataya ilobelobea.' ¹⁴ Mana tomotau qabudi Yaubada gabedi, ta 'idiega ge 'ealidi venua'ivinedi."

Vetala'ai takesi weaqina
(Maki 12:13-17; Luke 20:20-26)

^{15l} 'Inega Falisi adi 'aidegamo itoava'auta ta idima govaqa ma'oda Ieisu ina vetala'aiei, be edi vona ana ve'ia 'inega ena luveifana ina lobei be yaqisa adi fata ina kafia. ¹⁶ 'Inega adi to'abibodayavo ta wese toluvine qiduana Elodi ena qabuyavo maega iluvetunedi itauya Ieisu 'inaya ivonaya, "Tove'ita ni'a ahalamani eu ilivu tunutunuqina, Yaubada ena nuanua uveve'ita aqiaqiea ta wese tomotau edi waiwai weaqina gebu uda mwaniniva, ta tua vonahaqiaqi ululugaihiea tomotau qabudi 'idia. ¹⁷ Ma'oda unuanua 'aiqa, nage luaqiaqiea be ita'a me Diu kana takesi me Loma edi toluvine agona Sisa 'inaya, nage gebu? Nuanuama ana alamania."

^j 22:6 Md 21:35 ^k 22:13 Md 8:12; 25:30; Lk 13:28 ^l 22:15 Mk 3:6

18 Ta Ieisu edi nuanua luveifana ni'a alamania, 'inega vonaya, "Omi'a tou'ava. Tola'ai weaqina sitonova omimiei 'iguya? 19 Ta mane taha emi 'ebetakesi weaqina ove'itegu." 'Inega mane~nana ineia. 20 'Inega Ieisu vonedi vonaya, "Ovonegu, ba'e mane~nana 'inaya, togama 'aye'ayewana ta ma'oda ana wawa?"

21 ^m Ta ivonaya, "Toluvine qiduana Sisa." Tuata Ieisu vonedia, "'Inega Sisa ena yani Sisa ona nei 'eviviea, ta Yaubada ena yani wese Yaubada ona nei 'eviviea." 22 Ieisu ena vona inoqolia ta nuadi voqana, 'inega inogei ta itauya.

To'aliga edi ya'itoto 'evivi
(Maki 12:18-27; Luke 20:27-40)

23 ⁿ 'Aubena~nana 'inaya vaina Sadusiavo taudi ge ida vetumaqana to'aliga edi ya'itoto 'evivi weaqina, imai Ieisu 'inaya ta ivetala'aiea ivonaya, 24 ^o "Kaiwabu, Mosese ena luvine vonaya,

"Eguma taha 'oloto ma moqanena itoatoa ta natu geqadi ta 'oloto~nana yawaina nagumwala, 'inega luaqiaqiea be to'aliga~nana wada'ena taina na'ebe'ewei ta maega ina vaqi, 'inega vavine ina venatuna ta natudiavo to'waiva~nana luseanina.'

25 "'Inega ba'e wese ema velulu'uya una noqolia. Taha 'oloto ma tainavo adi yau seveni maega atoatoa, ta 'oloto~nana vaqi ta yawaina gumwala ta natu geqana 'inega to'waiva~nana ana gwavu'ifo wada'ena maega ivaqi. 26 'Inega tauna wese yawaina gumwala ta wese ge natunamo, ta 'idewani tainavo qabudi wada'e~nana ivaqi. 27 Ta 'abibodadiega vavine wese yawaina gumwala. 28 'Inega ya'itoto 'evivi ana 'aubena 'inaya seveni~dina 'idiega to'oloto moqane otaqina, mana vavine~nana 'oloto diavona vaqidi ta wada'eyedi?"

29 Ta Ieisu edi vetala'ai ba'e ve'evivia vonaya, "Omi'a Buki Nugwenugweina ta wese Yaubada ena waiwai ge oda alamania, 'inega emi vetala'ai ba'e ge aqiaqina. 30 Mana ya'itoto 'evivi ana 'aubena 'inaya tomotau ge ina vaqi, ta vonahaqiaqi, edi toa nawale kavona Yaubada ena tovale'ewa qabudi mahalaya itoatoa 'idewani. 31 Nage Yaubada ena vona Buki Nugwenugweina 'inaya ya'itoto 'evivi weaqina ge oda avoi, vonaya,

32 ^p 'Ya'a Ebelamo ena Yaubada, be Aisake ena Yaubada ta wese Iakobo ena Yaubada.

Vonahaqiaqi, Yaubada ge to'aliga edi Yaubada,
ta 'esi tomotau mayawaidi edi Yaubada.'

33 Ieisu ena vona ba'e tomotau qabudi inoqolia 'inega nuadi voqana ena ve'ita waiwaina weaqina.

^m 22:21 Lom 13:7 ⁿ 22:23 Via 23:8 ^o 22:24 Luve 25:5 ^p 22:32 'Ifo 3:6; Md 8:11

Luvine qiduana weaqina
(Maki 12:28-34; Luke 10:25-28)

³⁴ Ta Falisiavo inoqolia ma'oda Iesu Sadusiavo edi vetala'ai 'inaya ni'a 'egibodedi ena ve'ia 'inega. E 'inega Falisiavo~dina wese nuanuadi Iesu ina vetala'aiea vaina yani weaqina 'inega imai 'inaya. ³⁵ Ta 'idiega taha luvine ana toalamani aqiaqi nuanuana vetala'aiega Iesu nasitonovia, 'inega vonaya, ³⁶ "Tove'ita, luvine qabuna 'idiega ai luvine 'ena'i otaqina?"

³⁷ Ta Iesu vonaya,

"Eu Kaiwabu Yaubada una veyolubei giwaliuyega ta niboaniuyega ta wese eu nuanua qabuna 'idiega. ³⁸ Ba'e luvine~nana luvine nugwenugweina, ta luvine qabudi veqidua va'inedi.

³⁹ "Ta taha wese luvine qiduana ba'e 'idewani vonaya,

"Tomotau una veyolubedi 'idewani tau'uyega uveveyolubeu.' ⁴⁰ Ba'e luvine magilafudina luvine qabudi ta wese tovesimasimana edi vona qabudi adi avutugu."

To'etoyavua tauna Deibida ena gadeyega
(Maki 12:35-37; Luke 20:41-44)

⁴¹ Falisiavo nawale itoatoa 'inega Iesu vetala'aiedi vonaya, ⁴² "Ma'oda emi nuanua To'etoyavua Keliso weaqina? Tauna toga ena gadeyega 'ifoqe?"

Ta ivonaya, "Kini Deibida ena gadeyega."

⁴³ 'Inega Iesu vonaya, "Ma'oda 'inega lova Niboana Gwalagwalana ena venuaha'u 'inega Deibida To'etoyavua~nana 'awa-Kaiwabuyea vonaya,

⁴⁴ "Yaubada egu Kaiwabu 'inaya vonaya,

'Ataqiguya utoabui
ana laba voalamwavo ena a'uwebuiedi,
'inega una luvinedi.'

⁴⁵ Ta 'eguma Deibida Keliso 'awa-Kaiwabuyea, 'inega ma'oda ana fata be To'etoyavua Keliso Deibida ena gadeyega 'ifoqe?"

⁴⁶ Iesu ena vetala'ai ba'e ge taha toga ana fata dave'iei. Ta ba'e tuta~nana 'inega ge taha toga datovoi be Iesu davetala'aiei, mana ena alamani weaqina imwaninivea.

Iesu luvine ana tove'itayavo be wese Falisiavo lumaqi'aiedi
(Maki 12:38-40; Luke 11:39-46,52; 20:45-47)

23 ¹ 'Inega Iesu qabu ta wese ana to'abibodayavo vonedi vonaya,
² "Lova Mosese me Isileli luviluvinedi, ta 'itaga luvine ana

^q 22:37 Luve 6:5 ^r 22:39 Luvi 19:18; Md 7:12 ^s 22:40 Lom 13:10; Gal 5:14

^t 22:42 Ion 7:42 ^u 22:44 Same 110:1; Md 26:64

tove'itayavo ta wese Falisiavo 'idewanina iluviluvine 'aiqemi. ^{3 v} 'Inega tola'ai iveve'itemi ona 'abibodedi, ta edi viaqayavo ge ona 'abibodei, mana taudi iveve'itamo, ta edi ve'itayavo~dina taudiega ge ida viaqidi. ⁴ Taudi 'ava'avala vitadi tomotau ineineidi, ta ge taha tola'ai ida viaqi be ina iuledi ta vita~nana ina 'avalei.

^{5 w} "Ta Buki Nugwenugweina 'inega Yaubada ena vona i'waya'wayavidi ta taka goyogoyona gamonaya idodododi ta adi kiaya be wese nimadia iyoqoyoqonidi ta i'ava'avala dadanedi. Ta wese adi kaleko matavusina kuekuedi maega iveveaqedi, mana nuanuadi tomotau ina 'itedi. ⁶ Ta sagali ana tutaya nuanuadi selovaya ina toabui, be wese vanue tafwalolo 'inaya nuanuadi 'ebetoa aqiaqina. ⁷ Ta wese 'eguma 'ebegimwane 'inaya itautauya nuanuadi vonigo tomotau qabudi ina lukaiwa 'idia ta wese ina 'awatove'itayedi. ⁸ Ta omi'a ge daluaqiaqiemi be tomotau ina 'awatove'itayemi, mana qabumi lelelea ta emi Tove'ita 'aidegana namo. ⁹ Ta ge taha toga bwa'obwa'oya ona 'awatamane, mana Tamami ana 'aidega mahalaya toatoa. ¹⁰ Ta ge wese daluaqiaqiemi be tomotau ina 'awakaiwabuyemi, mana Keliso tauna ana 'aidega emi Kaiwabu otaqa. ^{11 x} Ta 'esi 'eguma toga 'imiega navetovanugweta, 'inega tauna navetofewa 'imia. ^{12 y} 'Eguma taha toga 'imiega nanuavane nawale nawebui, ta toga nanuawebui nawale navaneqa.

¹³ "Omi'a luvine ana tove'itayavo be wese Falisiavo nuakolokolomi, mana emi u'avayavo 'idiega tomotau oawatayedi be 'inega mahala ena 'Ebeluvine 'inaya ge ina lugu. Ta wese aiqabu nuanuadi be ina lugu o'etobodedi. 'Inega omi'a wese ge ami fata be ona lugu. ¹⁴ [Omi'a luvine ana tove'itayavo be wese Falisi nuakolokolomi. Omi'a tou'ava! Mana u'avega wadawada'e edi kulufayavo edi vanueavo 'idiega ovanawalidi, be wese ovevenoqi kuena mana nuanuami tomotau ina awatubomi.]

¹⁵ "Omi'a luvine ana tove'itayavo be wese Falisiavo nuakolokolomi. Omi'a tou'ava! Tuta qabuna oluluyaba dadana 'abaga qabudi 'idia be vonigo ami to'abiboda taha ona lobe, be 'abiboda tomotau~nana taumi emi nuenuega ona ve'itea. Ta emi ve'ita luveifana 'inega nawale luvematasabu ona lobe, ta tomotau~nana luvematasabu qidua va'inena nalobe.

^{16 z} "Vonahaqiaqi, nuakolokolomi! Mana omi'a tovanugweta matami kwayakwayana ovonaya, 'Eguma taha toga Vanue Gwalagwalana ana wawega na'awatamatamana bena'e ge taha yani 'ena'ina, ta 'esi 'eguma taha toga Vanue Gwalagwalana ana goul'a 'inega na'awatamatamana e ba'e yani agona.' ¹⁷ Ta yavona aqiaqiemi, omi'a kwavakwavami ta matami kwayakwayana. Tola'ai tauna yani qiduana? Nage goul'a, nage Vanue Gwalagwalana, mana vanue~nana ana fata be goul'a nagivegwalea?

^v 23:3 Mal 2:7-8 ^w 23:5 Md 6:1; 'Ifo 13:9; Luve 6:8; Naba 15:38-39 ^x 23:11 Md 20:26; Mk 9:35; Lk 22:26 ^y 23:12 Iob 22:29; Vos 29:23; Lk 14:11; 18:14 ^z 23:16 Md 15:14

18 “Ta wese ovonaya, “Eguma taha toga ’ebeveguba ana wawega na’awatamatamana bena’e ge yani qiduana, ta ’esi ’eguma taha toga na’awatamatamana nei kavovo ’inega ’ebeveguba ’inaya e ba’e yani qiduana. ’Inega luaqiaqiea be tola’ai ni’a vona fofofolayea, e wese naviaqi. 19 Omi’a kwavakwavami! Tola’ai yani qiduana? Nage nei kavovo, nage ’ebeveguba~nana tauna ’inega nei kavovo~nana ana fata nagivegwalea? 20 Inega ’eguma taha toga ’ebeveguba ana wawega na’awatamatamana e ’inega tauna wese yani qabuna i’eno’eno ’ebeveguba~nana debanaya ’idiega ’awatamatamana. 21 Ta wese ’eguma taha toga Vanue Gwalagwalana ana wawega na’awatamatamana e tauna wese Yaubada ’inaya ’awatamatamana, mana Vanue Gwalagwalana Yaubada ena ’ebetoa. 22 ^a Ta ’eguma taha toga mahala ana wawega na’awatamatamana, e ’inega tomotau~nana Yaubada ana galiva ’inega ’awatamatamana, ta wese galiva~nana ana Totoa ’inega ’awatamatamana.

23 ^b “Omi’a luvine ana tove’itayavo wese Falisiavo nuakolokolomi. Omi’a tou’ava, mana emi nei kavovo~dina emi yani qabudi ’idiega, ta wese yani goyogoyodi ’idewani ’e’e be, wayove ta wese dobala ’idiega. Ta luvine toi qiduadi ovenuafanidi, ’idewani ilivu tunutunuqina be, nuakolokolo be wese gwavubiga. Luaqiaqiemi be yani ba’e qiduadi ona viaqidi, ta wese yani goyona ge ona venuafanidi. 24 Ta omi’a tovanugwetayavo matami kwayakwayana. Ami du’wa ’inega kwakwakwa o’ewa’ewa yavuledi, ta yubai qiduana ’idewana kameli otonetoned.

25 ^c “Omi’a luvine ana tove’itayavo wese Falisiavo nuakolokolomi! Omi’a toveamehaqila! Mana ami vedi be ami gaeba gwavuna olu’utudi ta gamona bwavubwavudi. Ta ba’e bwavu~nana ana alamani emi ilivu luveifadi kavonaya be vemanuguba be ’ailugu ’idewani. 26 Omi’a Falisiavo matami kwayakwayana. Ami vedi be wese ami gaeba gamodi ona ’utu nugweted, ’inega gwavudi wese navevunavunaqa.

27 ^d “Omi’a luvine ana tove’itayavo wese Falisiavo nuakolokolomi! Omi’a toveamehaqila, mana omi’a kavona deba’unu debana ana ’ita wadawadaeadi ta aqiaqidi, ta gamodia to’aliga davulidi ta luludi ’eno’enova. 28 ^e Ta omi’a wese ’idewanina, mana ami ’ita aqiaqi otaqina tomotau matadia, ta giwalimia u’ava ta wese luveifana qabudi ’eno’eno.

Ieisu simana ’ifoqe adi luvematasabu weaqina

(Luke 11:47-51)

29 “Omi’a luvine ana tove’itayavo be Falisiavo nuakolokolomi. Omi’a toveamehaqila! Lova tubumiavo tovesimasimana nugwenugweidi iluve’aligidi,

^a 23:22 Ais 66:1; Md 5:34 ^b 23:23 Luvi 27:30; Mai 6:8 ^c 23:25 Mk 7:4

^d 23:27 Via 23:3 ^e 23:28 Lk 16:15

ta omi'a adi gudumayavo 'idia 'ebenuave'avina oviaqidi. Ta wese Yaubada ena tomotau tunutunuqidi iluveawalidi, ta omi'a adi deba'unuyavo ove'ivalidi, ³⁰ta 'inega ovonaya, "Eguma lova tubudavo edi tutaya kada toatoa, 'inega ge kada iuledi be Yaubada ena tovesimasimanayavo kada luve'aligidi." ^{31f} Emi vona ba'e 'inega taumiega osimana 'ifoqeyemi vonigo omi'a tovesimasimanayavo adi toluve'aliga tubudiavo. ³²Inega omi'a taudi edi fewayavo nawale ona lu'ovoia.

^{33g} "Omi'a mwata natunavo! Nage ovonaya be vonigo ami fata 'aiwe 'ala'alainega ona dena, waisa? ³⁴Inega tovesimasimanayavo be toalamaniavo wese tove'itayavo ena vetunedi 'imia be 'inega vaidi ona luve'aligidi, ta vaidi 'etoluai 'inaya ona tutuve'ewedi be vaidi emi vanue tafwalolo 'inaya wayo metametanega ona vunuqa dadanedi, be 'abaga taha taha 'idia ona 'wavi dadanedi. ^{35h} Ta ba'e 'inega Yaubada ena tomotau tunutunuqidi adi luve'aliga ana ve'ia omi'a lagatamina nawale ona lobe'a 'oloto tunutunuqina Eibolo ana luve'aliga 'inega e ana laba Balakaya natuna tunutunuqina Sakalaia ana luve'aliga 'inaya. Tauna oluve'aligia Vanue Gwalagwalana be 'ebeveguba nuanidia. ³⁶Vonahaqiaqi, ba'e luve'aliga diavona adi ve'ia omi'a ba'e lagatami ona lobe'a.

Ieisu duvoyavoya me Ielusalema weaqidi

(Luke 13:34-35)

³⁷"Me Ielusalema ye, me Ielusalema ye! Omi'a tovesimasimana oluve'aligidi, ta wese taudi Yaubada vetunedi imai 'imia oludabodi. Tuta qabuna nuanuagu omi'a ena gaba va'auqimi ona mai kavona kamukamu natunavo fafenega 'au'aubodedi, ta onogegu. ³⁸ⁱ Ta emi noga weaqina Yaubada emi Vanue Gwalagwalana nanogea be navetomotau geqa. ^{39j} Ta yavonemi, ge wese ona 'ita 'eviviegu ana laba ona vonaya, "Tauna kana awatuboya Yaubada ana wawega maimai." "

Ieisu ena vona Vanue Gwalagwalana ana bwega yavula weaqina

(Maki 13:1-2; Luke 21:5-6)

24 ¹Inega Ieisu webui tautauya Vanue Gwalagwalana 'inega, ta ana to'abibodayavo imai be nuanuadi ina ve'itea yani qabuna aqiaqina Vanue Gwalagwalana weaqina. ^{2k} Ta Ieisu vonedia, "Ba'e yanidiavo o'ite'itedia nawale ina bwega 'ovoidi, be ge taha dabo ena 'ebetoa 'inaya ona 'ita 'eviviei."

Tuta vitana nawale na'ifoqe

(Maki 13:3-13; Luke 21:7-19)

³Abibodanaya Ieisu bwanaga Olibe 'inaya toabui ta ana to'abibodayavo imai 'inaya ivetala'aiea ivonaya, "Uvonema, totuta ba'e yani diavona

^f 23:31 Via 7:52 ^g 23:33 Md 3:7; 12:34; Lk 3:7 ^h 23:35 Nug 4:8; 2Yani 24:20-21

ⁱ 23:38 1Kin 9:7-8; Iel 22:5 ^j 23:39 Same 118:26 ^k 24:2 Lk 19:44

na'ifoqe, ta tola'ai nave'ebe'ita eu tuta 'evivi ta wese tuta ana 'ebelu'ovoa weaqina?"

⁴ 'Inega leisu vonaya, "Ona 'itamakimi, be yaqisa ge taha toga na'eu'au'avemi, ⁵ mana nawale tomotau 'eala agu wawega ina mai ina vonaya, 'Ya'a Keliso To'etoyavua!' ta edi vona 'inega vaina qabu ina u'avedi. ⁶ Ta wese vale ona noqolidi avia di'wemia ta luluvaia weaqidi, ta ba'e yani diavona weaqidi giwalimi ge naha'ala, mana ba'e yani diavona ina madu'ifoqe, ta 'abiboda bwa'obwa'o ana 'ebelu'ovoa. ⁷ Nawale mali qabu be mali qabu maega ina luavia, ta wese mali di'we be mali di'we maega ina luavia. Ta botana qiduana ta wese mwani'ini'i na'ifoqe di'we taha taha 'idia. ⁸ Ba'e yani diavona tuta vitadi ana 'ebeve'ale.

⁹ ^m "Inega omi'a nawale tomotau ina vevoalanemi ta ina kafimi be ina luve'aligimi. Ta wese mali qabu ina veaviemi mana omi'a agu tovetumaqanayavo. ¹⁰ Tomotau 'eala 'imiega edi vetumaqana ina nogei, ta ma ediavo taudiega nuanidia ina vesulusuluvedi. Ta wese vevoalana na'ifoqe nuanidia. ¹¹ ⁿ Ta wese tovesimasimana 'e'eu'au'avidi 'eala ina 'ifoqe ta ina vanugweta veifemi. ¹² 'Inega ilivu luveifadi nave'ena'i, ta tomotau 'eala edi veyoluba navegoyo. ¹³ ^o Ta 'eguma togama natovolo'i'ita ana laba tuta 'ebelu'ovoa 'inaya e tauna 'etoyavua nalobea. ¹⁴ ^p Ta Yaubada ena 'Ebeluvine valena ina simana dadanea di'we taha taha ana tomtauyavo 'idia, ta 'abiboda tuta ana 'ebelu'ovoa na'ifoqe."

Tuta vitana ta 'ebegaululu weaqina

(Maki 13:14-23; Luke 21:20-24)

¹⁵ ^q Ta wese leisu vonedi vonaya, "Tovesimasimana Daniela simanea taha yani bwavubwavuna ta wese 'edugaugaululuna Vanue Gwalagwalana 'inaya natovolo. (Ta tomeqabu vona ba'e ina avoya luaqiaqiedi be ana alamani ina sali aqiaqiea.) ¹⁶ Omo'e tuta~nana 'inaya Iudia ana tomtauyavo luaqiaqiedi be bwanagaya ina dena. ¹⁷ ^r Ta 'eguma taha toga selovaya toatoa nalukwayavoni nadena, ta ge nalugu 'evivi vanuea ena kulufa sabi 'ewana. ¹⁸ Ta wese toga ena vaoqaya fewafewa ge na'evivi vanuea ana kwakwalufai sabi 'ewana. ¹⁹ Tuta omo'e 'inaya vivine gamwegamwe'idi be tovesusuyavo nuakolokolodi. ²⁰ Yaubada Tamada 'inaya ona venoqi yaqisa ge ona dena 'wei ana tutaya ta wese Sabate 'inaya.

²¹ ^s "Vonahaqiaqi, omo'e tutana 'inaya vita qiduana na'ifoqe, mana bwa'obwa'o ana 'ebeve'ale 'inega be ana laba tuta ba'e 'inaya ge taha

¹ 24:5 Md 24:23-24; 1Ion 2:18 ^m 24:9 Md 10:22 ⁿ 24:11 Md 24:5,24; 1Ion 4:1

^o 24:13 Md 10:22 ^p 24:14 Md 28:19 ^q 24:15 Dan 9:27; 11:31; 12:11 ^r 24:17 Lk 17:31

^s 24:21 Dan 12:1

wese vita ba'e 'idewana da'ifoqe, ta wese tuta maimai 'inaya vita ba'e 'idewana ge na'ifoqe 'evivi. ²² Omo'e vita~nana 'eguma Yaubada ana tuta ge dagivekusei e nawale tomotau qabudi ida 'aliga. Ta Yaubada 'aubena~dina nagivekusedi ena tomotau vevenua'ivinidi weaqidi. ²³ ^t Ta omo'e tutanaya 'eguma togama 'iuya navonaya, 'U'itei, ba'e tauna Keliso!' nage 'Omo'e tauna!' 'inega vona diavona ge una vetumaqanedi. ²⁴ ^u Mana vaina tomotau to'eu'au'ava ina vonaya 'Ya'a Keliso!' ta wese ina vonaya 'Ya'a tovesimasimana!' Nawale ina 'ifoqe ta ve'ita 'ebenuavoqana ina viaqidi. Ta vonigo 'eguma adi fata 'inega wese Yaubada ena tomotauyavo vevenua'ivinidi ina u'avedi. ²⁵ Ta to'eu'au'ava diavona weaqidi ni'a yamaduvonemi, mana nawale ina 'ifoqe 'imia.

²⁶ ^v "Wese 'eguma tomotau ina vonemi, 'Keliso toatoa di'we tomotau geqanaya', 'inega ge ona tauya. Ta wese 'eguma ina vonemi, 'Keliso vanue gamonaya toatoa', e ge ona vetumaqanedi. ²⁷ ^w Ya'a Tomotau Natuna egu mai 'evivi ana 'ita kavona namala 'idewani na'waia ta mahala naguvesimalatia baba'au ena 'ebeyayaqega be ena 'ebewebui 'inaya.

²⁸ ^x "Yubai 'ali'aligina ena 'ebe'eno ni'a kahalamanian, mana omo'e 'inaya bwayobwayo ivava'auta.

Ieisu ena 'evivi mai weaqina
(*Maki 13:24-27; Luke 21:25-28*)

²⁹ ^y "Tuta vitana nalu'ovoa ta lukwayavonega baba'au navelovanea, ta wai'ena ena simatala na'weu, be 'wadi'wadima mahalega ina avuta, ta wese yani qabuna waiwaidi mahalaya itoatoa ina dedela.'

³⁰ ^z "Ya'a Tomotau Natuna, omo'e tutana 'inaya 'ebe'ita weaqigu mahalaya na'ifoqe, ta tomotau qabudi bwa'obwa'oya ina nuavita ina dou. Ta gawatega ena gelu 'inega tomotau ina 'itegu egu waiwai 'inega be wese egu simatala aqiaqi otaqina 'inega yamaimai. ³¹ ^a Ta tuta~nana bea nanunuqa 'inega egu tovale'ewayavo ena vetunedi bwa'obwa'o ena 'ebeve'ale 'inega be ena 'ebel'u'ovoa 'inaya ta wese mahalega egu tomotau vevenua'ivinidi ina va'auqidi.

'Ebevetalatutula mafa
(*Maki 13:28-31; Luke 21:29-33*)

³² "Ebevetalatutula mafa 'inega ena ve'itemi. Tuta~nana mafa 'waena nave'ale sabi galu 'inega ni'a oalamanian ive ana tuta ni'au vadi'weda. ³³ Ta wese 'idewani 'eguma ba'e 'ebe'ita diavona ni'a yavonemia ona

^t 24:23 Md 24:5 ^u 24:24 Luve 13:1-3; 2Te 2:8-9; Ve 13:13-14 ^v 24:26 Lk 17:23-24

^w 24:27 Md 24:37-39 ^x 24:28 Lk 17:37 ^y 24:29 Ais 13:10; 34:4; Isi 32:7; Ioe 2:10,31; 2Fit 3:10; Ve 6:12-13 ^z 24:30 Sek 12:10; Ve 1:7; Dan 7:13 ^a 24:31 1Kol 15:52; 1Te 4:16

'itedi, e 'inega ona alamania egu 'evivi mai ana tuta ni'a vadi'wea. ^{34b} Vonahaqiaqi lagata ba'e ge ona 'aliga ana laba ba'e yani diavona ina 'ifoqe. ^{35c} Mahala be bwa'obwa'o nahawala, ta ya'a egu vona ge taha ana tufwa nahawala ta 'esi na'eno vataya.

Ieisu ena mai 'evivi ana tuta ge taha toga dahalamanian
(*Maki 13:32-37; Luke 17:26-30,34-36*)

^{36d} “Ge taha toga dahalamanian totuta nage to'aubena 'inaya ena 'evivi ena mai, ta wese Yaubada ena tovale'ewayavo mahalaya ge ida alamanian, be wese ya'a Tomotau Natuna ge eda alamanian. Ta 'esi Tamagu ana 'aidega alamanian. ^{37e} Ya'a Tomotau Natuna egu 'evivi ana tuta lova Noa ena tutaya 'idewani. ³⁸ Mana Noa ena tutaya tomotau i'ai'ai be inumanuma ta wese 'oloto be vivine ivaqivaqi ta wese tomotau natudiavo ivevevaqiedi ana laba Noa ena wagaya gelu. ^{39f} Ta seuseu luveafedi 'inega tomotau qabudi idamana, e ya'a Tomotau Natuna egu mai 'evivi wese 'idewani na'ifoqe.

⁴⁰ “Tuta~nana 'inaya 'eguma 'oloto magilafudi edi bwa'o ina talatalaqa 'inega taha 'idiega ena 'ebe'ewea ta taha natoa. ⁴¹ Ta wese vivine magilafudi 'abwaga ina dabidabi 'inega taha 'idiega ena 'ebe'ewea ta taha natoa. ^{42s} 'Inega ona 'itamaki aqiaqiemi mana ya'a emi Kaiwabu egu 'evivi mai ana tuta ge oda alamanian. ^{43h} Ona nuave'avinia, 'eguma tonivanue nahalamanian totuta tovanawala nalugu ena vanuea, e vonahaqiaqi me ena 'iva'ava'ata natoatoa, 'inega tovanawala~nana ge ana fata ena vanue naqeuni ta nalugu. ⁴⁴ 'Inega omi'a wese 'idewani me emi 'iva'ava'ata ona toatoa, mana tuta~nana 'inaya tomotau ina vonaya, 'Ge wese namai!' e 'inega ya'a Tomotau Natuna ena luveafedi ena 'ifoqe.

Tofewa ena gwavubiga ta ena gwavu'ai weaqina
(*Luke 12:41-48*)

⁴⁵ “Eguma taha tofewa ma ana vetumaqana ta me ena alamani toatoa, 'inega tauna ena kaiwabu navenua'ivinea be enavo na'itamakidi ta wese adi 'abwaga naneidi 'aubena 'aidega 'aidega 'idia. ⁴⁶ Ta tuta~nana ena kaiwabu na'evivi namai 'inega tofewa~nana ana veyoveyoa na'itea viaviaqa aqiaqiea, e 'inega weaqina naqaiawa. ⁴⁷ⁱ Yavona aqiaqiemi, ba'e kaiwabu~nana ena kulufa be wese ena kaikaiwabu qabudi ena tofewa nimanaya naha'udi be na'itamakidi.

⁴⁸ “Ta 'eguma tofewa~nana navelivu veifa ta navonaya, 'Egu kaiwabu tauya ta nawale gigive'ove'o', ⁴⁹ 'inega ve'ale enavo vunuqidi, ta

^b 24:34 Md 16:28 ^c 24:35 Md 5:18 ^d 24:36 Via 1:7; 1Te 5:1-2 ^e 24:37 Nug 6:5-8

^f 24:39 Nug 7:21-23 ^s 24:42 Md 25:13 ^h 24:43 Lk 12:39-40; Ve 16:15

ⁱ 24:47 Md 25:21,23

tovekwavakwava 'ebe'ewedi imai ta maega i'ai'ai ta wese inumanuma.
⁵⁰Ta tuta~nana ena kaiwabu na'evivi namai 'inega naluveafea ta ena
 ilivu veifana na'itedi. ⁵¹'Inega navunuqia be na'wavinia na'ifoqe tou'ava
 edi di'we 'inaya, ta omo'e 'inaya tou'ava~dina maega adi luvematasabu
 'aidegana ina lobe, 'inega tauna nadou be alana navetalakikokiko."

Vona sesebai iahaba teni weaqidi

25 ^{1j} Ta Iesu wese vonedi vonaya, "Mahala ena 'Ebeluvine ba'e
 'idewana: Iahaba adi yau teni edi lamufa i'ewedi itauya tovaqi
 me'olotona ena vaqi 'abwagana weaqina sabi 'itana. ²'Idiega adi yau faibi
 kwavakwavadi ta wese faibi me edi alamani. ³Tovekwavakwava~dina
 edi lamufa gebu ana go'ila ana luvetomana ida 'ewei. ⁴Ta toalamani~dina
 edi go'ila ma botolina i'ewedi edi lamufa ana luvetomana weaqidi. ⁵Ta
 tovaqi me'olotona i'ive'ove'o, 'inega iahaba teni~dina matadi dunedune
 'abo i'eno motaiva.

⁶"Inega tou gamonaya taha tomotau gaba vonaya, 'Ei qabumi
 oya'itoto, tovaqi~nana ni'a maimai 'inega ka'itei ka'ebe'ewei!' ⁷'Inega
 iahaba diavona iya'itoto edi lamufa sabi giaqiaqiedi.

⁸"Ta kwavakwava~dina ediavo ivenoqiedi ivonaya, 'Emavo, lamufa
 ana go'ila dibuna oda neima mana ema simatala mo'ita na'weu.'

⁹"Ta toalamani~dina ivona 'eviviedi ivonaya, "Eguma ema
 go'ila dibuna ana neimi e 'inega ima'a ana kusa, 'inega ona tauya
 tovegimwaneavo 'idia be emi go'ila ona gimwane. ¹⁰Ta tuta~nana
 itautauya sabi gimwane, 'inega tovaqi~nana 'ifoqe ta taudi ni'au
 i'iva'ava'ata maega ilugu vaqi 'abwagana weaqina. Ta 'awa iguduya.

^{11k} "Ta 'abiboda iahaba kwavakwava~dina i'evivi imai ivonaya,
 'Kaiwabu, 'awa usiwa'ei ta ana lugu wai.'

^{12l} "'Inega tovaqi~nana edi vona ve'evivia vonaya, 'Yavona aqiaqiemi,
 ya'a ge eda alamanimi.' "

^{13m} Iesu ena vona lu'ovoia 'inega ana to'abibodayavo vonedi vonaya,
 "Ona 'itamaki aqiaqiemi, mana egu 'evivi ana 'aubena be ana tuta ge oda
 alamania.

Vona sesebai tofewa toidi weaqidi

(Luke 19:11-27)

¹⁴"Mahala ena 'Ebeluvine wese ba'e 'idewani. Taha kaiwabu nuanuana
 natauya mali di'wea, 'inega ena tofewayavo gaba va'auqidi imai ta vonedi
 ena 'ebeluvine ina 'itamakia. ¹⁵ⁿ 'Inega ena tofewa mane ma kodekodena
 adi yau faibi neia, ta wese tofewa taha mane ma kodekodena magilafuna

^j 25:1 Ve 19:7; Lk 12:35 ^k 25:11 Lk 13:25-27 ^l 25:12 Md 7:23 ^m 25:13 Md 24:42

ⁿ 25:15 Lom 12:6

neia, ta wese tofewa vetoina mane ma kodekodena 'aigedana neia, mana toi~dina edi waiwai ta wese edi alamani ana fata 'inega neidi, e 'abiboda kaiwabu~nana nogedi ta tauya.

16 “Inega tofewa~nana mane ma kodekodena ana yau faibi lukwayavonega vefewedi, ta adi luvetomana wese mane ma kodekodena ana yau faibi lobedi. 17Ta tofewa vemagilafuna wese 'idewani mane ma kodekodena magilafuna vefewedi, 'inega ana luvetomana kodekode magilafuna wese lobedi. 18Ta tofewa vetoina mane ma kodekodena 'aidegana 'eweaya, e tauna bwa'obwa'o alei ta ena kaiwabu ena mane ivuya gamonaya.

19 “Ta edi kaiwabu tufwana tuta kuena di'we~nana 'inaya toatoa, ta 'inega 'evivi mai. 'Inega ena tofewayavo wese gaba va'auqidi mana nuanuana nahalamaniaman ma'oda ena mane ivefewa 'aiqedi. 20'Inega tofewa~nana mane ma kodekodena ana yau faibi mai be ana luvetomana mane ma kodekodena ana yau faibi wese miedi ta vonaya, 'Kaiwabu, o'a mane ma kodekodena ana yau faibi uneigu, ta ya'a yavefewea 'inega wese mane ma kodekodena faibi adi luvetomana yalobea, e 'inega eu mane ma kodekodena teni ba'e.'

21 ° “Ta kaiwabu~nana vonaya, 'Aqiaqina, o'a tofewa aqiaqiu ta ma au vetumaqana, mana o'a uvetafewa yani goyona 'idiega, e 'inega yani agodi ena neiu ta una luvinedi be una 'itamakidi. Ba'e 'inega una lugu mahalaya ta kana qaiawa vataya.'

22 “Inega tofewa~nana lova mane ma kodekodena magilafuna 'ewedi lugu mai ena kaiwabu 'inaya, ta vonaya, 'Kaiwabu, lova mane ma kodekodena magilafuna uneigu, ta mane~nana yavefewea, 'inega wese mane ma kodekodena adi yau magilafuna adi luvetomana yalobea, e 'inega eu mane ma kodekodena foa ba'e.'

23 “Inega kaiwabu~nana vonaya, 'Aqiaqina, o'a tofewa aqiaqiu ta ma au vetumaqana, mana ni'au uvetafewa yani goyona 'idiega, e 'inega yani agodi ena neiu ta una luvinedi be una 'itamakidi. Ba'e 'inega una lugu mahalaya ta kana qaiawa vataya.'

24 “Inega tofewa vetoina ena mane ma kodekodena 'aidegina lugu mai ta vonaya, 'Kaiwabu, yahalamaniaman o'a lumaqimaqi'ai 'avau, ta eu kaikaiwabu u'ewa'ewa kavovodi mali tomotau edi fewa 'idiega. 25'Inega yamwaniniveu ta yatauya eu mane ma kodekodena 'aidegina bwa'obwa'o gamonaya yaivuya, e eu mane ba'e.'

26 “Ta ena kaiwabu lugwaeyea vonaya, 'Tofewa luveifau ta gwavu'ai otaqiu, ualamanigu vonigo egu kaikaiwabu ya'ewe'ewea mali tomotau edi fewa 'inega. 27Ta 'esi luaqiaqieu 'eguma mane~nana uda a'uya mane ana vanue 'inaya, be 'inega 'itagana ma ana luvetomana eda lobea, ta gebu.'

28 “Inega ena tofewayavo vaina ’idia vonaya, ‘Ba’e ’olotona ’inega mane ma kodekodena ’aidegina ona ’ewei be ona neia tauna ’oloto~nana mane ma kodekodena teni ’inaya.’

29^p “Yavona aqiaqiemi, tomeqabu tola’ai ni’a i’ewea ta ivefewa aqiaqiea, e taudi nawale adi luvetomana wese ina lobe, ’inega naveago va’ine. Ta tomeqabu ge ma adi vetumaqana toyani goyona ’idia ’eno’eno nawale na’waiva ’idiega. 30^q ’Inega kaiwabu~nana ena tofewayavo vonedi tofewa luveifana ina fela ’ifoqeyea di’we velovelovanina ’inaya. Ta omo’e ’inaya nadou ta alana navetalakikokiko.

Ieisu totoa bwa’obwa’o qabudi nawale nagivutuqidi

31^r “Ya’a Tomotau Natuna nawale egu simatala aqiaqi otaqina ’inega egu tovale’ewayavo maega ana mai, be ’inega agu galiva kaikaiwabuna ’inaya ena toabui sabi givutuqa. 32^s Be tomotau bwa’obwa’oya ina va’auqidi ina mai mataguya be ena a’uvidividinidi ’idewani sifi adi to’itamaki a’uvidividinidi goti ’idiega. 33 Be tomotau tunutunuqidi ena givutuqidi agu ’ataqia ta veiveifadi agu kelia.

34 “Inega ya’a Kini luaqiaqiegu taudi agu ’ataqia itoatoa ena vonedia, ‘Omi’a Tamagu ena veyoluba ’ayanaya otoatoa ona qaiawa. Omai, ta ena ’Ebeluvine ona ’ewea. Ba’e ’Ebeluvine~nana lova kuyavata qabudi adi ’iva’ava’ata ’unu ’inega Yaubada ’iva’ava’aia weaqimi. 35^t Mana lova ’ai weaqina yabotana ta ove’ainigu, wese magagu luayahaya ta ovenumegu, ta wese ge oda alamanigu, ta tua o’ebe’ewegu yamai emi vanuea. 36 Ta wese ge agu kalekomo ta ovekalekogu, be wese yavevihuqa ta o’itamakigu, ta wese vanue ’ebeyoqona ’inaya yatoatoa ta ovayausigu.’

37 “Inega tunutunuqi~dina ’iguya ina vonaya, ‘Kaiwabu, totutaya a’iteu ma botaniu ta ave’ainiu, ta wese totutaya magau luayahaya ta go’ila aneiu? 38 Totutaya avemwageyeu ema ’abagaya ta tua agabeu umai vanuea? Totutaya a’iteu ge au kalekomo ta avekalekou? 39 Ta totutaya ma au vihuqa a’iteu? Ta wese totutaya vanue ’ebeyoqona ’inaya utoatoa ta avayausiu?’

40^u “Inega ena vonedi, ‘Vonahaqiaqi, ’eguma tomotau kavokavovo ni’a oiuledi, e ’inega ya’a wese ni’au oiulegu.’

41^v “Ta taudi agu kelia itoatoa ena vonedia, ‘Onogegu! Omi’a tawa Yaubada vona ve’alatemi be vematasabu qiduana ona lobe, ’inega ona tauya ’aiwe ’ala’alata vataya ’inaya. Omo’e di’we~nana lova Yaubada ni’a ’iva’ava’ata vatayea Seitani me ena tofewayavo weaqidi. 42 Mana lova

^p 25:29 Md 13:12; Mk 4:25; Lk 8:18 ^q 25:30 Md 8:12; Lk 13:28 ^r 25:31 Md 16:27; 19:28

^s 25:32 Isi 34:17; Ve 20:11-13 ^t 25:35 Ais 58:7 ^u 25:40 Vos 19:17; Md 10:42; Mk 9:41

^v 25:41 Md 7:23

yabotana ta gebu oda ve'ainigu, ta wese magagu luayahaya ta go'ila ge oda neigu. ⁴³Ta lova yavewagawaga yamai emi 'abagaya ta ge oda 'ebe'ewegu emi vanuea, be o'itegu ge agu kalekomo ta ge oda vekalekogu, ta wese yavevihuqa be vanue 'ebeyoqona 'inaya yatoatoa ta ge oda vayausigu.'

⁴⁴“Inega taudi egu vona ba'e ina ve'iei ina vonaya, 'Kaiwabu, totuta a'iteu ma botaniu nage magau luayahaya? Ta totutaya uvewagawaga umai ema 'abagaya? Totutaya a'iteu ge au kalekomo? Ta totutaya uvevihuqa? Ta wese totutaya vanue 'ebeyoqona 'inaya utoatoa ta gebu ada iuleu?”

⁴⁵“Inega ena vonedi, 'Yavona aqiaqiemi, lova tuta~nana tomotau ge adi wawa 'ena'ina ba'e vita diavona ilobedi ta omi'a ge oda iuledi, 'inega wese ya'a ge oda iulegu.’ ⁴⁶” ‘Inega todewa kavokavovo edi ilivu veifana weaqina ina tauya visiqat vataya 'inaya, ta 'esi taudi tunutunuqidi yawai vataya ina lobe’a.”

Toluvineavo nuanuadi Ieisu ina luve'aligia

(Maki 14:1-2; Luke 22:1-2; Ioni 11:45-53)

26 ¹Tuta~nana Ieisu ana to'abibodayavo yani qabuna tuta ena 'ebeluo'ova weaqina ve'itedi gumwala 'inega vonedi vonaya, ² ^x “Ni'a oalamanian 'aubena magilafuna nagumwala 'inega 'Auvivia Sagalina nave'ale, be 'inega agu tosuluva naneiegu agu aviayavo 'idia, be 'etoluai 'inaya ya'a Tomotau Natuna ina tutuve'ewegu.”

³Ta ba'e tuta~nana 'inaya toveguba qiduquadi be 'abaga ana tovanugwetayavo iva'auta toveguba edi tovanugweta Kaiafa ena vanuea. ⁴Inega adi 'aidega idima govaqa ma'oda 'waivega Ieisu ina kafi 'aiqi 'abo ina luve'aligia. ⁵Ta ivonaya, “Ge 'Auvivia Sagalina ana tuta 'inaya Ieisu kana kafia, mana 'eguma 'idewani nawale tomotau diadi navilea ta ina manini 'idaya.”

Vavine taha Ieisu dede'wega iwaqia 'abaga Bedani 'inaya

(Maki 14:3-9; Luke 22:3-6)

⁶Ieisu Bedani 'inaya toatoa Saimoni ena vanuea, tauna lova to'wagota taha. ⁷ Ta 'ai ana tuta 'inaya taha vavine me ena dede'wa mai lugu vanuea, ta dede'wa~nana ana maisa qiduana ma botolina viaviaqina alabasita 'inega. Ta vavine~nana ba'e dede'wa~nana iwaqia Ieisu debanaya.

⁸Ta tuta~nana Ieisu ana to'abibodayavo vavine~nana ena viaqa Ieisu 'inaya i'itea 'inega ilugwaeyea ivonaya, “Tola'ai weaqina dede'wa uiwaqa kavovoi mana ana maisa gegoyo? ⁹Luaqiaqiea be dede'wa~nana davegimwaneyea be ana ve'ia agona da'ewea be davewila'ayea lukwalukwa 'idia.”

^w 25:46 Dan 12:2; Ion 5:29 ^x 26:2 'Ifo 12:1-27; Md 20:18 ^y 26:7 Lk 7:37-38

¹⁰ Ieisu edi nuanua ni'a alamania ta vonaya, "Gebu vavine ona lugwaeyei mana ba'e yani aqiaqi otaqina 'iguya viaqia. ¹¹ ^z Lukwalukwa~dina tuta qabuna maega otoatoa, ta ya'a ge tuta kuena omi'a maega kana toatoa. ¹² Tuta~nana vavine ba'e 'wafigu dede'wega iwaqia, 'inega 'iva'ava'aigu agu tavuna weaqina. ¹³ Yavona aqiaqiemi, ma'inaya Valegu ina lugaihi dadanea di'we taha taha bwa'obwa'o debanaya, e omo'e 'inaya wese vavine ba'e ena viaqa 'iguya ina velulu'uyayea 'inega tomotau ina nuave'avinia."

Iudasa nuanuana Ieisu nasuluvea

(Maki 14:10-11; Luke 22:3-6)

¹⁴ Ieisu ena vona ba'e lu'ovoia 'inega Tuwelo~dina 'idiega taha ana wawa Iudasa Isakaliota tauya toveguba qiduquiduadi 'idia, ¹⁵ ^a 'inega vonedi vonaya, "Evisa ve'ia ona neigu 'eguma Ieisu ena ve'ineiea 'imia?" 'Inega mane siliba ana yau 30 ineia. ¹⁶ E tuta ba'e 'inega Iudasa tuta aqiaqina vewa'ia be 'inega Ieisu nasuluvea 'idia 'abo ina kafia.

Ieisu ma enavo 'Auvivia Sagalina ana 'abwaga i'ainia

(Maki 14:12-21; Luke 22:7-13, 21-23; Ioni 13:21-30)

¹⁷ ^b Beledi ge ana isitimo Sagalina ana 'aubena nugweta 'inaya Ieisu ana to'abibodayavo imai ivetala'aiea ivonaya, "Kaiwabu, ma'inaya nuanuau 'Auvivia Sagalina 'abwagana ana 'iva'ava'aia weaqiu?"

¹⁸ 'Inega Ieisu vonaya, "Ona tauya Ielusalema 'inaya, ta taha 'oloto ona 'ita 'inanea ta ona vonea. Ema tove'ita ena vona ba'e 'idewani: Egu tuta ni'a mai ta nuanuagu 'Auvivia Sagalina ana 'abwaga ma agu to'abibodayavo eu vanuea ana 'ai." ¹⁹ E to'abiboda~dina Ieisu ena vona imatayagea, 'inega 'oloto~nana ena vanuea 'Auvivia Sagalina ana 'abwaga i'iva'ava'aia.

²⁰ 'Inega lavilavi otaqaya Ieisu Tuwelo~dina maega ilugu, 'abo 'abwaga~nana i'ai. ²¹ Ta tuta~nana i'ai'ai 'inega Ieisu vonaya, "Egwavo, yavona aqiaqi 'imia, nawale taha 'imiega nasuluvegu."

²² Ieisu ena vona ba'e weaqina nuadi vita aqiaqi, 'inega 'aidega 'aidega Ieisu ivetala'aiea ivonaya, "Kaiwabu, togama, nage ya'a?"

²³ ^c Ta Ieisu vonedia, "Oloto~nana tauna maega gaeba ma du'wana gamonaya ama beledi a'au'aubwa'uya ta a'ai'ai, e tauna nawale nasuluvegu. ²⁴ Ya'a Tomotau Natuna nawale 'aliga ana 'edega ena tauya 'idewani lova Buki Nugwenugweina 'inaya maduvonayea, ta tauna agu tosuluva~nana nuakolokolona, ta 'esi luaqiaqiea 'eguma lova inana ge ida venatunei."

^z 26:11 Luve 15:11 ^a 26:15 Sek 11:12; Ion 11:57 ^b 26:17 'Ifo 12:14-20

^c 26:23 Same 41:9

²⁵ 'Inega ana tosoluva, Iudasa vonaya, "Kaiwabu, to'oloto, nage ya'a?"
'Inega Ieisu voneaya, "Ni'a tau'uyega usimanayeu."

Kaiwabu ena 'ai 'ebenuave'avina

(Maki 14:22-26; Luke 22:14-20; 1 Kolinita 11:23-25)

²⁶ Nawale i'ai'ai 'inega Ieisu beledi 'ewei ta vona veyolubea 'inega gitomwea 'abo ana to'abibodayavo neidi, vonedia, "Ba'e 'wafigu, ta ona 'ewei ona 'ai."
²⁷ Abiboda 'oine ma vedina wese 'ewei 'inega lukaiwa Yaubada 'inaya 'abo neidi ta vonaya, "Qabumi ona numea, ^{28d} ba'e sulaligu inoinoqa luvine vauvauna weaqina, ta sulala~nana tomotau qabumi emi luveifana ana nuataqo weaqina.
²⁹ Ta yavonemi, ge wese 'oine ena numa 'eviviei ana laba omi'a maega 'oine vauvauna kana numea Tamagu ena 'Ebeluvine 'inaya." ^{30e} 'Ai gumwala 'inega 'evosi taha i'evosiea 'abo i'ifoqe ta i'watovu bwanaga Olibe 'inaya.

Ieisu madusimanea Fita ena vegeqa weaqina

(Maki 14:27-31; Luke 22:31-34; Ioni 13:36-38)

^{31f} Ta Ieisu vonedi vonaya, "Ba'e velovana~nana 'inaya qabumi ona dena ta ona nogegu 'idewana Buki Nugwenugweina ena vona vonaya, 'To'itamaki sifi ena luve'aligia
be sifi qabudi ina yavula dadana.'

^{32g} "Ta egu ya'itoto 'evivi 'aligega 'abibodanaya ena nugweta ena tauya Galili 'inaya, ta omi'a ona 'abibodegu ona wai."

³³ 'Inega Fita vona 'evivi vonaya, "Eguma nawale qabudi ina dena 'iuyega, ya'a agu 'aidega ena toa."

^{34h} 'Inega Ieisu Fita vonea vonaya, "Yavona aqiaqieu, velovana ba'e 'inaya nawale una vegeqegu ana yau toi, ta 'abiboda kamukamu nadou."

³⁵ Ta Fita vonaya, "Kaiwabu, ge ena vegeqeu! 'Eguma ina luve'aligiu ya'a wese maega ina luve'aligiu." Ta to'abibodayavo qabudi edi vona wese 'idewani.

Gedesemani 'inaya Ieisu noqinoqi Tamana 'inaya

(Maki 14:32-42; Luke 22:39-46)

³⁶ 'Inega Ieisu ma ana to'abibodayavo itauya di'we taha ana wawa Gedesemani 'inaya, ta vonedi vonaya, "Ba'idia ona toatoa, ta ya'a yatautauya ena venoqi Yaubada 'inaya."

³⁷ 'Inega Ieisu Fita ta wese Sebedi natunavo magilafudi 'ebe'ewedi itauya tufinaya. 'Inega Ieisu me ena giwali visiq ta me ena nuavita vonedi vonaya, ³⁸ⁱ "Giwaligu visivisiqa qiduana, ta agu lutonova luveifa otaqa, 'inega ba'idia ona toatoa ta ge matami nadune."

^d 26:28 Sek 9:11; 'Ifo 24:8; Iel 31:31-34; 1Kol 10:16 ^e 26:30 Lk 22:39; Ion 18:1

^f 26:31 Sek 13:7; Ion 16:32 ^g 26:32 Md 28:7,16 ^h 26:34 Md 26:69-75 ⁱ 26:38 Ion 12:27

39'Inega Ieisu vanaqo ta givelukabwebwe venoqi vonaya, "Tamagu ye, 'eguma ana fata visiqa vedina ba'e 'iguyega una 'ewa yavulea, ta gebu ya'a egu nuanua ta 'esi o'a eu nuanua 'idewana ena viaqia."

40'Inega 'evivi ana to'abibodayavo toidi 'idia ta 'itedi i'eno motaiva, ta Ieisu Fita divanoya, vonaya, "Tola'ai weaqina o'eno'eno! Ma'oda, nage ge ami fata be tuta kukusana namo oda vevekova ta oda ba'eba'eyegu, waisa?" 41Ta wese vonedi vonaya, "Luaqiaqiemi be matami ge nadune ta 'esi ona vevenoqi be 'inega Seitani ge nasitonovimi. Vonahaqiaqi, niboanimi nuanuana, ta 'wafimi dawalili."

42'Inega Ieisu tuta vemagilafuna naqo 'evivi sabi venoqi vonaya, "Tamagu, vonahaqiaqi 'eguma ge taha wese 'eda da'eno'eno tomotau adi 'etoyavua weaqina, 'inega ba'e visiqa vedinega ena numa be yaqisa eu nuanua ena viaqia."

43Ta Ieisu wese 'evivi ana to'abibodayavo 'idia 'inega lobedi i'eno motaiva, mana matadi tawa dunedune. 44'Inega tuta vetoina wese 'evivi sabi venoqi, ta tawadega ma'oda venoqi 'aiqa wese lu'eviviea 'idewani.

45Ta wese 'evivi ana to'abibodayavo divanodi vonaya, "Ma'oda, nage nawale o'eno'eno ta oveveyawai, waisa? O'itei, ya'a Tomotau Natuna egu tuta tawa 'ifoqe be ina ve'ineiegu tomotau luveifadi 'idia. 46^j Oya'itoto katauya, mana agu tosuluva maimai."

Ieisu ikafia

(Maki 14:43-50; Luke 22:47-53; Ioni 18:3-12)

47Ta Ieisu nawale vonavona, 'inega taha 'oloto Tuwelo~dina 'idiega tauna Iudasa qabu qiduana maega i'ifoqe. Ta ba'e qabu diavona toveguba qidquiduadi be wese 'abaga ana tovanugwetayavo edi luvine 'inega ivetunedi imai Ieisu ana kafi weaqina me edi kefata be wese me edi gita. 48Ta Iudasa toluavia ni'a vonedia, "Tomotau~nana nawale ena talafafea e tauna Ieisu, 'inega ona kafia." 49'Inega tauya tunutunuqina Ieisu 'inaya vonaya, "Kaiwabu, kaiwa!" 'inega talafafea.

50Ta Ieisu vonaya, "Tagu, tola'ai nuanuau una viaqia ase uviala kwayavoni." 'Inega toluavia imai Ieisu 'inaya 'abo ikafia.

51^k 'Inega taha 'oloto Ieisu ena qabu 'inega ena kefata siwaia ta toveguba edi tovanugweta ena tofewa teniqana 'ilaufea. 52^l Ta Ieisu 'oloto~nana vonea, "Ta'iwa! Eu kefata una a'u'eviviea ana umaya, mana toluaviayavo taudi luaviayega i'ali'aliga. 53Ona alamania vonigo 'eguma nuanuagu Tamagu 'inega ena noqi iula weaqina, e nawale ena tovale'ewa qabu ago va'inedi navetunedi 'iguya. 54Ta gebu, mana 'eguma 'idewanina 'inega ma'oda Buki Nugwenugweina ena simana weaigu ana aqiaqi na'ifoqe 'aiqa?"

55^m 'Inega Ieisu ana tokafi qabudi vonedi vonaya, "Nage ya'a kavona tovanawala taha, 'inegana me emi kefata be wese me emi gita omai sabi vunuguigu? Lova 'aubena qabuna 'idia Vanue Gwalagwalana 'inaya yatoatoa ta

^j 26:46 Ion 14:31 ^k 26:51 Ion 18:26 ^l 26:52 Nug 9:6; Ve 13:10 ^m 26:55 Lk 19:47; 21:37

yaveve'ita tomotau 'idia, ta tola'ai weaqina ge oda kafigu tuta diavona 'idia?
⁵⁶ Ta ba'e yani diavona i'ifoqe be 'inega tovesimasimanayavo edi simana Buki
 Nugwenugweina gamonaya ana vonahaqiaqi na'ifoqe."

'Inega ana to'abibodayavo qabudi leisu inogei ta idena.

Ieisu tovolu me Diu edi kaniselayavo 'iawadia

(Maki 14:53-65; Luke 22:54-55,63-71; Ioni 18:13-14,19-24)

⁵⁷ Qabu diavona Ieisu ni'au ikafia ta imiea toveguba edi tovanugweta ana wawa Kaiafia 'inaya, ta wese luvine ana tove'itayavo be 'abaga ana tovanugwetayavo ni'a iva'uta ena 'abagaya. ⁵⁸ Fita tufwana luluvaiega Ieisu tala'obea ta mai toveguba edi tovanugweta ena 'abagaya, 'inega lugu ta toabui Vanue Gwalagwalana ana to'itamakiavo maega 'ebekotu di'wenaya be vonigo Ieisu ana luvine nanoqolia. ⁵⁹ Taudi toveguba qiduquadi ta wese kaniselayavo nuanuadi Ieisu ana tove'ewayavo ina lobedi be edi 'eu'au'ava 'inega Ieisu ina luve'aligia. ⁶⁰ 'Inega tomotau 'eala imai, ta edi u'ava 'inega toluvineavo ge adi fata be Ieisu ina luvinei mana u'ava~dina ivego'ila.

Ta 'abiboda 'oloto magilafudi imai itovolo, ⁶¹ ta ivonaya, "Ieisu lova vonaya, 'Agu fata be Yaubada ena Vanue Gwalagwalana ena qeu yavulea, be 'aubena toi 'idia ena yoqona 'eviviea.' "

⁶² 'Inega toveguba edi tovanugweta agona tovolu ta vonaya, "Tomotau omo'e edi ve'ewa 'iuya ni'au unoqolia, waisa? 'Inega 'evisa eu ve'ia?" ⁶³ Ta Ieisu ge taha vona da'inanei.

'Inega toveguba~nana wese Ieisu vonea vonaya, "Uvonahaqiaqi Yaubada mayawaina matanaya, nage o'a To'etoyavua ta Yaubada Natuna, nage gebu?"

⁶⁴ 'Inega Ieisu vonea, "Ni'au bena'e uvona, ta wese yavonemi vonigo ya'a Tomotau Natuna nawale ona 'itegu Tovewaiwai otaqa ana 'ataqia ena toatoa be wese mahalega waumana debanega ena mai."

⁶⁵ 'Inega toveguba edi tovanugweta diana vila veiveifea e taunega ana kaleko kuena abuya ta vonaya, "Ena vona veifana ni'a onoqolia. Vonahaqiaqi, 'oloto ba'e ena vona 'inega taunega givaneyea kavona tauna Yaubada. Ta'iwa, ge taha wese tove'ewayavo ina vonavona ena luveifanayavo weaqidi. ⁶⁶ Ma'oda emi nuanua Ieisu weaqina?"

Ta taudi ivonaya, "Luaqiaqiea be na'aliga, mana me ena luveifana!" ⁶⁷ 'Inega 'iawana igida'wea ta ivunuqa dadanea nimadiega, ta wese vaina i'au'ae'aea,

⁶⁸ ta ivonavonaya, "Eguma o'a vonahaqiaqi To'etoyavua 'inega usimana 'ifoqe 'imaya togama vunuvunuquu."

ⁿ **26:61** Ion 2:19-21 ^o **26:63** Ais 53:7; Md 27:12 ^p **26:64** Same 110:1; Dan 7:13; Md 24:30

^q **26:65** Md 9:3; Ion 10:33 ^r **26:66** Luvi 24:16; Ion 19:7 ^s **26:67** Ais 50:6; 53:5

Fita Ieisu vegeqea

(Maki 14:66-72; Luke 22:56-62; Ioni 18:15-18,25-27)

⁶⁹Fita nawale toatoa 'ebekotu di'wenaya, 'inega tofewa iahaba taha 'ifoqe mai ta vetala'aiea vonaya, "O'a wese lova Ieisu Galili 'olotona maega oluluyaba dadana, waisa?"

⁷⁰Ta tomotau qabudi matadia Fita vegeqa vonaya, "Ba'e yani~nana uveveqaeyea ya'a ge eda alamania."

⁷¹'Inega 'ifoqe masu'edanaya ta taha wese iahaba 'itea Fita 'inega vonaya, "'Oloto omo'e lova Ieisu Nasaleta 'olotona maega itoatoa."

⁷²'Inega wese Fita vegeqa ta 'awatamatamana vonaya, "Ba'e 'oloto~nana ya'a ge eda alamania."

⁷³Ge tuta kuena 'abibodanaya vaina 'oloto itovotovolo Fita di'wenaya ta ivoneaya, "Vonahaqiaqi, o'a Ieisu taha ena tomotau, mana bonau ana noqola kavona me Galili bonadi."

⁷⁴'Inega Fita vonaya, "Tamada! 'Oloto ba'e ya'a ge eda alamania! 'Eguma egu vona ge vonahaqiaqi nawale Yaubada naluvematasabugu."

Tuta omo'e 'inaya kamukamu dou. ^{75 t}'Inega Fita Ieisu ena vona nuaia, "O'a nawale tuta toi ana yau una vegeqegu, ta 'abiboda kamukamu nadou." 'Inega Fita me ena nuavita 'ifoqe 'abagaya ta dou.

Ieisu itauyea Failato matanaya

(Maki 15:1; Luke 23:1-2; Ioni 18:28-32)

27 ¹Ni'a mahala vulihia 'inega toveguba qiduquduadi wese 'abaga ana tovanugwetayavo qabudi iluvine vonigo Ieisu ina luve'aligia. ²'Inega Ieisu nimana iyoqonia itauyea me Loma edi gavana Failato 'inaya nuanuadi ina keiea be liuna ina baia ta Ieisu naluvinei 'aliga 'inaya.

Iudasa ena 'aliga

(Viaqa 1:18-19)

³Tuta~nana Iudasa nuana 'eqa'uya vonigo Ieisu ina luve'aligia, 'inega nuagivila ta nuanuana siliba 30~dina nanei 'eviviedi toveguba qiduquduadi be 'abaga ana tovanugwetayavo 'idia, ⁴'inega tauya 'idia ta vonaya, "luveifana ni'a yaviaqia, mana 'oloto aqiaqina yasuluvea 'imia."

Ta ivona 'eviviea, "Ima'a ge taha ada nuanua ba'e yani~nana weaqina, ta 'esi o'a tau'u eu luveifana weaqina una nuanua." ^{5 u}'Inega Iudasa siliba 30~dina feledi Vanue Gwalagwalana gamonaya, ta 'ifoqe tauya 'inega taunega magana sikwea 'abo 'aliga.

⁶Toveguba qiduquduadi siliba~dina igwagwedi ivonaya, "Ge ana fata be ba'e siliba~dina kana a'udi mane ana 'ebeluveaqe 'inaya, mana luvine 'eno'eno

^t 26:75 Md 26:34 ^u 27:5 Via 1:18-19; Md 26:14-15

vonaya vonigo mane luve'aliga 'inega ge ana fata be kana vefewei Vanue Gwalagwalana weaqina." 7Ta edi veqae 'abibodanaya iluvine be mane~nana 'inega taha to'abi 'ulena ena bwa'obwa'o ina gimwaneana, ta bwa'obwa'o~nana wagawaga adi deba'unu weaqidi. 8'Inega bwa'obwa'o~nana igabea Sulala Bwa'obwa'ona, ta wawa~nana nawale 'eno'enoa.

9v Omo'e 'inega tovesimasimana Ielemaia ena vona ana aqiaqi 'ifoqe, mana lova Buki Nugwenugweina 'inaya vonaya,

"Me Isileli tauna ana ve'ia ia'uya siliba adi yau 30 'idewani. Ta mane~nana i'ewedi, 10'inega to'abi 'ulena ena bwa'obwa'o igimwaneana, 'idewani egu Kaiwabu ena vematamagilafu 'iguya."

Failato Iesu vetala'aiea

(Maki 15:2-5; Luke 23:3-5; Ioni 18:33-38)

11'Inega Iesu me Loma edi gavana Failato 'iawanaya tovolu ta Failato vetala'aiea vonaya, "Uvonegu, nage o'a me Diu edi Kini?"

'Inega Iesu vonaya, "Ni'a uvona 'idewani." 12w 'Inega toveguba qiduquduadi wese 'abaga ana tovanugwetayavo Iesu ive'ewea Failato matanaya, ta Iesu ge taha tola'ai weaqina davona 'eviviedi.

13'Inega Failato vonaya, "Ma'oda, nage edi ve'ewa 'iuya unoqolia?" 14Ta Iesu ge taha tola'ai davonei edi ve'ewayavo weaqina, 'inega Failato nuana voqana qiduana.

Failato Iesu awafelea ina luve'aligia

(Maki 15:6-15; Luke 23:13-25; Ioni 18:39-19:16)

15Ya'wala 'aidega 'aidega 'idia 'Auvivia Sagalina 'inaya gavana ena ilivu ba'e 'idewani: Tomotau qabudi luaqiaqiedi be taha tomotau ina venua'ivinea be na'ifoqe vanue 'ebeyoqona 'inega, e 'inega gavana~nana tomotauna nayavuia naha'u'ifoqeyea 'idia. 16Tuta ba'e 'inaya 'oloto taha vanue 'ebeyoqona 'inaya toatoa ana wawa Balabasi, ta tomotau qabudi ni'a ialamania tauna 'oloto veifa otaqina. 17'Inega tomotau iva'auta ta Failato vetala'aiedi vonaya, "To'oloto nuanuami ena yavui weaqimi, nage Balabasi nage Iesu tauna igabea To'etoyavua?" 18x Ta Failato ena vetala'ai ba'e 'iuna, mana ni'a alamani aqiaqiea Iesu ive'ifi'ifiea, 'inega ikafia ta imiea 'inaya sabi luvinena.

19Tuta~nana Failato nawale toatoa 'ebevekotu ana 'ivi 'inaya ta qabu diavona vevetala'aiedi, ta 'inega moqanena vale ivetunei ivonaya, "Ge taha tola'ai una viaqi ba'e 'oloto~nana 'inaya, mana velovanaya ve'wayoqega visiqi qiduana yalutonovia weaqina, 'inega yahalamania tauna toatoa maiqina."

20Ta toveguba qiduquduadi be wese 'abaga ana tovanugwetayavo qabu diavona iluvetuvetunedi ina venoqi Failato 'inaya be Balabasi nayavui

v 27:9-10 Sek 11:12-13 w 27:12 Ais 53:7 x 27:18 Ion 11:47-48; 12:19

'idia ta 'esi Ieisu 'aliga nalobea. ²¹ 'Inega Failato qabu diavona wese vetala'aiedi, "Magilafudi 'idiega togama nuanuami ena yavui weaqimi?"

'Inega ivoneaya, "Nuanuama Balabasi!"

²² Ta Failato vonaya, "Tola'ai ena viaqi Ieisu 'inaya, tauna igabea To'etoyavua?"

'Inega tomotau qabudi ena vona ive'evivia ivonaya, "Etoluai 'inaya kana tutuve'ewea!"

²³ 'Inega Failato vonedi, "Tola'ai ena luveifana 'inega na'aliga?"

Ta qabu diavona ikolua qiduana ivonaya, "Etoluai 'inaya kana tutuve'ewea!"

²⁴ 'Inega Failato tawa alamania ge ana fata be qabu diavona nuadi nagivilei, mana 'itedi Ieisu ena 'aliga weaqina i'alaweloweloloyea be tuta goyona vedavi na'ifoqe. 'Inega go'ilega nimana 'utuya qabu~dina matadia 'abo vonaya, "Ge taha wese vona ena 'inanei 'imia ba'e 'oloto~nana ena 'aliga weaqina. 'Inega ya'a toatoa maiqigu, ta 'esi taumiega ona luvinea."

²⁵ Ta qabudi ivonaya, "Ta'iwa, ena 'aliga ana vita ima'a natumavo maega ana 'avalea."

²⁶ 'Inega Failato Balabasi yavuia 'idia, ta Ieisu ve'ineiea ena toluaviayavo 'idia ta vonedi wayo metametanega ina vunuqa dadanea, ta 'abiboda ina tutuve'ewea 'etoluai 'inaya.

Toluaviayavo Ieisu igivenu'wea

(Maki 15:16-20; Ioni 19:2-3)

²⁷ 'Inega gavana Failato ena toluaviayavo Ieisu itauyea edi 'ebetoea 'inaya, ta ediavo qabudi igaba va'auqidi imai Ieisu itovolo vivilia. ²⁸ ^a 'Inega ana kaleko ivaulia ta kaleko bweabweala otaqina ivekalekoya, ²⁹ ta ana biatuli talitaliega iviaqia 'inega 'unu'ununaya ia'uya, ta kewala ana 'ataqiega ivekafia ta wese 'iawanaya tuqatuqadiega isobadi ta igivenu'wea ivonaya, "Kaiwa, o'a me Diu edi Kini Qiduana." ³⁰ ^b E wese igida'wea be ena kewala i'ewea 'inega 'unu'ununa ivunuqia. ³¹ 'Inega igivenu'wei gumwala 'abo kaleko bweabwealina ivata'ia ta ana kalekoyega ivekaleko 'eviviea, 'inega itauyea sabi tutuve'ewana.

Ieisu itutuve'ewea 'etoluai 'inaya

(Maki 15:21-32; Luke 23:26-43; Ioni 19:17-27)

³² Tuta~nana Ieisu i'ifoqeyei ta itautauyea 'edaya e 'inega Sailini 'olotona taha ana wawa Saimoni ilobea, ta iluvetunei be Ieisu ana 'etoluai na'avalea. ³³ 'Inega 'avalea ana laba i'ifoqe 'abaga Goligota 'inaya, ta Goligota ana givila "Unu'unu ana 'abaga". ³⁴ ^c 'Inega 'oine be taha yani

^y 27:24 Luve 21:6-9 ^z 27:25 Via 5:28 ^a 27:28 Lk 23:11 ^b 27:30 Ais 50:6

^c 27:34 Same 69:21

yuyuna maega iwayavilea ta Ieisu ineia vonigo danuma, ta 'alatonovia 'inega nogea.

^{35 d} 'Inega 'etoluai 'inaya Ieisu itutuve'ewea. 'Abibodanaya toluaviayavo Ieisu ana kaleko i'ewedi ta nuanidia taha laha iviaqia be togama nanugweta 'inega kaleko~nana na'ewedi. ^{36 e} 'Abiboda omo'e 'inaya itoabui ta Ieisu i'itamakia. ³⁷ Ta ana 'etoluai debanaya ena 'aliga 'iuna i'wayavia ba'e 'idewani,

BA'E IEISU TAUNA ME DIU EDI KINI

^{38 e} Ta wese tovanawala magilafudi Ieisu maega itutuve'ewedi, taha ana 'ataqiega ta taha ana keliega.

^{39 f} 'Inega tomotau ivevedelideli ta Ieisu idagidagiei ta wese ivevegilea ivonaya, ^{40 s} "O'a uvona vonigo Vanue Gwalagwalana una qeunia, ta 'aubena toi 'inaya wese una yoqona 'eviviea. Ta 'eguma o'a Yaubada Natuna 'inega tau'uyega una 'etoyavuii ta 'etoluaiega una webui mai."

⁴¹ Wese 'idewanina toveguba qiduiduadi be luvine ana tove'itayavo ta wese 'abaga ana tovanugwetayavo Ieisu igivenu'wea ivonaya, ⁴² "Tauna mali tomotau 'etoyavuidi ta taunega ge ana fata na'etoyavui. 'Eguma tauna vonahaqiaqi me Isileli edi Kini, 'inega 'etoluaiega nawebui mai e 'inega kana vetumaqanea. ^{43 h} Tauna vonigo Yaubada 'inaya vetumaqana ta vonaya, 'Ya'a Yaubada Natuna', 'inega ka'itei nage Yaubada na'awahaqiaqiei be na'etoyavui, waisa?"

⁴⁴ Ta tovanawala~dina Ieisu maega ni'a itutuve'ewedi, taudi wese 'idewani igivenu'wea.

Ieisu ena 'aliga

(Maki 15:33-41; Luke 23:44-49; Ioni 19:28-30)

⁴⁵ Baba'auyega be ana laba baba'au yewavilea 'inaya 'abaga qabuna velovana bodea. ^{46 i} 'Inega 3 koloki 'idewani Ieisu bonana qiduanega gaba vonaya, "Eloi, Eloi, lama sabakitani?"

Ta ana givila vonaya, "Egu Yaubada, egu Yaubada, tola'ai weaqina unogegu?"

⁴⁷ 'Inega vaina tomotau di'wenaya itovotovolo ena gaba inoqolia e ivonaya, "Onoqoli, 'oloto ba'e Ilaitia gabegabea."

^{48 j} 'Inega taha 'idiega lukwayavoni vihila kikifa 'ewei ta 'oine yuyuna 'inaya 'aubwa'ui, 'inega taha 'aiwe 'inaya 'idawayea ta ve'etovaneyea Ieisu 'awanaya vonigo davenumea. ⁴⁹ Ta enavo ivonaya, "Ta'iwa, ta kana ba'e tonova, nage Ilaitia namai na'etoyavui." ⁵⁰ 'Inega Ieisu wese bonana agonega gaba 'evivi 'abo yawaina gumwala.

^d 27:35 Same 22:18 ^e 27:38 Ais 53:12 ^f 27:39 Same 22:7; 109:25 ^s 27:40 Md 26:61; Ion 2:19 ^h 27:43 Same 22:8 ⁱ 27:46 Same 22:1 ^j 27:48 Same 69:21

^{51 k} Ta tuta~nana Ieisu yawaina gumwala, 'inega Vanue Gwalagwalana gamonaya 'awa ana bagina kaleko eabu magilafuyea debanega be webui 'ayanaya ta wese mwani'ini'i veni'i, 'inega dabo qiduquduadi fisala yavuledi, ⁵²ta wese deba'unu 'awadi 'elu'eqauya. Ta tovetumaqana 'eala lova yawaidi gumwala mayawaidi iya'itoto 'evivi. ⁵³'Inega Ieisu ena ya'itoto 'evivi 'abibodanaya toya'itoto 'evivi~dina wese 'abaga gwalagwalana Ielusalema 'inaya ilugu, ta tomotau 'eala i'itedi. ⁵⁴Toluavia~dina me edi tovanugweta nawale Ieisu i'ita'itamakia ta tuta~nana mwani'ini'i be yani qabuna i'ifoqe, 'inega imwaniniva qiduana ta ivonaya, "Vonahaqiaqi, 'oloto ba'ena Yaubada Natu Otaqina."
^{55 l} Ta vivine 'eala ba'e yani diavona luluvaiega ivevekovedi, taudi lova Galiliega Ieisu i'abibodea ana toiulayavo 'idewani. ⁵⁶Vivine diavona 'idiega taha ana wawa Meli Magidala, ta wese taha Meli taudi Iemesa ma taina Iosefa inadi. Ta wese Sebedi moqanena maega ivevekova.

Ieisu itavunia

(Maki 15:42-47; Luke 23:50-56; Ioni 19:38-42)

⁵⁷Ni'a velavilaviea 'inega taha 'oloto kaikaiwabuna ana wawa Iosefa 'ifoqe, tauna Alimatia 'olotona ta wese Ieisu ana to'abiboda. ^{58 m} 'Inega Iosefa tauya gavana Failato 'inaya, ta venoqiea Ieisu 'wafina weaqina. 'Inega Failato awafela ta ena toluaviayavo vonedi Ieisu 'wafina ina neia. ⁵⁹'Inega Iosefa ma enavo Ieisu 'wafina i'ewea ta kaleko kuena ta wadawadaeana 'inega iumea. ^{60 n} 'Inega Iosefa~nana ana deba'unu 'evauna 'inaya Ieisu a'uya. Ta deba'unu~nana lova dabo 'inaya alea ana 'ita kavona vetoa. A'u gumwala, 'inega dabo 'ena'ina ta beabeana 'inega deba'unu~nana 'aubodea, ta 'abibodanaya tauya. ⁶¹Ta Meli Magidala ma waviana deba'unu~nana di'wenaya itoabui ta ivevekova.

Deba'unu i'itamakia

⁶²Ieisu itutuve'ewea me Diu edi 'aubena 'iva'ava'ata 'inaya. Ta mahala vulihia 'inega edi 'aubena tafwalolo 'inaya toveguba qiduquduadi ta wese Falisiavo itauya gavana Failato 'inaya sabi 'itana, ^{63 o} ta ivoneaya, "Kaiwabu, tou'ava~nana lova tuta~nana nawale mayawaina totoa ena vona anuave'avinia vonaya, "Aubena toi 'abibodanaya 'aligega ena ya'itoto 'evivi.' ⁶⁴'Inega nage ana fata be toluaviayavo una luvetunedi be deba'unu~nana ina 'itamaki aqiaqiea ana laba 'aubena toi ina gumwala, fole Ieisu ana to'abibodayavo ina mai be 'wafina ina vanawali, e 'inega tomotau ina u'avedi vonigo Ieisu 'aligega tawa ya'itoto 'evivi. 'Inega ba'e u'ava~nana u'ava nugwenugweina naveqidua va'inea."

^k 27:51 'Ifo 26:31-33; Ibe 10:19-20 ^l 27:55 Lk 8:2-3 ^m 27:58 Luve 21:22-23

ⁿ 27:60 Ais 53:9 ^o 27:63 Md 12:40; 16:21; Mk 9:31; 10:33-34; Lk 9:22; 18:31-33; Ion 2:19-21

⁶⁵ Failato edi nuanua 'awahaqiaqiea, 'inega vonedia, "Emi to'itamakiavo egu toluavia 'idiega ona 'ewedi ona tauyedi be deba'unu~nana ina 'itamaki aqiaqiea."

⁶⁶ 'Inega taudi Falisi be toveguba ta wese toluavia itauya deba'unu~nana 'inaya ta 'awana ana 'auboda 'inaya taha 'ebe'ita ia'uya 'inega ge taha toga ana fata 'auboda~nana nagitonovi. 'Inega toluavia~dina ivetovolodi deba'unu~nana 'inaya be ina 'itamaki aqiaqiea, 'abo itauya.

Ieisu ya'itoto 'evivi 'aligega

(Maki 16:1-10; Luke 24:1-12; Ioni 20:1-10)

28 ¹ Me Diu edi Sabate tawa gumwala, 'inega wiki ana 'aubena nugweta 'inaya 'awa'awai otaqaya Meli Magidala ma waviana iya'itoto itauya Ieisu ana deba'unu sabi 'itana. ² 'Inega mwani'ini'i qiduana 'ifoqe, mana Kaiwabu ena tovale'ewa mahalega webui mai ta deba'unu ana 'auboda dabo 'uvekawawa naqoyei, 'inega vane debanaya toabui. ³ Ta tovale'ewana ana 'ita kavonaya namala 'wai'waia be wese ana kaleko wadawadaea otaqina. ⁴ Deba'unu ana to'itamakiavo tovale'ewa~nana i'itea 'inega giwalidi a'ala ta idedela igivelukabwebwe bwa'obwa'oya adi 'ita kavona ida 'aliga 'idewani.

⁵ 'Inega tovale'ewa~nana vivine magilafudi vonedi vonaya, "Ge ona mwaniniva! Ni'a yahalamania omi'a Ieisu osalisalia tauna itutuve'ewea 'etoluai 'inaya. ⁶^p Ta tauna ge ba'idia, ta 'esi ni'a ya'itoto 'evivi 'aligega, lova ena vona 'idewani. Omai o'itei ana 'ivimo. ⁷ Ta ona lukwayavoni ona tauya ana to'abibodayavo ona vonedi, 'Ieisu ni'au 'aligega ya'itoto 'evivi, ta nanugweta di'we Galili 'inaya ta omi'a ona 'abiboda, ta omo'e 'inaya ona 'itea'. Tola'ai ni'a yavonemi e ona nuave'avinia."

⁸ 'Inega vivine~dina ilukwayavoni deba'unu inogea ta me edi mwaniniva ta wese me edi qaiawa itauya Ieisu ana to'abibodayavo 'idia sabi vonadi. ⁹ Nawale itautauya, 'inega Ieisu 'ifoqe 'idia vonaya, "Kaiwa." 'Inega inaqo 'inaya ta tuqatuqadiega isobadi ta 'aqenaya ikafi ta ihiwa'odu 'inaya. ¹⁰^q Ta Ieisu vonedi vonaya, "Ge ona mwaniniva, ta ona tauya egwavo 'idia be ona vematamagilafuyedi ina tauya Galili 'inaya, be omo'e 'inaya ina 'itegu."

Deba'unu ana to'itamaki edi vematamagilafu

¹¹ Vivine~dina nawale itautauya 'edaya ta deba'unu ana to'itamaki vaina itauya 'abaga Ielusalema 'inaya, ta tola'ai ni'a 'ifoqe i'itea wese ivematamagilafu toveguba qiduquadi 'idia. ¹² 'Inega tovegubayavo ta wese 'abaga ana tovanugwetayavo itoava'auta adi 'aidega idima govaqa, 'abo mane 'ena'ina deba'unu ana to'itamakiavo ineidi, ¹³ ta ivonedi ivonaya, "Tomotau ona vonedi ona vonaya, 'Velovelovanaya a'eno

^p 28:6 Md 12:40; 16:21 ^q 28:10 Md 26:32

motaiva a'eno'eno ta 'inega leisu ana to'abibodayavo imai ta 'wafina ivanawalia!' " ¹⁴ Ta wese ivonedi ivonaya, "Eguma gavana Failato vale ba'e nanoqolia nawale ana u'avea 'inega ge diana navilei 'imia." ¹⁵ 'Inega to'itamaki edi mane i'ewei ta tovegubayavo be wese 'abaga ana tovanugwetayavo edi nuanua i'abibodea. 'Inega ba'e u'ava~nana leisu 'wafina weaqina valena yawala dadana me Diu 'idia, ta ba'itaga wese 'idewani ivonavona dadanea.

leisu ana to'abibodayavo adi veyoveyoa neidi

^{16 r} 'Inega leisu ana to'abibodayavo adi yau leveni itauya Galili 'inaya 'abo bwanagana leisu ni'a vetalatutulea 'inaya i'watovu. ¹⁷ Ta tuta~nana leisu i'itea 'inega ihiwa'odu 'inaya. Ta vaina 'idiega nawale me edi venuana magilafu.

^{18 s} 'Inega leisu mai di'weddia ta vonedi vonaya, "Tamagu ena waiwai ta ena luvine ni'a neigu be yani qabuna mahalaya ta wese bwa'obwa'oya ena luvinedi. ^{19 t} 'Inega ona tauya di'we qabuna 'idia ona lugaihi tomotau 'idia be ina veto'abiboda weaqigu. Ta wese ona givebabitaisodi Tamagu ana wawega be Natuna ya'a agu wawega ta wese Niboana Gwalagwalana ana wawega. ²⁰ Ta luvine qabudi ni'a yaneimi ona ve'itedi ta ina matayagedi. Vonahaqiaqi, ya'a tuta qabuna omi'a maega kana toatoa ana laba bwa'obwa'o ana 'ebelu'ovoa 'inaya."

^r 28:16 Md 26:32 ^s 28:18 Ion 13:3; Efe 1:20-22 ^t 28:19 Mk 16:15-16; Via 1:8